

## मत्तीसे भ्रिबा थार्बा पिन्बा समाचार चु किताबला बारेरी पाङ्तोःमा

**भ्रिबा म्हि:** येशूला मुल चेला मत्तीसे भ्रिबा मुबा। थेदा लेवीएनोन भिमुबा (मर्कूस २:१४)।

**भ्रिबा ग्ला:** एन्टीओखिया शहररी भ्रिबा मुबा।

**भ्रिबा साल:** ओस्पन ईश्वी संवत् ७० (विक्रम संवत् १२७) सालरी भ्रिबा मुबा। बाइबलला कोड कोड विद्वानगदेसे ईश्वी संवत् ८० (विक्रम संवत् १३५) साल भन्दा लिच्छा भ्रिबा हिन्ना भिसी पाङ्मुला। चु मिति मर्कूसला किताब भ्रिबा भन्दा लिच्छाला हिन्ना। मत्तीला किताब भ्रिबा धुडरी यरूशलेमरी मुबा परमेश्वरला मन्दिरदा रोमीगदेसे नाश लबा मुबा।

**खाल्दा भ्रिबा:** येशू थार्बा पिन्बा ग्ले हिन्ना भिसी उन्बाला लागिरी यहूदीगदेदा भ्रिबा मुबा।

चु थार्बा पिन्बा समाचाररी डाच्छान पुडखला भिसी कबुल लबा थार्बा पिन्बा म्हि चा येशू हिन्ना भिसी पाङ्बा मुला। ल्हानान डाच्छा परमेश्वरसे हाडला म्हि यहूदीगदेदा थार्बा पिन्बा म्हि पुडखला भिसी कबुल लबा मुबा। थे कबुल चा परमेश्वरसे येशूदा जम्बुलिडरी पुडखसी पूरा लजी। चु थार्बा पिन्बा समाचार यहूदी यहूलला म्हिगदेला लागिरी जे आहिन, जम्बुलिड नाडलान म्हिगदेला लागिरीएनोन हिन्ना।

चु थार्बा पिन्बा समाचाररी मत्तीसे जम्मान तामगदे मेलोसेन भ्रिबा मुला। चु किताबरी येशू ख्रीष्ट न्हबाहेन्से सिबाग्याम सोबाधोनाला तामगदेला बारेरी पाङ्बा मुला। चुरी येशू न्हबा ताम ओच्छे येशूला बप्तिस्मादेन शैतानसे येशूला सेम च्याबाला बारेरी

पाड्बा मुला। थेहड् लसीन गालील अञ्चलरी येशूसे परमेश्वरला  
 यहुल्साला समाचार थेःना लबादेन लोप्बा ओच्छे आखम्बा  
 म्हिगदेदा खम्ना लबा तामगदेला बारेरीनोन पाड्बा मुला। थेहड्  
 लसीन येशू जम्मान म्हिला पापला सय फाबारी क्रुसरी सिबादेन  
 सिबाग्याम सोबा तामला बारेरीनोन पाड्बा मुला।

चु थार्बा पिन्बा समाचारग्याम येशूदा परमेश्वरसे मोशादा  
 पिन्बा ठिमदेन परमेश्वरला यहुल्साला बारेरी म्हिसे आघोबा  
 तामगदे घोना लबा अधिकार याड्बा जम्मान भन्दा घेन गुरु हिन्ना  
 भिसी उन्बा मुला।

### मुल तामगदे

येशूला आखे म्हेमेगदेला मिनदेन येशू स्त्रीष्ट न्हबा १:१-२:२३

बपत्तिस्मा पिन्बा यूहन्नासे लबा गे ३:१-१२

येशूसे बपत्तिसमा किन्बादेन शैतानसे येशूदा फसब लबारी  
 म्हाड्बा ३:१३-४:११

येशूसे गालील अञ्चलरी लबा गे ४:१२-१८:३५

येशू गालील अञ्चलहेन्से यरूशलेम शहरधोना फेपबा १९:१-  
 २०:३४

यरूशलेम शहररी येशूला गे थुम्बा धुड २१:१-२७:६६

येशूदा सिबाग्याम सोना लबादेन हाडला चेलागदेदेन छ्याम हुप  
 तबा २८:१-२०

## मत्तीसे भ्रिबा थार्बा पिन्बा समाचार

येशूला आखे म्हेमे

लूका ३:२३-३८

<sup>1</sup> चुरी भ्रिबा म्हिला मिनगदे येशू स्त्रीष्टला वंशला हिन्ना। येशू  
 स्त्रीष्ट दाऊदला वंशरी न्हबा हिन्ना, ओच्छे दाऊद अब्राहामला  
 वंशरी न्हबा हिन्ना।

<sup>2</sup> अब्राहामला झा इसहाक मुबा,

इसहाकला झा याकूब,  
याकूबला झा यहूदादेन थेला ज्योज्यो आलेगदे मुबा।

3 यहूदाला झा फारेसदेन जाहेर मुबा।

थेनीगदेला आमा तामार मुबा,

फारेसला झा हेस्रोन,

हेस्रोनला झा आराम,

4 आरामला झा अम्मीनादाब,

अम्मीनादाबला झा नहशोन,

नहशोनला झा सल्मोन,

5 सल्मोनला झा बोअज मुबा, थेला आमा राहाब मुबा,

बोअजला झा ओबेद मुबा, थेला आमा रूथ मुबा,

ओबेदला झा यिशै,

6 यिशैला झा दाऊद ग्ले मुबा,

दाऊद ग्लेला सन्तान सोलोमन मुबा, सोलोमनला आमा चा डाच्छा  
उरियाहला मिड मुबा।

7 सोलोमनला झा रहबाम,

रहबामला झा अबिया,

अबियाला झा आश,

8 आशला झा यहोशापात,

यहोशापातला झा यहोराम,

यहोरामला झा उज्जियाह,

9 उज्जियाहला झा योताम,

योतामला झा आहाज,

आहाजला झा हिजकिया,

10 हिजकियाला झा मनश्शे,

मनश्शेला झा आमोन,

आमोनला झा योशियाह,

11 योशियाहला झा यकोनियासदेन थेला आलेगदेला आबा मुबा।  
थेनीगदे यहूदीगदेदा चुड्सी बेबिलोन भिबा ग्लारी भोर्बा  
भन्दा डाच्छान न्हबा मुबा।\*

12 बेबिलोनरी भोर्माहेन्से  
यकोनियासला झा शालतिएल न्हजी,  
ओच्छे शालतिएलला झा यरुबाबेल,

13 यरुबाबेलला झा अबिउद,  
अबिउदला झा एल्याकीम,  
एल्याकीमला झा आजोर,

14 आजोरला झा सादोक,  
सादोकला झा आखिम,  
आखिमला झा एलिउद,

15 एलिउदला झा एलाजार,  
एलाजारला झा मत्तान,  
मत्तानला झा याकूब,

16 याकूबला झा योसेफ मुबा, योसेफसे मरियमदा ब्याह लजी।  
थेनोन मरियमग्याम येशू न्हजी, थेदा जम्मासेन थार्बा पिन्बा ख्रीष्ट  
भिसी भिला।

17 चुहड् लसी अब्राहामहेन्से दाऊदधोना च्युक बलि पुस्ता  
मुबा, थेहड् लसीन दाऊदहेन्से यहूदीगदे बेबिलोनरी भोर्बा धुइधोना  
च्युक बलि पुस्ता मुबा, ओच्छे बेबिलोनरी भोर्बा धुइहेन्से थार्बा  
पिन्बा ख्रीष्ट न्हबा धुइधोना च्युक बलि पुस्ता मुबा।

येशू ख्रीष्ट न्हबा  
लूका २:१-७

18 येशू ख्रीष्ट चुहड् लसी न्हजी, योसेफसे येशूला आमादा ब्याह  
लबारी ह्नीबा मुबा। तर थेनीगदेला ब्याह तबा भन्दा डाच्छान  
मरियम परमेश्वरला आत्माग्याम न्हसेला तबा मुबा।\* 19 तर थेला

\* 1:11 २ राजा २४:१५; २ इति ३६:१०; यर्मि २७:२० \* 1:18 लूका १:२७

हेम्बो योसेफ परमेश्वरला डाच्छा ज्यबा म्हि तबासे लमा थेदा म्हिला ओन्छाडरी पेःना थालगै भिसी खालैसे था आयाड्ना लसी ख्लाबा सेम लजी।

20 चु ताम म्हन्बान लमा योसेफ छुप निजी, जमाहेन्से म्हाडरी थे मुबा ग्लारी परमप्रभुला दूत खसी थेदा “दाऊद ग्लेला सन्तान योसेफ, ए मरियमदेन ब्याह लबारी थालोड्गो। तिग्दा भिसम थे परमेश्वरला आत्माग्याम न्हसेला तबा हिन्ना। 21 थेसे झा गिक न्हला, एसे थेला मिन येशूा थान्गो। तिग्दा भिसम थेसे हाडला म्हिगदेदा थेनीगदेला पापग्याम थाना लला” भिसी भिजी।\*

22 परमप्रभुसे अगमवक्ताग्याम सुड्बा बचन पूरा तगै भिसीन चु जम्मान तबा हिन्ना। 23 “च्यागो, ब्याह आलबा मिडकोला गिक न्हसेला तला ओच्छे थेसे झा न्हला, थेला मिन इम्मानुएल भिसी थान्ना,” इम्मानुएल भिबा चा “परमेश्वर य्हाडदेन छ्याम” भिबा हिन्ना।\*

24 योसेफ छोर्माहेन्से परमप्रभुला दूतसे पाड्बा हड् थेसे मरियमदा ब्याह लजी। 25 तर मरियमसे कोला आन्हतेधोना योसेफ मरियमदेन छ्याम आमहेर्नी। मरियमसे कोला न्हमाहेन्से योसेफसे कोलाला मिन येशू थान्जी।\*

## 2

ज्योतिषीगदे येशूदा झ्याल्बारी खबा

1 हेरोद ग्लेला धुडरी यहूदिया अञ्चलला बेथलेहेम भिबा नाम्सारी येशू न्हजी। जमाहेन्से स्यारला ज्योतिषीगदे यरूशलेमरी खजी, ओच्छे थेनीगदेसे, 2 “यहूदीगदेला ग्ले दोसी न्हबा कोला खानड मुला? तिग्दा भिसम डन्से स्याररी थे न्हजी भिसी उन्बा

† 1:21 “येशू” भिबाला अर्थ चा परमप्रभुसे थाना लला भिबा हिन्ना। \* 1:21 लूका १:३१ \* 1:23 यशै ७:१४ \* 1:25 लूका २:२१

सार म्राड्जी। थेतबासेलमा डनी थेदा झ्याल्बारी खबा हिन्ना” भिसी भिजी।

3 चु ताम थे:माहेन्से हेरोद ग्लेदेन यरूशलेमरी मुबा जम्मान म्हिगदेदा ल्हानान सुर्दा तजी। 4 जमाहेन्से हेरोद ग्लेसे परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदे जम्मादान ग्ला गिकरी ड्योइसी “थार्बा पिन्बा ख्रीष्ट खानड न्हला भिसी पाड्बा मुला?” भिसी ड्योइबा छार्बा लजी। 5 थेनीगदेसे हेरोद ग्लेदा “यहूदियाला बेथलेहेम भिबा नाम्सारी न्हला भिसी पाड्बा मुला, तिग्दा भिसम अगमवक्तासे चुहड् लसी भिबा मुला, 6 ‘यहूदिया अञ्चलरी मुबा बेथलेहेम

नाम्सा जजा मुसैनोन घ्रेन तला,  
तिग्दा भिसम बेथलेहेमग्याम शासन लबा म्हि गिक थोन्ना,  
थेसे डाला म्हि इस्राएलीगदेदा वास्ता लला’ भिसी भिजी।”\*

7 जमाहेन्से हेरोदसे थे ज्योतिषीगदेदा जे सुटुक्क ड्योइसी सार खाइमा म्राड्बा हिन्ना, भिसी ड्योइबा छार्बा लजी। ओच्छे थेनीगदेग्याम सार म्राड्बा धुइ था याड्जी। 8 जमाहेन्से थेसे थेनीगदेदा “निउ, ओच्छे थे कोलादा ज्यना लसी म्हाइगो। थेदा स्यापुमैछ्याम डादा पाड्गो, डाएनोन थेदा झ्याल्बारी निला” भिसी बेथलेहेमरी पुइजी।

9 ग्लेला ताम थे:सी थेनीगदे थेग्याम निजी। थेनीगदेसे डाच्छा स्याररी म्राड्बा सार दो:सी थेनीगदेला डाच्छा डाच्छा निजी, ओच्छे लैनु येशू मुबा ग्लारी धोमाहेन्से थे सार अडेब तजी। 10 थे सार म्राड्माहेन्से थेनीगदे ल्हानान ताड्जी। 11 दिम न्हडरी वाड्मा थेनीगदेसे लैनु येशूदा थेला आमा मरियमदेन छ्याम म्राड्जी, जमाहेन्से थेनीगदेसे येशूदा फ्या लसी हाड हाडला बाकस ठोड्सी म्हर, ज्यबा बास्ना खबा धूपदेन मूर् भिबा महँगो अत्तर

\* 2:6 मीका ५:२

भसी फुल्जी। <sup>12</sup> ओच्छे म्हाडरी परमेश्वरसे थेनीगदेदा हेरोद मुबा ग्लारी थानिउ भिबासे लमा थेनीगदे अर्गुन ग्यामसे हाडला य्हुल्सारी निजी।

लैनु येशूदा मिश्र य्हुल्सारी भोर्बा

<sup>13</sup> ज्योतिषीगदे निमाहेन्से, परमप्रभुला दूत गिक म्हाडरी योसेफ मुबा ग्लारी खजी, ओच्छे थेसे योसेफदा “योसेफ, ए रेःसी लैनु कोलादेन थेला आमामा भोर्सी मिश्र य्हुल्सारी निउ। ओच्छे डाइ एदा दोःसी खउ भिसी आपाड्तेधोना एनीगदे थेरीन चिउ। तिग्दा भिसम हेरोदसे लैनु कोलादा साइबारी म्हाइबा मुला” भिसी भिजी। <sup>14</sup> जमाकुनु म्हुनडनोन रेःसी थेसे लैनु कोलादेन थेला आमामा भोर्सी मिश्र य्हुल्सारी निजी। <sup>15</sup> ओच्छे हेरोद आसितेधोना थेनीगदे थेरीन चिजी। चुहड लसी परमप्रभुसे अगमवक्ताग्याम “डाइ डाला झादा मिश्र य्हुल्साग्याम ड्योइबा मुला” भिसी सुड्बा बचन पूरा तबारी हिन्ना।\*

हेरोद ग्लेसे जजा कोलागदेदा साइपुड्बा

<sup>16</sup> जमाहेन्से हाडदा ज्योतिषीगदेसे झुक्याब लजीम भिबा था याड्सी हेरोद ल्हानान बोमो खजी। ओच्छे थेसे ज्योतिषीगदेग्याम था याड्बा धुइ अन्छार बेथलेहेम नाम्सादेन क्यारक्युर मुबा न्ही दिडधोनाला जम्मान कोलागदेदा साइपुड्जी। <sup>17</sup> जमाहेन्से यर्मिया अगमवक्तासे पाड्बा ताम पूरा तजी,  
<sup>18</sup> “रामा भिबा ग्लारी क्राबा क्रिड्बा लबा थेःजी, राहेल हाडला कोलागदेला लागिरी क्राबान मुबा। थेदा जम्मासेन सम्झब लसैनोन क्राबा आख्लानी। तिग्दा भिसम थेला कोलागदे साइसी जिन्बा मुबा।”\*

योसेफदेन मरियम मिश्र य्हुल्साग्याम दोःबा

\* 2:15 होशे ११:१ \* 2:18 यर्मि ३१:१५

19 ओच्छे हेरोद सिमाहेन्से, मिश्र यहूल्सारी परमप्रभुला दूत गिक म्हाडरी योसेफ मुबा ग्लारी खजी, ओच्छे थेदा स्वर्गदूतसे, 20 “योसेफ, ए रे:सी लैनु कोलादेन थेला आमादा इस्राएल यहूल्सारी भोर्सी निउ। तिग्दा भिसम लैनु कोलादा साइबारी म्हाइबा म्हिगदे जम्मान सिसी जिन्बा मुला” भिसी भिजी।

21 जमाहेन्से थे रे:सी लैनु कोलादेन थेला आमादा इस्राएल यहूल्सारी भोर्सी निजी। 22-23 तर यहूदियारी हेरोदला झा अखिलाउस ग्ले दोबा मुला भिबा थे:सी थेनीगदे थेरी निबारी लोड्जी। थेतबासेलमा दो:सी परमेश्वरसे थेदा म्हाडरी पाड्बा अन्छार गालील अञ्चलला नासरत भिबा नाम्सारी निसी चिजी। चुहड् लसी “थेदा नासरी भिला” भिसी अगमवक्तागदेग्याम पाड्बा ताम पूरा तजी।\*

### 3

बपत्तिस्मा पिन्बा यूहन्नासे थे:ना लबा परमेश्वरला यहूल्साला समाचार

मर्कूस १:१-८; लूका ३:१-१८; यूहन्ना १:१९-२८

1 ल्हानान दिड लिच्छा बपत्तिस्मा पिन्बा यूहन्ना यहूदिया अञ्चलला तोडतोडबा ग्लारी खसी चुहड् भिसी पाड्बारी छ्याइजी, 2 “हाड हाडला पाप ख्लासी परमेश्वरपट्टि दो:गो, तिग्दा भिसम स्वर्गला यहूल्सा खसी जिन्बा मुला।”\* 3 यशैया अगमवक्तासे चुनोन यूहन्नाला बारेरी चुहड् भिसी पाड्बा मुला, “तोडतोडबा ग्लारीक्यार परमप्रभुला ग्याम तयार लउ, ओच्छे ‘परमप्रभु भ्रबाला लागिरी थेला ग्याम सोजो स्होउ,’ भिसी म्हि गिक क्रिड्बा मुला।”\*

\* 2:22-23 लूका २:३९; यहू १:४५

\* 3:2 मत्ती ४:१७; मर्कू १:१५

\* 3:3 यशै ४०:३

4 यूहन्नासे ऊँटला क्राला क्वान् क्वान्मुबा, ओच्छे ढिला पेटी खीमुबा। थेसे तिरीदेन ह्नि सिडसोरला खुदु चमुबा।\* 5 यरूशलेम शहरदेन यहूदिया अञ्चल ओच्छे यर्दन स्योडला क्यारक्युरला जम्मान ग्लाला म्हिगदे थे मुबा ग्लारी खजी। 6 ओच्छे हाड हाडला पाप ख्लासी थेग्याम यर्दन स्योडरी बप्तिस्मा किन्जी।

7 तर फरिसीगदेदेन सदुकीगदे न्हडला ल्हानान म्हिगदे बप्तिस्मा किन्बारी खबान लबा म्राड्सी थेसे थेनीगदेदा “पुखीला कोलागदे, एनीगदेदा परमेश्वरला बोमोग्याम स्योरम्याड्ला भिसी खाल्से भिजी?}\* 8 थेतबासेलमा हाड हाडला पाप ख्लासी परमेश्वरपट्टि दोःबा अन्छारला गे लउ। 9 एनीगदेसे डाला ताम ड्यान्गो, एनीगदेसे ‘डनी अब्राहामला सन्तान हिनना’ भिदेमा परमेश्वरला सजायग्याम स्योरम्याड्ला भिसी थाम्हन्गो। तिग्दा भिसम परमेश्वरसे अब्राहामला लागिरी चु युडबागदेग्यामसेनोन कोलागदे सहोबारी खम्ला।\* 10 च्यागो, दोड थाबारी तरी थीसी जिनबा मुला। थेतबासेलमा ज्यबा रो आरोबा जम्मान दोड टाहेन्सेन थासी मेरी भ्याड्ला।\*

11 “डाइ चा एनीगदेसे हाड हाडला पाप ख्लासी परमेश्वरपट्टि दोःजी भिसी क्युडसे बप्तिस्मा पिन्ना। तर डा भन्दा लिच्छा फेपखबासे एनीगदेदा परमेश्वरला आत्मादेन मेसे बप्तिस्मा पिन्ना। थे डा भन्दा शक्तिशाली मुला। ओच्छे डा थेला लखम पुडबाधोनाला सुतै आरे। 12 ग्वा य्हापबा नाख्ले थेलान छ्यारी मुला, दाहेन्से ग्वा ज्यना लसी य्हापसी ग्वा जति भकारीरी थान्ना ओच्छे पोलोवा जति खाइमै आसिबा मेरी खाड्ला।”

येशूसे बप्तिस्मा किन्बा

मर्कूस १:९-११; लूका ३:२१-२२

\* 3:4 २ राजा १:८ \* 3:7 मत्ती १२:३४; २३:३३ \* 3:9 यूह ८:३३ \* 3:10 मत्ती ७:१९

13 जमाहेन्से येशूएनोन यूहन्ना ग्याम बपत्तिस्मा किन्बारी गालील अञ्चलग्याम यर्दन स्योडरी फेप्खजी। 14 तर यूहन्नासे थेदा “डाइ चा हाडग्याम बपत्तिस्मा किन्तोःबा मुला, तिग्दा हाड चा डा मुबा ग्लारी फेप्खबा?” भिसी रोकब लबारी म्हाइजी।

15 तर येशूसे थेदा “दान्देदा चुह्ङ्गनोन तगै। तिग्दा भिसम परमेश्वरसे म्हन्बा ताम पूरा लबारी य्हाडसे चुह्ङ्गनोन लतोःला” भिसी सुङ्गी। जमाहेन्से यूहन्नासे येशूदा बपत्तिस्मा पिन्जी। 16 ओच्छे येशूसे बपत्तिस्मा किन्सी क्युङ्ग्याम पाखारी थोनमैछ्याम थेसे स्वर्ग ठोङ्गी परमेश्वरला आत्मा ढुकुर हङ् लसी फाप्सी हाडथोरी फेप्खबान लबा म्हाइजी। 17 जमाहेन्से स्वर्गग्याम “चु डाइ सेमहेन्सेन माया लबा डाला झा हिन्ना, चुदा म्हाइसी डा ल्हानान ताड्बा मुला” भिबा काइ खजी।\*

## 4

येशूदा फसब लबारी म्हाइबा

मर्कूस १:१२-१३; लूका ४:१-१३

1 जमाहेन्से परमेश्वरला आत्मासे शैतानग्याम सेम च्याबारी येशूदा तोडतोडबा ग्लारी भोर्जी।\* 2 थेरी बोगल न्ही धिनधोना येशूसे धिन म्हननोन तिगै आसोल्नी। थेतबासेलमा थेदा ल्हानान फोखेन्जी। 3 जमाहेन्से शैतान येशू मुबा ग्लारी खसी “हाड परमेश्वरला झा हिन्सम चु युडबागदेदा गेड दोगो भिसी सुङ्गो” भिसी भिजी।

4 तर येशूसे “गेडसे जे म्हि आसो, तर परमेश्वरला सुङ्ग्याम थोन्बा जम्मान बचनसे सोबारी खम्ला भिसी परमेश्वरला बचनरी भिबा मुला” भिसी सुङ्गी।\*

\* 3:17 भजन २:७; यशै ४२:१; मत्ती १२:१८; १७:५ \* 4:1 हिब्रू २:१८; ४:१५ \* 4:4 वयव ८:३

5 जमाहेन्से शैतानसे येशूदा परमेश्वरला शहर यरूशलेमरी भोर्सी परमेश्वरला मन्दिरला थोबोरी राप्पुड्जी। 6 ओच्छे थेसे येशूदा “हाड परमेश्वरला झा हिन्सम चुग्याम मार छ्योड्गो। तिग्दा भिसम बचनरी चुहड् भिसी भिबा मुला, “परमेश्वरसे हाडदा चुड्बाला लागिरी हाडला स्वर्गदूतगदेदा कुल्ला।

ओच्छे एला काड युडबारी थाठोक्गै भिसी एदा थेनीगदेसे या यारीन ताला’ भिसी भिजी।”\*

7 येशूसे थेदा “बचनरी चुहड् लसी भिबा मुला, ‘एसे हाडला परमप्रभु परमेश्वरला सेम च्याबा गे तिगै थालउ’ ” भिसी सुड्जी।\*

8 दोःसी शैतानसे येशूदा नोबा गड गिकरी भोर्सी जम्बुलिडला जम्मान यहुल्सागदेदेन जम्मान ज्यबा स्हेगदे उन्जी। 9 ओच्छे “हाडसे डादा फ्या लसी तेन्जी भिसम चु जम्मान यहुल्सा डाइ हाडदा पिन्ना” भिसी भिजी।

10 जमाहेन्से येशूसे थेदा “शैतान, ए चुग्याम तुरुन्तन निउ! तिग्दा भिसम बचनरी ‘एसे हाडला परमप्रभु परमेश्वरदा फ्या लउ, ओच्छे थेदा जे तेन्गो’ भिसी भिबा मुला” भिसी सुड्जी।\*

11 जमाहेन्से शैतानसे येशूदा ख्लासी निजी ओच्छे स्वर्गदूतगदे खसी येशूदा क्योड्जी।

येशूसे परमेश्वरला यहुल्साला समाचार थेःना लबा

मर्कूस १:१४-१५; लूका ४:१४-१५

12 यहूहन्ना झ्याल्खानरी परब तजी भिबा थेःसी येशू दोःसी गालील अञ्चलरी फेप्जी।\* 13 ओच्छे नासरत भिबा ग्लारी आफेपना कफर्नहुम शहररी धन्छ्याबारी फेप्जी। चु शहर गालील समुन्द्रला कुनीरी मुबा, चु शहर चा जबूलूनदेन नप्ताली भिबा

\* 4:6 भजन ९१:११-१२ \* 4:7 वयव ६:१६ \* 4:10 वयव ६:१३ \* 4:12 मत्ती १४:३; मर्कू ६:१७; लूका ३:१९-२०

य्हुलला म्हिगदे चिबा जिल्लारी परब तमुबा।\* 14 चुहड् लसी यशैया अगमवक्तासे पाड्बा ताम पूरा तजी,

15 “जबूलूनदेन नप्तालीला जिल्लारी यर्दन क्याम्सड, समुन्द्रला कुनीरी, यर्दन क्याम्सड, गालीलरी चिबा अर्गु य्हुलला म्हिगदे

16 ओच्छे धोपधोपरी चिबा म्हिगदेसे घेन य्हालदा म्राड्बा मुला।\* थेहड् लसीन कालला धोपधोपरी मुबा म्हिगदेला गुडरी थे य्हाल फे:बा मुला।”

17 थे धुइहेनसे येशूसे “एनीगदेसे हाड हाडला पाप ख्लासी परमेश्वरपट्टि दो:गो, तिग्दा भिसम स्वर्गला य्हुल्सा खसी जिन्बा मुला” भिसी म्हिगदेदा सुड्बारी छ्याइजी।

येशूसे डाच्छा स्होबा चेलागदे

मर्कुस १:१६-२०; लूका ५:१-११

18 येशू गालील समुन्द्रला कुनीन कुनी फेपबान लमा पत्रुस भिबा सिमोनदेन थेला आले अन्द्रियासदा तार्डा साइबारी समुन्द्ररी घ्याड क्लाड्बान लबा म्राड्जी। तिग्दा भिसम थेनीगदे तार्डा साइबा म्हिगदे मुबा। 19 येशूसे थेनीगदेदा “डादेन छ्याम भ्रउ, दाहेनसे डाइ एनीगदेदा तार्डा चुड्बा म्हि आहिन, तर म्हिगदेदा परमेश्वर मुबा ग्लारी भबा म्हि स्होला” भिसी सुड्जी। 20 येशूसे थेहड् सुड्मैछ्याम, हाडला घ्याड ख्लासी थेनीगदे येशूदेन छ्याम भ्रजी।

21 थेग्याम फेपबान लमा येशूसे जब्दियाला झागदे याकूबदेन थेला आले यूहननादा म्राड्जी। थेनीगदे हाडला आबादेन छ्याम दोंगारी घ्याड राबान मुबा। येशूसे थेनीगदेदाएनोन ड्योइजी। 22 येशूसे चुहड् सुड्मैछ्याम थेनीगदे दोंगादेन आबादा ख्लासी येशूदेन छ्याम भ्रजी।

\* 4:13 यूह २:१२ \* 4:16 यशै ९:१-२

येशूसे आखम्बा म्हिगदेदा खम्ना लबा

लूका ६:१७-१९

23 येशू गालील अञ्चलला जम्मान ग्लारी फेप्सी यहूदीगदे हुप तबा दिमरी म्हिगदेदा लोप्वान परमेश्वरला यहुल्साला समाचार थेःना लजी। ओच्छे ल्हानान थरीला रोगसे स्यापबादेन आखम्बा म्हिगदेदा खम्ना लजी।\* 24 जमाहेन्से सिरिया यहुल्सा नाडनोन येशूला बारेरी थेःजी। ओच्छे म्हिगदेसे ल्हानान थरीला रोगसे स्याप्सी दुख याड्बागदे, म्हडसे स्यापबागदे, सह म्हडसे स्यापबागदेदेन काड या चलब आतबा कुज्या म्हिगदेदा येशू मुबा ग्लारी भजी। जमाहेन्से येशूसे थेनीगदेदा खम्ना लजी। 25 ओच्छे गालील, डेकापोलिस, यरूशलेम, यहूदियादेन यर्दन क्याम्सडहेन्सेला ल्हानान म्हिगदे येशूदेन छ्याम भजी।

## 5

येशूसे म्हिगदेदा लोप्व

लूका ६:२०-२३

1 ल्हानान म्हिगदे खबा म्राड्सी येशू गडरी फेप्सी धन्छ्याजी। जमाहेन्से चेलागदेएनोन येशूला क्युर्सीन चिजी। 2 ओच्छे येशूसे थेनीगदेदा चुहड् भिसी लोप्वारी छ्याइजी,  
3 “परमेश्वरथोरी जे आश लबागदेसे† परमेश्वरग्याम मोलम याड्ला,  
तिग्दा भिसम स्वर्गला यहुल्सा थेनीगदेलान हिन्ना।  
4 सेम क्राबागदेसे परमेश्वरग्याम मोलम याड्ला  
तिग्दा भिसम थेनीगदेदा परमेश्वरसे ताड्ना लला।\*  
5 सोजो म्हिगदेसे परमेश्वरग्याम मोलम याड्ला,  
तिग्दा भिसम थेनीगदेसे जम्बुलिडला अधिकार याड्ला।\*

\* 4:23 मत्ती ९:३५; मर्कू १:३९ † 5:3 “परमेश्वरथोरी जे आश लबागदेसे” भिबा तामदा ग्रीक बाइबलरी आत्तारी प्राडबो भिसी भिबा मुला। \* 5:4 यशै ६१:२-३

\* 5:5 भजन ३७:११

6 परमेश्वरसे म्हन्बा अन्छार भ्रबारी म्हाइबागदेसे  
परमेश्वरग्याम मोलम याड्ला,

तिग्दा भिसम परमेश्वरसे थेनीगदेदा भड पिनना।\*

7 स्यूहान्दोदा दया लबागदेसे परमेश्वरग्याम मोलम याड्ला,  
तिग्दा भिसम थेनीगदेसे दया याड्ला।

8 ज्यबा सेम थोबागदेसे परमेश्वरग्याम मोलम याड्ला,  
तिग्दा भिसम थेनीगदेसे परमेश्वरदा म्राड्ला।\*

9 स्यूहान्दोदा ठिकना लबागदेसे परमेश्वरग्याम मोलम याड्ला,  
तिग्दा भिसम थेनीगदे परमेश्वरला झा दोला।

10 म्हिगदेसे दुख पिनसैनोन परमेश्वरसे म्हन्बा अन्छार भ्रबागदेसे  
परमेश्वरग्याम मोलम याड्ला,

तिग्दा भिसम स्वर्गला यूहुल्सा थेनीगदेलान हिन्ना।\*

11 “डादा विश्वास लबासे लमा म्हिगदेसे एनीगदेदा खिसी  
लला, दुख पिनना, ओच्छे लुसीला ताम पाड्सी एनीगदेला बिरोधरी  
जम्मान नडबा ताम लमैनोन एनीगदेसे परमेश्वरग्याम मोलम  
याड्ला।\* 12 तसैनोन एनीगदे ल्हानान ताड्गो, तिग्दा भिसम  
स्वर्गरी एनीगदेसे घेन इनाम याड्ला। एनीगदे भन्दा डाच्छाला  
अगमवक्तागदेदाएनोन थेनीगदेसे चुहड् लसीन दुख पिनमुबा।\*

चजा हड् तबा

मर्कूस ९:५०; लूका १४:३४-३५

13 “एनीगदे जम्बुलिडला चजा हड्बान हिन्ना, तर चजाला  
डम्बा सहे म्हाजी भिसम दोःसी तिग्से डम्ना लबा? गे आखेल्बासे  
लमा म्हिसे थेदा भ्याड्ला, जमाहेन्से म्हिसे नाड्सी भ्रला।\*

14 “गडरी मुबा शहरदा जम्मासेन म्राड्बा हड् लसी एनीगदेएनोन  
जम्बुलिडला नाडसल तबासे लमा जम्मासेन म्राड्ला।\*

\* 5:6 यशै ५५:१-२ \* 5:8 भजन २४:३-४ \* 5:10 १ पत्रु ३:१४ \* 5:11 १  
पत्रु ४:१४ \* 5:12 २ इति ३६:१६; मुल ७:५२ \* 5:13 मर्कू ९:५० \* 5:14 यूह  
८:१२; ९:५

15 म्हिगदेसे नाडसल प्रासी फामसे घप्सी आथान, तर दिमरी मुबा जम्मान म्हिगदेसे म्राङ्गै भिसी नोबा ग्लारी थान्ना।\*  
 16 चुहङ् लसी नाडसलसे य्हाल तना लबा हङ् लसी एनीगदेसे ज्यबा गे लसी उन्गो। एनीगदेला गे म्राङ्सी थेनीगदेसे स्वर्गरी धन्छ्याबा एनीगदेला परमेश्वर आबाला जयजयकार लगै।\*

परमेश्वरसे मोशादा पिन्बा ठिम अन्छार भ्रबा

17 “डा परमेश्वरसे मोशादा पिन्बा ठिमदेन अगमवक्तागदेसे पाङ्बा ताम भ्याङ्बारी आहिन, तर थे पूरा लबारी खबा हिन्ना।  
 18 एनीगदेसे डाला ताम ड्यान्गो, तिग्दा भिसम मुदेन जम्बुलिङ नाश आततेधोना परमेश्वरसे मोशादा पिन्बा ठिमरी मुबा हिगी गिकनोन आम्हा।\* 19 थेतबासेलमा जुन म्हिसे ठिमरी मुबा तामगदे न्हडला जम्मान भन्दा जजा तामदा आड्यान्ना म्हिगदेदाएनोन थेहङ्नोन लपुङ्जी भिसम थे म्हि स्वर्गला य्हुल्सारी जम्मान भन्दा जजा तला। तर जुन म्हिसे ठिमरी मुबा तामगदे ड्यान्सी म्हिगदेदा थेहङ्नोन लपुङ्ला थे म्हि स्वर्गला य्हुल्सारी जम्मान भन्दा घेन म्हि तला। 20 एनीगदेसे डाला ताम ड्यान्गो, तिग्दा भिसम एनीगदेसे यहूदी धर्मगुरुगदेदेन फरिसीगदेसे भन्दा ज्यना लसी परमेश्वरसे म्हन्बा अन्छार आलनी भिसम तिगै लसीन एनीगदे स्वर्गला य्हुल्सारी वाङ्आम्याङ्।

बोमो लबारी आत भिसी लोप्बा

21 “एसे म्हि थासाङ्गो, जुन म्हिसे म्हि साइला थेसे सजाय याङ्ला’ भिसी परमेश्वरसे मोशादा पिन्बा ठिमरी भ्रिबा ताम एनीगदेसे थे:बा मुला।\* 22 तर एनीगदेसे डाला ताम ड्यान्गो, जुन म्हिसे खालैदा बोमो लला, थे म्हिसे सजाय याङ्ला, ओच्छे खालैसे

\* 5:15 मर्कु ४:२१; लूका ८:१६; ११:३३ \* 5:16 १ पत्रु २:१२ \* 5:18 लूका १६:१७ \* 5:21 प्रस्था २०:१३; वयव ५:१७

स्यूहान्दोदा हेला लजी भिसम थेदा अदालतरी भोर्ला। तर जुन म्हिसे स्यूहान्दोदा 'ए गे आखेल्बा मूर्ख' भिसी भिला थेदा नर्गला लोड्बा खबा मेरी युला।

23 “थेतबासेलमा परमेश्वरदा भेटी फुल्बा धुइरी एदेन छ्याम खालै म्हि बोमो खबा मुला भिबा ताम एसे ढन्जी भिसम, 24 एला भेटी परमेश्वरला मन्दिररी भेटी फुल्बा ग्लाला डाच्छापट्टि ख्लासी डाच्छा थे म्हिदेन छ्याम ढिक्गो, ओच्छे एसे हाडला भेटी फुल्गो।

25 “एदा मुद्दा युबा म्हिदेन छ्याम अदालतरी निबान लबा धुइरी ग्यामरीन ढिक्गो। आहिन्सम थेसे एदा न्यायाधीशला यारी जिम्मा पिन्ना, ओच्छे न्यायाधीशसे सिपाहीगदला यारी जिम्मा पिन्ना। जमाहेनसे ए झ्याल्खानरी परब तला। 26 एसे डाला सतय ताम ड्यानगो, एसे जम्मान टाडगा आफातेधोना थेग्याम थोन्बारी आम्योड्।

सेमरी म्हन्बा नइबा ताम

27 “परमेश्वरसे मोशादा पिन्बा ठिमरी चुहड् भिसी भिबा तामएनोन एनीगदेसे थेःबा मुला, 'ए स्यूहान्दोला म्रिडदेन छ्याम ब्रेल्सी थाभ्रउ।’\* 28 तर एनीगदेसे डाला ताम ड्यानगो, जुन म्हिसे खालै म्रिडम्हेमेदा नइबा सेमसे च्याला थेसे सेमरी थे म्रिडम्हेमेदेन छ्याम ब्रेल्सी जिन्बा तला। 29 चुदे एला दाहिने मीसे पाप लपुड्जी भिसम थे मी तेःसी भ्याड्गो। तिग्दा भिसम एला पूरान लहुइ नर्गरी निबा भन्दा मी गिक तेःसी भ्याड्बान एला लागिरी ज्यबा तला।\* 30 थेहड् लसीन एदा दाहिने यासे पाप लपुड्जी भिसम थे या थासी भ्याड्गो। तिग्दा भिसम एला पूरान लहुइ नर्गरी निबा भन्दा एला या गिक थासी भ्याड्बान एला लागिरी ज्यबा तला।\*

\* 5:27 प्रस्था २०:१४; वयव ५:१८

\* 5:29 मत्ती १८:९; मर्कू ९:४७

\* 5:30 मत्ती १८:८; मर्कू ९:४३

## छोडपत्र

मर्कूस १०:११-१२; लूका १६:१८

31 “परमेश्वरसे मोशादा पिन्बा ठिमरी चुहड् भिसी भिबा तामएनोन एनीगदेसे थे:बा मुला, ‘जुन म्हिसे मिड खलाला थे म्हिसे छोडपत्रला कागज भिसी पिन्गै।’\* 32 तर एनीगदेसे डाला ताम ड्यानगो, जुन म्हिसे हाडला मिडदा स्य्हानदोदेन छ्याम ब्रेल्सी आभ्रसैनोन खलाला, थेसे हाडला मिडदा स्य्हानदोदेन छ्याम ब्रेल्सी भ्रबा मिडम्हेमे सहोला। ओच्छे थे मिडम्हेमेदेन छ्याम जुन म्हिसे ब्याह लला थेएनोन ब्रेल्सी भ्रबा तला।\* ”

## घान थाफागो

33 “परमेश्वरसे मोशादा पिन्बा ठिमरी चुहड् भिसी भिबा तामएनोन एनीगदेसे थे:बा मुला, ‘एसे लुसीला ताम लसी घान थाफागो, ओच्छे परमेश्वरदेन छ्याम लबा कबुल पूरा लउ।’\* 34-35 तर एनीगदेसे डाला ताम ड्यानगो, एनीगदेसे घान भिबा फानोन थाफागो, स्वर्गला मिनरी तसै, जम्बुलिडला मिनरी तसै एनीगदेसे घान थाफागो। तिग्दा भिसम स्वर्ग परमेश्वर धन्छ्याबा ग्ला हिन्ना ओच्छे जम्बुलिड परमेश्वरला स्य्हाप न्हे:बा ग्ला हिन्ना, ओच्छे यरूशलेम शहर चा जम्मालान ग्ले परमेश्वरला शहर हिन्ना।\* 36 ओच्छे हाडला थोबोरी या थान्सी घान थाफागो। तिग्दा भिसम एसे क्रा गिकदाएनोन म्लाड अथवा तार तना लबारी आखम। 37 थेतबासेलमा एनीगदेसे पाड्बा ताम चा ‘हिन्ना’ भिसम ‘हिन्ना,’ ‘आहिन’ भिसम ‘आहिन’ जे तगै। थे भन्दा ल्हाना ताम चा शैतानग्याम खबा हिन्ना। ”

\* 5:31 व्यव २४:१-४; मत्ती १९:७; मर्कूस १०:४ \* 5:32 मत्ती १९:९; १ कोर ७:१०-११

\* 5:33 लेवी १९:१२; गन्ती ३०:२; व्यव २३:२१ \* 5:34-35 याकू ५:१२; यशै ६६:१; मत्ती २३:२२; भजन ४८:२

बदला थाकिनगो

लूका ६:२७-३६

38 “परमेश्वरसे मोशादा पिन्बा ठिमरी चुहड् भिसी भिबा तामएनोन एनीगदेसे थे:बा मुला, ‘मीला बदला मी, ओचछे स्वाला बदला स्वा किन्गो।’\* 39 तर एनीगदेसे डाला ताम ड्यान्गो, एनीगदेदा बिरोध लबागदेदा एनीगदेसे बदला थाकिनगो। बरु खालैसे एला दाहिने ग्रम्बारी तोजी भिसम अर्गुपट्टिला ग्रम्बाएनोन तासी पिन्गो। 40 खालै म्हिसे एदा बिरोध लसी मुद्दा लमा अदालतसे थेदा एला सहूर्दम पिन्गो भिजी भिसम थेदा एसे घएनोन पिन्गो। 41 चुदे खालै म्हिसे एदा कोस गिकधोना भ्रउ भिसी कर लजी भिसम थेदेन छ्याम कोस न्हीधोना निउ। 42 खालैसे एदा हीजी भिसम पिन्गो ओचछे एदा छे हीबा म्हिदाएनोन छे पिन्गो।

शत्रुदाएनोन माया लतो:बा

लूका ६:२७-२८, ३२-३६

43 “परमेश्वरसे मोशादा पिन्बा ठिमरी चुहड् भिसी भिबा तामएनोन एनीगदेसे थे:बा मुला, ‘एसे हाडला खिमजेमदा माया लउ, ओचछे शत्रुदा हेला लउ।’\* 44 तर एनीगदेसे डाला ताम ड्यान्गो, एनीगदेसे हाडला शत्रुगदेदा माया लउ, ओचछे एनीगदेदा दुख पिन्बागदेला लागिरी प्रार्थना लउ। 45 चुहड् लजी भिसम एनीगदे स्वर्गरी धन्छ्याबा परमेश्वर आबाला कोलागदे दोला। परमेश्वरसे ज्यबा सेम थोबादेन नइबा सेम थोबा न्हीलान लागिरी धिनी फेना लबा मुला। ओचछे परमेश्वरला डाच्छापट्टि ज्यबा गे लबा म्हिदेन आज्यबा गे लबा म्हि न्हीलान लागिरी नाम ताइना लबा मुला। 46 चुदे एनीगदेदा माया लबादा जे एनीगदेसे माया लजी भिसम एनीगदेसे खाहड् लसी इनाम याडला? थेहड् मी तिरो दुइबा म्हिगदेसेनोन आल? लमुला। 47 एनीगदेसे हाडला

\* 5:38 प्रसथा २१:२४; लेवी २४:२०; वयव १९:२१ \* 5:43 लेवी १९:१८

ज्योज्यो आलेगदेदा जे मान लजी भिसम स्य्हान्दोगदेसे भन्दा ज्यबा तिग लजी? थेहङ् मी अर्गु यहुलला म्हिगदेसेनोन आल? लमुला। 48 थेतबासेलमा एनीगदेला स्वर्गरी धन्छ्याबा परमेश्वर आबा खाहङ्बा मुला, एनीगदेएनोन थेहङ्बान दोगो।”\*

## 6

### एसे सुटुकक पिन्गो

1 “एनीगदेसे लबा ज्यबा गेगदे म्हिगदेदा उन्बाला लागिरी भिसी थालउ। थेहङ् लजी भिसम स्वर्गरी धन्छ्याबा एनीगदेला परमेश्वर आबासे एनीगदेदा तिगै इनाम आपिन। थेतबासेलमा होशियार तसी चिउ।”\*

2 “एनीगदेसे प्राडबोगदेदा पिन्बा धुइरी कप्टीगदेसे हङ् लसी म्हिगदेदा थेःना लसी थाभ्रउ। तिग्दा भिसम थेनीगदे म्हिगदेसे मान लगै भिसी यहूदीगदे हुप तबा दिमगदेदेन ग्यामरीक्यार निसी स्य्हान्दोदा थेःना लसी भ्रमुला। च्यागो, एनीगदेसे डाला ताम इयान्गो, थेनीगदेसे याङ्तोःबा इनाम याङ्सी जिन्बा मुला। 3 तर एसे प्राडबोगदेदा पिन्बा धुइरी एला दाहिने यासे तिग लबान मुला थे ताम एला देब्रे यासेनोन था थायाङ्गै। 4 थेतबासेलमा एसे प्राडबोगदेदा पिन्बा स्हे खालैदा था आतगै। थेहङ् लजी भिसम खालैसे था आयाङ्बा तामएनोन था याङ्बा परमेश्वर आबासे एदा इनाम पिन्ना।

### येशूसे प्रार्थनाला बारेरी लोप्बा

#### लूका ११:२-४

5 “थेतबासेलमा एसे प्रार्थना लबा धुइरी कप्टीगदेसे हङ् लसी थालउ। तिग्दा भिसम थेहङ्बा म्हिगदेसे म्हिगदेदा उन्बाला लागिरी यहूदीगदे हुप तबा दिमगदेदेन ग्यामला कुनीरीक्यार राप्सी

\* 5:48 लेवी १९:२; वयव १८:१३ \* 6:1 मत्ती २३:५

प्रार्थना लबारी सेम लमुला। च्यागो, एनीगदेसे डाला ताम ड्यानगो, थेहड्बा म्हिगदेसे याड्तोःबा इनाम याड्सी जिन्बा मुला।\* 6 तर ए प्रार्थना लबा धुडरी कोठा न्हडरी वाड्सी प्राप दुड्गो, ओच्छे खालैसे आम्राड्बा ग्लारी धन्छ्याबा परमेश्वर आबादेन छ्याम प्रार्थना लउ। जमाहेन्से खालैसे आम्राड्बा तामएनोन म्राड्बा परमेश्वर आबासे एदा इनाम पिन्ना। 7 ओच्छे प्रार्थना लमा अर्गु यहुलला म्हिगदेसे हड् लसी ओहड्दोन थाक्रिड्गो। तिग्दा भिसम हेड्बा हेड्बा प्रार्थना लजी भिसम परमेश्वरसे थेःमुला भिसी थेनीगदेसे म्हन्मुला। 8 थेतबासेलमा एनीगदे थेनीगदे हड्बा थादोगो। तिग्दा भिसम एनीगदेसे ह्रीबा भन्दा डाच्छान एनीगदेदा तिग तिग स्हे तोःबा मुला, थे एनीगदेला परमेश्वर आबादा था मुला।

9 “तर एनीगदेसे चा चुहड् लसी प्रार्थना लउ, ‘स्वर्गरी धन्छ्याबा डन्ना परमेश्वर आबा, हाडदां जम्मासेन मान लगै।

10 ओच्छे जम्मानथोरी हाडला शासन खगै, ओच्छे हाडसे म्हन्बा ताम स्वर्गरी पूरा तबा हड्दोन चु जम्बुलिडरीनोन पूरा तगै।

11 डन्से धिन धिननोन चतोःबा स्हे डन्दा तिनी पिन्गो।

12 डन्से डन्दा बिरोध लसी पाप लबागदेदा माफ लबा हड् लसी हाडसेनोन डन्ना पाप माफ लसी पिन्गो।

13 ओच्छे डन्दा पापरी फसब तबा ग्यामरी भ्रआपुड्गो, तर शैतानग्याम फेसी थान्गो। हाडला यहुल्सादेन शक्ति ओच्छे हाडला मान

\* 6:5 लूका १८:१०-१४ † 6:9 चु पदरी ग्रीक बाइबलरी “हाडला छानदा मान लगै” भिसी भिबा मुला। तर मुल अर्थ चा परमेश्वरदा मान तगै भिबा हिन्ना।

सदनना लागिरी ह्वाडलान हिन्ना, आमेन।<sup>†</sup>

14 “एनीगदेदा बिरोध लसी पाप लबागदेदा एनीगदेसे माफ लजी भिसम स्वर्गरी धनछ्याबा परमेश्वर आबासेनोन एनीगदेदा माफ लला।\* 15 तर एनीगदेसे म्हिगदेदा माफ आलनी भिसम परमेश्वर आबासेनोन एनीगदेदा माफ आल।

फोइथान चिसी प्रार्थना लबा

16 “एनीगदेसे फोइथान चिसी प्रार्थना लबा धुइरी कप्टी म्हिगदेसे ह्ङ् लसी ली धोपधोप लसी थाभ्रड। तिग्दा भिसम थेनीगदेसे फोइथान चिसी प्रार्थना लबा म्हिगदेसे म्नाङ्गै भिसी ली धोपधोप लसी भ्रमुला। थेतबासेलमा एनीगदेसे डाला ताम ड्यानगो, थेनीगदेसे याडतोःबा इनाम याड्सी जिन्बा मुला। 17 तर एनीगदेसे चा फोइथान चिसी प्रार्थना लबा धुइरी ली खुसी थोबोरी छ्युगु फोर्गो। 18 ओच्छे ए फोइथान चिसी प्रार्थना लबा म्हिगदेसे आहिन, तर खालैसे आम्राङ्बा ग्लारी धनछ्याबा परमेश्वर आबासे म्नाङ्गै। ओच्छे खालैसे आम्राङ्बा तामएनोन म्नाङ्बा परमेश्वर आबासे एदा इनाम पिन्ना।

ह्वाडला लागिरी स्वर्गरी धन सम्पत्ति सोसी थान्गो

लूका ११:३४-३६; १२:३३-३४; १६:१३

19 “ह्वाडला लागिरी जम्बुलिडरी धन सम्पत्ति सोसी थाथान्गो, तिग्दा भिसम जम्बुलिडला धन सम्पत्तिगदे बुलुडदेन खियासे चला, ओच्छे दिम फोसी य्होगदेसे य्हो लसी भोर्ला।\* 20 बरु ह्वाडला लागिरी स्वर्गरी धन सम्पत्ति सोसी थान्गो। तिग्दा भिसम थेरी बुलुडसेएनोन आच खियासेएनोन आच, ओच्छे य्होसेएनोन

† 6:13 “ह्वाडला य्हुल्सादेन शक्ति ओच्छे ह्वाडला मान सदनना लागिरी ह्वाडलान हिन्ना, आमेन।” चु पदला ताम चा लहानान ह्ङ्बा ग्रीक बाइबलरी भिबा अरे। \* 6:14 मर्कु ११:२५-२६ \* 6:19 याकू ५:२-३

वाङ्सी यूहो आल। <sup>21</sup> तिग्दा भिसम जुन ग्लारी एनीगदेला धन सम्पत्ति मुला, एनीगदेला सेमएनोन थेरीन तला।

<sup>22</sup> “मी लहुडला लागिरी नाडसल हड्बान हिन्ना। थेतबासेलमा एला मी ज्यबा मुसम एसे ज्यना लसी म्राड्ला, <sup>23</sup> तर एला मी न्होङ्जी भिसम एसे तिगै आम्राड्। थेहड् लसीन एला सेमला नाडसल सिजी भिसम एला लागिरी जम्मान धोपधोप तला। <sup>24</sup> “खालैसेनोन मालिक न्हीला गे लबारी आखम। तिग्दा भिसम थेसे गिकदा हेला लला, ओच्छे स्य्हान्दोदा माया लला। अथवा थेसे गिकसे भिबा ताम ड्यानना, ओच्छे स्य्हान्दोदा वास्तान आल। थेहड् लसीन एनीगदेसेनोन परमेश्वरदेन धन सम्पत्ति न्हीलान गे लबारी आखम।

### धन्दा सुर्दा थालउ लूका १२:२२-३१

<sup>25</sup> “थेतबासेलमा एनीगदेसे डाला ताम ड्यानगो, सोबाला लागिरी तिग चसे तिग थुड्से ओच्छे तिग क्वान्से भिसी धन्दा सुर्दा थालउ। तिग्दा भिसम चबा थुड्बादेन क्वान्बा भन्दा एनीगदेला प्राणदेन लहुड घेन आहिन? <sup>26</sup> मुरी चरागदेदा च्यागो, थेनीगदेसे न्ह ब्लु ढ्वला, न्ह बाली दुइसी पोप लला, तर स्वर्गरी धन्छ्याबा एनीगदेला परमेश्वर आबासेन थेनीगदेदा ख्वामुला। चरागदे भन्दा मी एनीगदे घेन आहिन? <sup>27</sup> एनीगदे न्हडला खालैसे धन्दा सुर्दा लसी छिन्नडला लागिरी आयू काप्खम्ला?

<sup>28</sup> “तिग्दा एनीगदेसे क्वान्ना लागिरी धन्दा सुर्दा लबा? हिरी सार्बा म्हेन्दोदा च्यागो, थेसे गेएनोन आलमुला, क्वानएनोन आरामुला। तसैनोन थे खाहड् लसी ल्हेमुला! <sup>29</sup> एनीगदेसे डाला ताम ड्यानगो, सोलोमन ग्लेदेन ल्हानान धन सम्पत्ति मुसैनोन थेसे क्वान्बा क्वान थे म्हेन्दोगदे न्हडला गिक तेबै जेबा

आरेमुबा।\* 30 तिनी ल्हेबान निसी न्हडगर खर्माहेन्से मेरी फर्बा छेदा मी परमेश्वरसे चुहड् लसी जेना लमुला भिसम झन एनीगदेदा परमेश्वरसे जेना आल? खाइ एनीगदेला विश्वास? 31 थेतबासेलमा 'तिग चसे? तिग थुड्से? ओच्छे तिग क्वान्से?' भिसी धन्दा सुर्दा थालउ। 32 तिग्दा भिसम परमेश्वरदा डोआसेबा अर्गु यहुलला म्हिगदेसे चा चु जम्मान सहे म्हाइमुला। तर स्वर्गरी धन्छ्याबा परमेश्वर आबासे एनीगदेदा चु जम्मान सहे तोःला भिसी था मुला। 33 थेतबासेलमा डाच्छा एनीगदेसे परमेश्वरला यहुल्सा म्हाइगो ओच्छे थेसे म्हन्बा अन्छार गे लउ। जमाहेन्से परमेश्वरसे एनीगदेदा चु जम्मान सहे पिन्ना। 34 थेतबासेलमा न्हडगरला लागिरी धन्दा सुर्दा थालउ। तिग्दा भिसम न्हडगरदा तोःबा सहे न्हडगरनोन याड्ला। तिनीला लागिरी तिनीलान दुख मुला।

## 7

स्य्हान्दोदा दोष थालउ

लूका ६:३७-३८, ४१-४२

1 “स्य्हान्दोदा दोष लसी थाभ्रउ ओच्छे परमेश्वरसेनोन एनीगदेदा दोष आल। 2 तिग्दा भिसम एनीगदेसे खाहड् लसी स्य्हान्दोदा दोष लला, थेहड् लसीन एनीगदेदाएनोन दोष लला। ओच्छे एनीगदेसे जुन दप्बा सहेसे दप्सी पिन्ना, परमेश्वरसेनोन एनीगदेदा थेनोन दप्बा सहेसे दप्सी पिन्ना।\*

3 “स्य्हान्दोला गोरी सेः भ्रबा म्राड्बा म्हिसे हाडला गोरी मुइ भ्रबा तिग्दा आम्राड्बा? 4 हाडला गोरी म्हुइ भ्रबा आम्राड्बासे खाहड् लसी आलेदा 'खाइ एला गोला सेः तेःसी पिन्ना भिसी भिखम्ला?'† 5 कप्टी, डाच्छा हाडला गोला मुइ तेःगो, ओच्छे

\* 6:29 १ राजा १०:४-७; २ इति ९:३-६ \* 7:2 मर्कू ४:२४ † 7:4 “हाडला गोरी भ्रबा मुइ भिबादेन आलेला गोरी मुबा सेः” भिबा तामदा ग्रीक बाइबलरी “हाडला मीरी मुबा मूढादा वास्ता आलना हाडला आलेला मीरी मुबा धुलु तेःसी पिन्ना भिसी” भ्रिबा मुला।

जे एसे आलेला गोरी भ्रबा से: ते:बारी खम्ला।

6 “परमेश्वरदा फुलतो:बा सहे नगीदा थापिन्गो, तिग्दा भिसम थेसे एदा खाप्बारी खला। ओच्छे हाडला मोती ढ्वला डाच्छापट्टि थाभ्याङ्गो। तिग्दा भिसम थेसे मोती नाङ्सी भ्रला।

प्रार्थना लबारी आँट पिन्बा

लूका ११:९-१३

7 “एनीगदेसे हीसम पिन्ना म्हाइसम स्याप्ला ओच्छे म्रापरी ढ्वक ढ्वक लसम एनीगदेला लागिरी म्राप ठोङ्सी पिन्ना। 8 तिग्दा भिसम जुन म्हिसे हीला थेदा पिन्ना, ओच्छे जुन म्हिसे म्हाइला थेसे स्याप्ला ओच्छे जुन म्हिसे म्रापरी ढ्वाक ढ्वाक लला थेदा म्राप ठोङ्सी पिन्ना।

9 “एनीगदे न्हडला खालैसे हाडला कोलासे गेड हीमा थेदा युडबा पिन्ना? 10 खाइमै तार्डा हीमा थेदा पुख्री पिन्ना? 11 एनीगदे पापी तसीनोन हाडला कोलागदेदा ज्यबा सहे पिन्बारी सेमुला भिसम स्वर्गरी मुबा एनीगदेला परमेश्वर आबासे गाते ल्हाना ज्यबा सहे पिन्ना। 12 एनीगदेदा स्य्हानदो म्हिगदेसे जस्तो व्यवहार लगै भिसी म्हन्बा मुला एनीगदेसेनोन थेनीगदेदा थेहड्बान व्यवहार लउ। तिग्दा भिसम परमेश्वरसे मोशादा पिन्बा ठिमरी मुबादेन अगमवक्तासे लोप्बा मुल ताम चुनोन हिन्ना।\*

साडरो म्रापदेन घेन म्राप

लूका १३:२४

13 “एनीगदे साडरो म्रापग्याम वाङ्गो। तिग्दा भिसम घेन म्रापग्याम वाङ्बारी सजिलो मी मुला तसैनोन थे म्रापग्याम नाश तबा ग्लारी धोमुला। चु म्रापग्याम वाङ्बा म्हिगदे चा ल्हानान मुला। 14 तर साडरो म्रापदेन जजाबा ग्यामसे भ्रमा जुकजुकधोनाला जुनी याङ्मुला। तसैनोन चु ग्यामरी भ्रबा म्हिगदे ल्हाना आरे।

\* 7:12 लूका ६:३१

ज्यबा दोडदेन आज्यबा दोडला रो  
लूका ६:४३-४४; १३:२५-२७

15 “फट्टा अगमवक्तागदे म्राड्सी होशियार तसी चिउ, थेनीगदे एनीगदे मुबा ग्लारी ग्यु हड् लसी खमुला, तर थेनीगदेला सेम चा लोड्बा खबा फार्बा हड्बान तमुला। 16 एनीगदेसे रो च्यासी दोड डोसेबा हड् लसी थेनीगदे खाहड्बा म्हि हिन्ना भिबा ताम थेनीगदेला गेग्यामसेन डोसेला। पुजुला दोडग्याम अडगुर आथु ओच्छे देस्यला दोडग्यामनोन अज्जीर आथु। 17 थेहड् लसीन जम्मान ज्यबा दोडरी ज्यबान रो रोला। ओच्छे आज्यबा दोडरी आज्यबान रो रोला। 18 ओच्छे ज्यबा दोडरी आज्यबा रो आरो ओच्छे आज्यबा दोडरीनोन ज्यबा रो आरो। 19 आज्यबा रो रोबा जम्मान दोड थासी मेरी फर्ला।\* 20 चुहड् लसीन थे अगमवक्तागदे खाहड्बा म्हि हिन्ना भिबा ताम एनीगदेसे थेनीगदेला गेग्यामसेन डोसेखम्ला।\*

21 “डादा ‘प्रभु, प्रभु’ जे भिबा म्हिगदे स्वर्गला यहुल्सारी वाड्बारी आम्याड्। तर स्वर्गरी धन्छ्याबा डाला आबासे कुल्बा ताम ड्यान्बा म्हि जे वाड्म्याड्ला। 22 जमा धुइरी ल्हानान म्हिसे डादा ‘प्रभु, डन्से हाडला अधिकारग्याम परमेश्वरला ताम पाड्बा आहिन? ओच्छे हाडला अधिकारग्याम डन्से म्हडगदे ताप्बा आहिन? थेहड् लसीन डन्से हाडला अधिकारग्याम ल्हानान उदेकला गेगदे लबा आहिन?’ भिसी भिला। 23 जमा डाड थेनीगदेदा ‘एनीगदेदा डाड खाइमै डोसेबा आरे। पाप गे लबा म्हिगदे, एनीगदे डा मुबा ग्लाग्याम निउ’ भिसी पाड्ला।\*

बुद्धि मुबा म्हिदेन मूर्ख म्हिसे सहोबा दिम  
लूका ६:४७-४९

\* 7:19 मत्ती ३:१०; लूका ३:९ \* 7:20 मत्ती १२:३३ \* 7:23 भजन ६:८

24 “थेतबासेलमा जुन म्हिसे डाइ पाड्बा ताम ड्यान्सी थे अन्छार भ्रला, थे म्हि चा दिम स्होमा नुपना जग ख्वसी स्होबा बुद्धि मुबा म्हि हड्बान हिन्ना। 25 बुद्धि मुबा म्हिसे दिम स्होमा नुपना जग ख्वसी स्होबासे लमा लाबालुडसरदेन भाल बाढी खसी थे दिमरी टसैनोन थे दिम आफुपनी। 26 तर जुन म्हिसे डाइ पाड्बा ताम थेःसी थे अन्छार गे आल, थे म्हि चा दिम स्होमा नुपना जग आख्वना स्होबा बुद्धि आरेबा मूर्ख म्हि हड्बान हिन्ना। 27 बुद्धि आरेबा मूर्ख म्हिसे दिम स्होमा नुपना जग आख्वना स्होला। तर लाबालुडसरदेन भाल बाढी खसी थे दिमरी टजी भिसम थे दिम फुप्सी ल्हानान नोकसान तला।”

28 येशूसे चु ताम सुड्सी जिन्माहेन्से थेरी मुबा म्हिगदे येशूसे लोपबा म्राड्सी उदेक तजी। 29 तिग्दा भिसम येशूसे थेनीगदेला यहूदी धर्मगुरुगदेसे लोपबा हड् लसी आहिन, तर अधिकार मुबा म्हिसे हड् लसी लोपबा मुबा।\*

## 8

येशूसे कोरे खबा म्हिदा खमना लबा

मर्कूस १:४०-४५; लूका ५:१२-१६

1 येशू गड्ग्याम मार फेपखमाहेन्से ल्हानान म्हिगदे येशूदेन छ्याम भ्रबारी छ्याइजी। 2 थेनोन धुइरी कोरे खबा म्हि गिक येशूला डामरी खसी येशूदा फ्या लजी। ओच्छे “प्रभु, हाडला सेम मुसम हाडसे डादा खमना लखम्ला” भिसी भिजी।

3 जमाहेन्से येशूसे थेदा थुर्सी “ए खमगै भिबा डाला सेम मुला, ए खमगो” भिसी सुड्मैछ्याम थेला कोरे महाजी। 4 ओच्छे येशूसे थेदा “एसे चु ताम खालैदा थापाड्गो। बरु ए निसी परमेश्वरला मन्दिररी पूजा लबा म्हिदा उन्गो। ओच्छे मोशासे कुल्बा अन्छार

\* 7:29 मर्क १:२२; लूका ४:३२

बलि फुल्गो। थेहड् लजी भिसम म्हिगदेसे ए खम्जी भिसी था याङ्ला” भिसी सुङ्जी।\*

येशूसे कप्तानना नोकरदा खम्ना लबा  
लूका ७:१-१०

<sup>५</sup> येशू कफर्नहुम शहररी फेप्खमा रोमी कप्तान गिक खसी,  
<sup>६</sup> “प्रभु, डाला नोकर काड या चलब आतना सहू खसी थलारी मुला”  
भिसी बिनती लजी।

<sup>७</sup> जमाहेन्से येशूसे कप्तानदा “डा खसी थेदा खम्ना लला” भिसी  
सुङ्जी।

<sup>८</sup> तर कप्तानसे येशूदा “प्रभु, हाड डाला दिमरी फेप्खबाधोनाला  
डा आरे। थेतबासेलमा हाडसे चुग्यामसेन खम्गै भिसी सुङ्जे  
सुडुसैनोन डाला नोकर खम्ला। <sup>९</sup> तिग्दा भिसम डाएनोन डाला  
हाकिमला तहरी चिबा म्हि हिन्ना। डाला तहरीनोन सिपाहीगदे  
मुला। डाइ कोइदा निउ भिमा निमुला, कोइदा खउ भिमा खमुला।  
ओचछे डाला नोकरदा डाइ चुहड् लउ भिमा थेसे थेहड् नोन लमुला”  
भिसी भिजी।

<sup>१०</sup> चु ताम थे:सी येशू उदेक तसी हाडदेन छ्याम भ्रबा म्हिगदेदा  
चुहड् भिसी सुङ्जी, “च्यागो, एनीगदेसे डाला ताम ड्यान्गो,  
इस्नाएल यहुल्साला म्हिगदे न्हडरीनोन डाइ चुहड् बा घेन विश्वास  
मुबा म्हि आस्यापनी। <sup>११</sup> च्यागो, एनीगदेसे डाला ताम ड्यान्गो,  
स्यारदेन ल्हो जम्मान ग्लाग्याम अर्गु यहुलला ल्हानान म्हिगदे  
खला। ओचछे अब्राहाम, इसहाक, याकूबदेन छ्यामनोन स्वर्गला  
यहुल्सारी भोज चबारी चिला।\* <sup>१२</sup> तर स्वर्गला यहुल्सारी चितो:बा  
ल्हानान इस्नाएल यहुल्साला म्हिगदे चा मडग्यार धोपधोपबा  
ग्लारी भ्याङ्ला। थेरी क्राबा क्रिड्बा लसी स्वा क्रेला।”\*

\* ४:४ लेवी १४:१-३२  
लूका १३:२८

\* ४:११ लूका १३:२९

\* ४:१२ मत्ती २२:१३; २५:३०;

13 जमाहेन्से येशूसे थे कप्तानदा “ए निउ, एसे विश्वास लबा ह्ङ्गोन तगै” भिसी सुङ्गी। चुहङ् सुङ्बा धुइरीन थे नोकर खम्जी।

येशूसे आखम्बा म्हिगदेदा खम्ना लबा

मर्कुस १:२९-३४; लूका ४:३८-४१

14 येशू पत्रुसला दिमरी धोखमाहेन्से पत्रुसला स्युमी छवा खसी म्हेर्सी चिबा म्नाङ्गी। 15 चु म्नाङ्गी येशूसे थेला यारी थुर्जी, ओच्छे थेला छवा म्हाजी। जमाहेन्से थे रे:सी येशूदा क्योङ्बारी छ्याङ्गी।

16 धिनी घल्माहेन्से म्हिगदेसे म्हडसे स्यापबा म्हिगदेदा येशू मुबा ग्लारी भजी। जमाहेन्से येशूसे म्हडदा बङ्सी थे म्हिगदेला ल्हुङ्ग्याम ताप्जी। ओच्छे थेरी मुबा जम्मान आखम्बा म्हिगदेदा खम्ना लजी। 17 येशूसे चुहङ् लबासे लमा यशैया अगमवक्तासे पाङ्बा ताम पूरा तजी। यशैया अगमवक्तासे,

“य्हाडसे नातो:बा दुख थेसेन नाजी

ओच्छे य्हाडला आखम्बागदेएनोन खम्ना लजी”

भिसी पाङ्बा मुबा।\*

येशूला लागिरी नातो:बा दुख

लूका ९:५७-६२

18 येशूसे ह्हाडला क्युर्सीन ल्हानान म्हिगदे म्नाङ्गी “य्हाड समुन्द्रला क्याम्सडपट्टि निङ्” भिसी सुङ्गी। 19 थे धुइरी यहूदी धर्मगुरु गिक खसी येशूदा “गुरु, ह्हाड खानडदमान फेप्सै डाएनोन ह्हाडदेन छ्याम निला” भिसी भिजी। 20 जमाहेन्से येशूसे थेदा “च्यागो, ल्हुन्दीगदे चिबारी ऊ मुला, ओच्छे चरागदे चिबारीनोन जड मुला। तर परमेश्वरसे पुइखबा महिला मी बल्पबा न्हबा ग्ला सुत्तै आरे” भिसी सुङ्गी।

\* 8:17 यशै ५३:४

21 स्यूहान्दो चेला गिकसे येशूदा “प्रभु, डाच्छा डाला सिबा आबादा ल्हुसी हाड्देन छ्याम भ्रला” भिसी भिमा, 22 येशूसे थेदा “सिबागदेदा सिबागदे हड्बासेन ल्हुगै, तर ए चा डादेन छ्याम भ्रउ” भिसी सुङ्जी।

येशूसे घेन लाबालुडसर म्हाना लबा

मर्कूस ४:३५-४१; लूका ८:२२-२५

23 जमाहेन्से येशू दोंगारी क्रे:जी, ओच्छे थेला चेलागदेएनोन थेदेन छ्यामनोन निजी। 24 निबान लमा तिक्खुरीन समुन्द्ररी घेन लाबालुडसर खजी। ओच्छे समुन्द्ररी छाल रे:सी छालसे दोंगा प्लिड्बारी छ्याइजी। तर थे धुइरी येशू चा सहिम्बा मुबा। 25 जमाहेन्से चेलागदे खसी “प्रभु, य्हाड सिबारी छ्याइजी, जोगब लउ” भिसी येशूदा छिङ्जी।

26 जमाहेन्से येशूसे थेनीगदेदा “एनीगदे तिग्दा लोड्बा? खाइ एनीगदेला विश्वास?” भिसी सुङ्जी। ओच्छे येशू रे:सी लाबालुडसरदेन समुन्द्रला छालदा बङ्जी। जमाहेन्से लाबालुडसर म्हानी शान्त तजी। 27 चुहड् तबा म्राड्सी थेनीगदे उदेक तजी। ओच्छे थेनीगदेसे “चु खाहड्बा म्हि? चुसे कुल्बा ताम मी लाबालुडसरदेन समुन्द्रला छालसेनोन ड्यान्बा चीम” भिसी हाड हाड न्हडरी ताम लजी।

येशूसे म्हडसे स्याप्बा म्हि न्हीदा खम्ना लबा

मर्कूस ५:१-२०; लूका ८:२६-३९

28 येशू समुन्द्रला क्याम्सडपट्टि गदरा† भिबा ग्लारी धोखमा म्हडसे स्याप्बा म्हि न्ही धुर्साग्याम खबान लबा स्याप्जी। थे म्हि न्ही ल्हानान लोड्बा खबा खाल्ला मुबासे लमा थे

† 8:28 कोइ कोइ ग्रीक बाइबलरी “गेरासेनस” भिसी भिबा मुला। “गदरा” भिबादेन “गेरासेनस” भिबा ग्ला गिकनोन हिन्ना।

ग्याम खालै म्हि आभ्रमुबा। 29 थेनीगदेसे येशूदा म्राङ्सी क्रिड्बान, “परमेश्वरला झा, हाडसे डन्दा तिग लबारी म्हाइबा? डन्ना धुइ आतमान हाड डन्दा नाश लबारी फेप्खबा हिन्ना?” भिसी भिजी।

30 थेनीगदे मुबा ग्लाग्याम जजाकी क्याथाड ढ्वागदे छबान मुबा। 31 थेतबासेलमा म्हडगदेसे येशूदा “चुदे हाडसे डन्दा चुरी चिआपुड्बा हिन्सम डन्दा ढ्वागदे न्हडरी वाड्पुङ्गो” भिसी बिन्ती लजी।

32 जमाहेन्से येशूसे थेनीगदेदा “निउ” भिसी सुड्माहेन्से थेनीगदे थोन्सी ढ्वागदे न्हडरी वाड्जी। जमाहेन्से जम्मान ढ्वागदे गडग्याम समुन्द्ररी छ्योड्सी सिजी। 33 चुहड् तबा म्राङ्सी ढ्वा छबा म्हिगदे यासी नाम्सारी निजी। ओच्छे म्हडसे स्याप्बा म्हि न्हीदा तिग तिग तजी भिबा ताम जम्मादान थेःना लजी। 34 जमाहेन्से नाम्साला मुबा जति जम्मान म्हिगदे येशूदा स्याप्वारी खजी। ओच्छे येशूदा म्राङ्सी थे म्हिगदेसे “चु ग्लाग्याम फेपगो” भिसी बिन्ती लजी।

## 9

येशूसे कुज्या म्हिदा खम्ना लबा

मर्कूस २:१-१२; लूका ५:१७-२६

1 जमाहेन्से येशू दोगारी क्रेःसी क्यामसडपट्टि फेपजी, ओच्छे हाडलान शहररी† दोःसी फेप्खजी। 2 म्हिगदेसे काड या चलब आतबा कुज्या तसी म्हेसी चिबा म्हि गिकदा येशू मुबा ग्लारी भजी। येशूसे थेनीगदेला विश्वास म्राङ्सी थे कुज्या म्हिदा “कोला, भड लउ, डाइ एला पाप माफ लबा मुला” भिसी सुड्जी।

3 थेरी मुबा यहूदी धर्मगुरुगदे न्हडला कोइ कोइसे “चुसे मी हाडसे हाडदान परमेश्वर स्होसी ताम लबान मुला” भिसी हाड

† 9:1 “हाडलान शहर” चा कफर्नहुम शहर हिन्ना।

हाड न्हडरी ताम लजी। ४ येशूसे थेनीगदेला सेमला ताम था याड्सी “एनीगदेसे तिग्दा चुहड्बा नइबा ताम म्हन्बा? ५ ‘एला पाप माफ तबा मुला’ भिबादेन ‘रे:सी भ्रउ’ भिबारी खजिबा चा सजिलो मुला? ६ तर परमेश्वरसे पुइखबा म्हिदा चु जम्बुलिडरी म्हिगदेला पापला दोष मेटब लबा अधिकार मुला भिसी डाइ एनीगदेदा उन्ना” भिसी सुड्जी। जमाहेन्से येशूसे थे कुज्या म्हिदा “ए रे:गो, ओच्छे एला तीबा नान्बा पुइसी दिमरी निउ” भिसी सुड्जी। ७ जमाहेन्से थे रे:सी हाडला दिमरी निजी। ८ चु म्राड्सी थेरी मुबा म्हिगदे उदेक तजी। ओच्छे थेनीगदेसे म्हिगदेदा चुहड्बा शक्ति पिन्बा परमेश्वरला जयजयकार लजी।

येशूसे मत्तीदा ड्योइबा

मर्कूस २:१३-१७; लूका ५:२७-३२

९ येशू थेग्याम फेप्वान लबा धुइरी मत्ती भिबा म्हिदा तिरो दुइबा ग्लारी चिबान लबा म्राड्जी, ओच्छे येशूसे थेदा “डादेन छ्याम भ्रउ” भिसी सुड्जी। जमाहेन्से थे रे:सी येशूदेन छ्याम भ्रजी। १० येशू मत्तीला दिमरी सोल छ्योइबान लबा धुइरी तिरो दुइबा म्हिगदेदेन पापीगदेएनोन खसी येशूदेन येशूला चेलागदेदेन छ्याम चिसी चबान मुबा। ११ चु म्राड्सी फरिसीगदेसे येशूला चेलागदेदा “एनीगदेला गुरु तिग्दा तिरो दुइबा म्हिगदे ओच्छे पापीगदेदेन छ्याम चिसी चबा?” भिसी ड्योइजी।\* १२ चु ताम थे:सी येशूसे “खम्बा म्हिगदेदा डाक्टर आतो:, तर आखम्बा म्हिगदेदा जे डाक्टर तो:ला। १३ दाहेन्से एनीगदे निसी चु तामला अर्थ तिग हिन्ना घोबारी म्हाइगो, ‘च्यागो, डाइ म्हाइबा चा बलिदान आहिन, तर एनीगदेसे स्य्हान्दोदा लबा दया हिन्ना।’ थेतबासेलमा परमेश्वरला डाच्छा ज्यबा मुबा म्हिगदेदा आहिन, तर पापीगदेदा ड्योइबारी डा खबा हिन्ना” भिसी सुड्जी।\*

\* ९:११ लूका १५:१-२

\* ९:१३ मत्ती १२:७; होशे ६:६

येशूसे फोइथान चिसी प्रार्थना लबाला लागिरी लोपबा

मर्कुस २:१८-२२; लूका ५:३३-३९

14 जमाहेन्से यूहन्नाला चेलागदे येशू मुबा ग्लारी खसी “डन्देन फरिसीगदे फोइथान चिसी प्रार्थना लमुला, तर हाडला चेलागदे चा तिग्दा फोइथान चिसी प्रार्थना आलबा?” भिसी ड्योइजी। 15 येशूसे थेनीगदेदा चुहड् भिसी सुड्जी, “महाछार जन्तीगदेदेन छ्याम मुतेधोना थेरी मुबागदेसे सुर्दा आल। तर महाछार थेनीगदेग्याम फेसी भोर्माहेन्से जे थेनीगदे सुर्दा तसी फोइथान चिला। 16 खालैसे बोक्टो क्वानरी छार क्वानगेनसे आख्या, छार क्वानगेनसे बोक्टो क्वान ख्याजी भिसम बोक्टो क्वान झन ढेला। 17 ओच्छे खालै महिसेनोन ढिला बोक्टो ताडरी अडगुरला कलिलो निडगु आयु, चुदे युजी भिसम थे ताड ढेसी अडगुरला निडगु डेला। ओच्छे थे ताडएनोन गे आखेल्बा तला। तर अडगुरला कलिलो निडगु ढिला छार ताडरी युला ओच्छे न्हीनोन जोगब तला।”

येशूसे याइरसला झामेदा खम्ना लबा

मर्कुस ५:२१-४३; लूका ८:४०-५६

18 येशूसे थेनीगदेदा चुहड् सुड्बान लबा धुइरी यहूदीगदे हुप तबा दिमला नेता गिक खजी। ओच्छे येशूदा फ्या लसी “दान्दे भर्खर डाला झामे सिजी, तर हाड फेप्खसी थेदा हाडसे थुर्जी भिसम थे सोला” भिसी भिजी। 19 जमाहेन्से येशू सहेड्सी थे म्हेदेन छ्याम फेपजी, ओच्छे येशूला चेलागदेएनोन येशूदेन छ्यामनोन निजी।

20 थेनोन धुइरी का निबा बेथासे स्याप्सी च्युक न्ही दिड तबा म्रिडम्हेमे गिक ग्यापग्याम खसी येशूला क्वानला जोरी थुर्जी। 21 तिग्दा भिसम “डाइ येशूला क्वान थुर्बारी जे म्याड्सम डा खम्ला” भिसी थेसे सेम सेमरी म्हन्बा मुबा। 22 फलिक दोःसी च्यामा येशूसे थे म्रिडम्हेमेदा म्राड्जी। ओच्छे येशूसे थेदा “भड

लउ, माइ! एला विश्वाससे लमा ए खम्बा मुला” भिसी सुड्मैछ्याम थे म्रिडमहेमे खम्जी।

23 येशू थे नेताला दिमरी धोखमा थेरी बाँसुरी हापबां म्हिगदेदेन हल्ली खल्ली लसी चिबा म्हिगदे म्राङ्जी। 24 चु म्राङ्सी येशूसे जम्मादान “एनीगदे जम्मान मडग्यार थोन्गो। तिगदा भिसम माइ सिबा आरे, तर म्हेर्सी चिबा मुला” भिसी सुङ्जी। चु ताम थे:सी थेरी मुबा म्हिगदेसे खिसी लसी डे:जी। 25 थेरी मुबा म्हिगदे मडग्यार थोन्माहेन्से येशू दिम न्हडरी वाङ्जी। ओच्छे थे माइला यारी चुङ्सी थीजी। थीमैछ्याम थे माइ डोड रे:जी। 26 जमाहेन्से चु ताम थे यहूलसाला जम्मान ग्लारी थे:जी।

येशूसे मी आम्राङ्बा म्हि न्हीदेन ताइ दोबा म्हिदा खम्ना लबा 27 येशू थेग्याम फेपबान लबा धुडरी मी आम्राङ्बा म्हि न्हीसे “दाऊद ग्लेला सन्तान, उन्दा दया लउ” भिसी क्रिड्बान येशूला लिच्छा लिच्छा खजी।

28 येशू दिम न्हडरी वाङ्माहेन्से थे मी आम्राङ्बा म्हि न्हीएनोन येशू मुबा ग्लारी खजी। जमाहेन्से येशूसे थेन्नीदा “डाइ खम्ना लबारी खम्ला भिसी एनीगदेदा विश्वास मुला?” भिसी ड्योइमा थेन्नीसे “मुला, प्रभु” भिसी भिजी।

29 जमाहेन्से येशूसे थेन्नीला मीरी थुर्सी “एनीगदेसे विश्वास लबासे लमा एनीगदे खम्बा मुला” भिसी सुङ्जी। 30 येशूसे चुहङ् सुड्मैछ्याम थेन्नीसे म्राङ्जी। जमाहेन्से येशूसे थेन्नीदा “च्यागो, चु ताम खालैदान थापाङ्गो” भिसी सुङ्जी। 31 तसैनोन थेनीगदे निसी जम्मान ग्लारी येशूला बारेरी थे:ना लजी।

† 9:23 यहूदीगदेला ठिम अन्छार म्हि सिबा धुडरी बाँसुरी हापबा म्हि भसी बाँसुरी हापपुङ्मुबा। † 9:27 मी आम्राङ्बा म्हिगदेसे येशूदा दाऊद ग्लेला सन्तान भिसी ड्योइमा थेनीगदेदा डाच्छाहेन्सेन था मुबा थाबां पिन्बा मसीह भिसी घोमुबा। तिगदा भिसम यहूदीगदेसे येशू आखम्बा म्हिदा खम्ना लबारीदेन शासन लबारी दाऊदला सन्तानग्याम थोन्ना भिसी विश्वास लमुबा।

32 थे म्हि न्ही निबारी छ्याइमा म्हिगदेसे म्हडसे स्याप्सी ताइ दोबा म्हि गिकदा येशू मुबा ग्लारी भजी। 33 येशूसे म्हडदा तापमैछ्याम थे ताइ दोबा म्हिसे ताम पाड्बारी छ्याइजी। चु म्राड्सी थेरी मुबा म्हिगदे उदेक तसी “चुहड्बाम डन्से इस्राएल य्हुल्साला म्हिगदेर् न्हडरी खाइमै म्राड्बा आरेबा” भिसी भिजी।

34 तर फरिसीगदेसे चा “चु म्हिसे मी म्हडगदेला ग्लेला शक्तिग्याम म्हड ताप्बा हिन्ना” भिसी भिबारी छ्याइजी।\*

म्हिगदेदा म्राड्सी येशूदा दया रेःबा

35 जमाहेन्से येशूसे यहूदीगदे हुप तबा दिमरी लोपबादेन परमेश्वरला य्हुल्साला समाचार थेःना लजी। ओच्छे जम्मान थरीला रोगसे स्यापबादेन आखम्बा म्हिगदेदा खम्ना लबान शहरदेन नाम्सा नाम्सारी फेप्जी।\* 36 महिला हुल म्राड्सी येशूदा ल्हानान दया रेःजी, तिगदा भिसम थेनीगदे खालैसे आच्याना दुख याड्बा गोठालो आरेबा ग्युगदे हड्बान मुबा।\* 37 जमाहेन्से येशूसे हाडला चेलागदेदा “च्यागो, बाली मी ल्हानान मिन्बा मुला, तर बाली दुइबा म्हिगदे ल्हाना आरे। 38 थेतबासेलमा बाली दुइबा म्हिगदे पुइखउ भिसी बालीला दोप्ता प्रभुदेन छ्याम प्रार्थना लउ” भिसी सुड्जी।\*

## 10

येशूला मुल चेलागदे

मर्कूस ३:१३-१९; लूका ६:१२-१६

† 9:33 याकूबला सन्तानदा इस्राएली भिसी भिमुबा भिसम येशूला धुइला यहूदीगदे चा यहूदा अञ्चलला बेन्यामीनदेन लेवीला सन्तानगदे मुबा। \* 9:34 मत्ती १०:२५; १२:२४; मर्कू ३:२२; लूका ११:१५ \* 9:35 मत्ती ४:२३; मर्कू १:३९; लूका ४:४४ \* 9:36 गन्ती २७:१७; १ राजा २२:१७; २ इति १८:१६; इज ३४:५; मर्कू ६:३४ \* 9:38 लूका १०:२

1 येशूसे हाडला च्युक न्ही चेलागदेदा ड्योइसी जम्मान थरीला रोगसे स्याप्सी आखम्बागदेदा खम्ना लबादेन म्हडगदेदा ताप्बा अधिकार पिन्जी। 2 येशूला मुल चेलागदे चुनोन हिन्ना, जम्मान भन्दा डाच्छा पत्रुस भिबा सिमोनदेन थेला आले अन्द्रियास, जबदियाला झा याकूबदेन याकूबला आले यूहन्ना, 3 ओच्छे फिलिपदेन बारथोलोमाइ, थोमादेन तिरो दुइबा मत्ती, अल्फयसला झा याकूबदेन थेदियस, 4 ओच्छे सिमोन चु सिमोनदा हाडला यहुल्सादा माया लसी हाडला यहुल्साला लागिरी ज्याननोन पिन्खम्बा म्हि भिसी भिमुबा। ओच्छे यहूदा इस्करियोत, चुनोन यहूदा इस्करियोतसे लिच्छा येशूदा चुइसी म्हिगदेला यारी जिम्मा पिन्जी।

मुल चेलागदेला गे

मर्कूस ६:७-१३; लूका ९:१-६

5 येशूसे हाडला च्युक न्ही मुल चेलागदेदा चुहड् भिसी कुल्सी पुइजी, “एनीगदे अर्गु यहुलला म्हिगदेदेन सामरीगदेला शहररी थानिउ। 6 बरु एनीगदे गोठालो आरेबा ग्युगदे हड् तसी भ्रबा इस्राएलीगदे मुबा ग्लारी निउ। 7 ओच्छे ‘स्वर्गला यहुल्सा खसी जिन्बा मुला’ भिसी पाङ्गो।\* 8 ओच्छे आखम्बा म्हिगदेदा खम्ना लबादेन सिबा म्हिगदेदा सोना लउ। थेहड् लसीन कोरे खबागदेदा खम्ना लबादेन म्हडगदे ताप्गो। एनीगदेसे ओहड् नोन याड्बा सहे एनीगदेसे एनोन ओहड् नोन पिन्गो। 9 एनीगदेसे म्हर म्हुइदेन टाडगा तिगै थाभोर्गो। 10 ओच्छे एनीगदेसे ग्यामला लागिरी पोबा क्वानदेन झोला ओच्छे लखमदेन कडी तिगै थाभोर्गो। तिग्दा भिसम गे लबा म्हिसे ज्याला याइतो:मुला।\* ”

\* 10:7 लूका १०:४-१२

\* 10:10 १ कोर ९:१४; १ तिमो ५:१८

11 “एनीगदे शहररी निसै नाम्सारी निसै डाच्छा थेरी एनीगदेदा मान लबा म्हि खाल चीम थे म्हाइगो। ओच्छे एनीगदे थेग्याम आनितेधोना थेरीन चिउ। 12 ओच्छे थे दिमरी वाड्मा एनीगदेसे थे दिमला म्हिदा “परमेश्वरला शान्ति एनीगदेदेन छ्याम तगै” भिसी पाड्गो। 13 थे दिमला म्हिसे एनीगदेदा मान लजी भिसम थे दिमला म्हिसे शान्ति याड्गै। चुदे थे दिमला म्हिसे एनीगदेदा मान आलनी भिसम थे दिमला म्हिसे शान्ति थायाड्गै। 14 ओच्छे खालैसे एनीगदेला ताम आड्यान्ना मान आलनी भिसम थे दिमदेन शहरग्याम थोन्बा धुइरी ह्वाडला काडला धुलु खर्सी पिनगो।†\* 15 च्यागो, एनीगदेसे डाला ताम ड्यान्गो, परमेश्वरसे निसाफ लबा धिनकुनु थे शहरला म्हिगदेला गति भन्दा मी सदोमदेन गमोरा† शहरला म्हिगदेला गति नाखम्बा तला।\*

विश्वासीगदेसे नातो:बा दुख

मर्कुस १३:९-१३; लूका २१:१२-१७

16 “च्यागो, डाइ एनीगदेदा फार्बागदेला गुडरी ग्युदा पुइबा हड् लसी पुइला। थेतबासेलमा एनीगदे पुखी हड्बा चलाक ओच्छे दुकुर हड् सोजो तसी भ्रउ।\* 17 तर एनीगदे म्हिगदे म्हाड्सी होशियार तउ, तिगदा भिसम थेनीगदेसे एनीगदेदा चुड्सी अदालतरी भोर्ला। ओच्छे यहूदीगदे हुप तबा दिमरी भोर्सी एनीगदेदा कोर्सासे तोबा ग्याड्बा लला। 18 डादा विश्वास लबासे लमा थेनीगदेसे एनीगदेदा अञ्चलाधीशदेन ग्लेला डाच्छापट्टि भोर्ला। एनीगदे थेनीगदेदेन अर्गु यहूलला म्हिगदेला लागिरी डाला साक्षी दोला। 19 थेनीगदेसे

† 10:14 यहूदीला ठिम अन्धार काडला धुलु खर्बा चा परमेश्वरसे सजाय पिनना भिसी उन्बा हिन्ना। \* 10:14 मुल १३:५१ † 10:15 उत्पत्ति १९:२३-२९ सदोमदेन गमोरा भिबा चा शहर नही हिन्ना। थेदा परमेश्वरसे नाश लजी। तिगदा भिसम थे शहररी लहानान नडबा गेगदे लमुबा। चु ताम, मत्ती ११:२३-२४; लूका १०:१२, १७:२९; रोमी ९:२९; २ पत्रुस २:६; यहूदा १:७; उन्बा ११:८ पदरीएनोन मुला। \* 10:15 मत्ती ११:२४; उत्प १९:२४-२८ \* 10:16 लूका १०:३

चुड्सी भोसैँनोन खाहड् लसी जोहाब पिन्से भिसी एनीगदेसे धन्दा सुर्दा लआतोः। तिग्दा भिसम थे धुइरी खाहड् लसी पाड्तोःबा थे ताम एनीगदेदा लोप्सी पिन्ना। <sup>20</sup> तिग्दा भिसम थे धुइरी एनीगदेसे पाड्बा आहिन, तर परमेश्वर आबाला आत्मासेन एनीगदेग्याम पाड्ला।

<sup>21</sup> “हाडलान ज्योज्यो आलेसे हाडलान ज्योज्यो आलेदा साइपुड्ला। थेहड् लसीन आबासे कोलागदेदा साइपुड्ला, ओच्छे कोलागदेसे आबा आमाला बिरोध लसी साइपुड्ला। <sup>22</sup> ओच्छे डादा विश्वास लबासे लमा एनीगदेदा जम्मासेन हेला लला। तर जुन म्हिसे जस्तोन दुख तसैँनोन हाड आसितेधोना डादा विश्वास लबा आख्ला थेसे थार्बा याड्ला।\* <sup>23</sup> म्हिगदेसे एनीगदेदा नाम्सा गिकरी दुख पिन्जी भिसम एनीगदे अर्गु नाम्सारी यागो। च्यागो, एनीगदेसे डाला ताम ड्यान्गो, परमेश्वरसे पुड्खबा म्हि खबा भन्दा डाच्छा एनीगदे इस्राएलला जम्मान नाम्सारी धोआखम।

<sup>24</sup> “च्यागो, गुरु भन्दा चेला घेन आत, ओच्छे मालिक भन्दा नोकरएनोन घेन आत।\* <sup>25</sup> चेला हाडला गुरु हड्बा दोबादेन नोकर हाडला मालिक हड्बा दोबान ठीक मुला। तिग्दा भिसम थेनीगदेसे डा दिमला मुल म्हिदाम म्हडला ग्ले बालजिबुल भिला भिसम ज्ञन डाला म्हेमेगदेदा मी तिग भिला?\*

खाल म्राड्सी लोड्तोःबा?

लूका १२:२-९

<sup>26</sup> “थेतबासेलमा थेहड्बा म्हिगदेदेन छ्याम थालोड्गो। तिग्दा भिसम घप्सी आम्राड्बा स्हे तिगै आरे, ओच्छे छुम्सी था आयाड्बा स्हे तिगै आरे।\* <sup>27</sup> जुन ताम डाइ एनीगदेदा धोपधोपरी पाड्बा मुला, थे ताम एनीगदेसे य्हालरी पाड्गो, ओच्छे जुन ताम

\* 10:22 मत्ती २४:९-१३ \* 10:24 लूका ६:४०; यूह १३:१६; १५:२० \* 10:25 मत्ती ९:३४; १२:२४; मर्कू ३:२२; लूका ११:१५ \* 10:26 मर्कू ४:२२; लूका ८:१७

एनीगदेसे थे:ला, थे ताम एनीगदेसे दिमला धुरीग्याम थे:ना लउ।  
 28 ओच्छे एनीगदेला लहुइदा साइसी आत्मादा चा तिगै लबारी  
 आखम्बा म्हिगदेदेन छ्याम थालोङ्गो। तर लहुइदेन आत्मा  
 न्हीदान साइसी नर्गरी धोना लखम्बा परमेश्वरदेन छ्याम जे  
 लोङ्गो। 29 डबल गिकरी च्युर्गन न्ही याङ्मुला। तसैनोन एनीगदेला  
 परमेश्वर आबासे सेम आलनी भिसम थे च्युर्गनगदे न्हडला  
 गिकएनोन आसि। 30 एनीगदेला थोबोरी क्रा गाते मुला भिबा ताम  
 सुत्तै परमेश्वरदा था मुला। 31 थेतबासेलमा एनीगदे थालोङ्गो।  
 तिग्दा भिसम थे ल्हानान च्युर्गनगदे भन्दा मी एनीगदे ल्हानान  
 घेन मुला।

स्युहानदोगदेदा स्त्रीष्टला बारेरी पाङ्बा  
 लूका १२:८-९

32 “थेतबासेलमा जुन म्हिसे डादा महिला ओन्छाडरी सेमहेनसे  
 प्रभु भिसी पाङ्ला, डाएनोन स्वर्गरी धन्छ्याबा आबाला डाच्छा  
 थेदा डाला म्हि भिसी भिला। 33 तर जुन म्हिसे म्हिगदेला  
 ओन्छाडरी डादा डाइ थेदा डोसेबा आरे भिसी भिला, डाइएनोन  
 थेदा स्वर्गरी धन्छ्याबा डाला आबाला डाच्छा डोसेबा आरे भिसी  
 भिला।\* ”

स्त्रीष्टदा विश्वास लबादेन आलबा  
 लूका १२:५१-५३; १४:२६-२७

34 “डा जम्बुलिडरी म्हिगदेदा ढिक्ना लबारी खबा हिन्ना भिसी  
 थाम्हनगो। तिग्दा भिसम डा म्हिगदेदा ढिक्ना लबारी आहिन, तर  
 थेनीगदे न्हडरी छेना लबारी खबा हिन्ना। 35 तिग्दा भिसम  
 ‘डा आबाला बिरोधरी झा,  
 आमाला बिरोधरी झामे  
 ओच्छे स्युमीला बिरोधरी चाड रे:ना लबारी खबा हिन्ना।

\* 10:33 २ तिमो २:१२

36 म्हेला शत्रु चा ह्वाडलान म्हेमेगदे न्हडग्याम थोन्ना।\*

37 “जुन म्हिसे डादा भन्दा ह्वाडला आबा आमादेन कोलागदेदा माया लला, थे म्हि डाला चेला दोबारी आखम। 38 ओच्छे जुन म्हिसे आसितेधोना ह्वाडला दुख ह्वाडसेन नासीं डादेन छ्याम आभ्र, थे म्हि डाला चेला दोबाधोनाला आरे।\* 39 जुन म्हिसे ह्वाडला ज्यान जोगब लबारी म्हाइला थे म्हिसे जुकजुकधोनाला जुनी आयाड्। तर डाला लागिरी ज्याननोन पिन्खम्बा म्हिसे जुकजुकधोनाला जुनी याड्ला।\*

40 “एनीगदेदा मान लबा म्हिगदेसे डादाएनोन मान लला। ओच्छे डादा मान लबागदेसे डादा पुइखबादाएनोन मान लला।\* 41 जुन म्हिसे अगमवक्तादा ‘अगमवक्ता’ भिसी मान लला, थेसेनोन अगमवक्तासे याड्बा ह्वाडबान इनाम याड्ला। थेहड् लसीन जुन म्हिसे परमेश्वरदा सेम निबा म्हिदा ‘परमेश्वरदा सेम निबा म्हि’ भिसी मान लला, थेसेनोन थे परमेश्वरदा सेम निबा म्हिसे याड्बा ह्वाडबान इनाम याड्ला। 42 च्यागो, खालैसे चुगदे न्हडला गिकदा डाला चेला भिसी सिम्बा क्युड् जे थुड्बारी पिन्सैनोन थेसे याड्तोःबा इनाम याड्ला।”

## 11

बप्तिस्मा पिन्बा यूहन्नासे ड्योड्बा ताम

1 येशूसे ह्वाडला च्युक न्ही चेलादा चुहड् सुड्सी जिनमाहेन्से गालील अञ्चलला नाम्सागदेरी परमेश्वरला यहुल्साला समाचार लोपबारीदेन थेःना लबारी फेप्जी।

\* 10:36 मीका ७:६ † 10:38 ग्रीक बाइबलरी चा ह्वाडला कुस ह्वाडसेन पुड्तोःला भिसी भिबा मुला। \* 10:38 मत्ती १६:२४; मर्कू ८:३४; लूका ९:२३ \* 10:39 मत्ती १६:२५; मर्कू ८:३५; लूका ९:२४; १७:३३; यूह १२:२५ \* 10:40 मर्कू ९:३७; लूका ९:४८; १०:१६; यूह १३:२० † 10:42 “सिम्बा क्युड्” नेपाली बाइबलदेन ग्रीक बाइबलरी चा “कचौर नाड क्युड्” भिसी भिबा मुला।

2-3 थे धुइरी बपत्तिस्मा पिन्बा यूहन्ना झ्याल्खानरी मुबा। थार्बा पिन्बा ख्रीष्टसे लबा गेला बारेरी थेःसी यूहन्नासे हाडला चेलागदेदा “डन्से फेपखला भिसी आश लसी चिबा थार्बा पिन्बा ग्ले हाडनोन हिन्ना कि स्य्हान्दो खालैदा भ्रान्तोःबा हिन्ना?” भिसी ड्योइबारी थार्बा पिन्बा ख्रीष्ट मुबा ग्लारी पुइजी।

4 जमाहेन्से येशूसे थेनीगदेदा चुहड् भिसी सुड्जी, “एनीगदेसे थेःबादेन म्राड्बा ताम निसी यूहन्नादा पाड्सी पिन्गो। 5 मी आम्राड्बागदेला मी म्राड्ना लबा मुला, कुज्यादेन कोरे खबा म्हिगदेदा खमना लबा मुला, नाब्यड् आथेःबागदेदा थेःना लबा मुला, सिबागदेदा सोना लबा मुला, ओच्छे प्राड्बोगदेदा परमेश्वरला यहुल्साला समाचार थेःना लबान मुला।\* 6 जुन म्हिसे शङ्का आलना विश्वास लला, थे म्हिसे परमेश्वरग्याम मोलम याड्ला।”

7 थेनीगदे निमाहेन्से येशूसे थेरी मुबा म्हिगदेदा यूहन्नाला बारेरी सुड्बारी छ्याइजी, “एनीगदे तोडतोड्बा ग्लारी तिग च्याबारी निबा मुबा? तिग लाबासे य्होड्बा मा दोड च्याबारी निबा हिन्ना? 8 ओच्छे एनीगदे तिग च्याबारी थोन्बा मुबा? ज्यबा ज्यबा क्वान क्वान्बा म्हिदा च्याबारी? च्यागो, ज्यबा ज्यबा क्वान क्वान्बा म्हिगदे मी ग्लेखाडरी जे चिमुला। 9 एनीगदे तिग च्याबारी निमुबा? तिग अगमवक्तादा च्याबारी निबा आहिन? हिन्ना, डाइ पाड्ला एनीगदेसे स्य्हान्दो अगमवक्तागदे भन्दा घेन म्हि गिक म्राड्बा मुला। 10 चुनोन यूहन्नाला बारेरी परमेश्वरला बचनरी चुहड् भिसी भ्रिबा मुला, ‘च्यागो, डाइ डाला समाचार भोर्बा म्हिदा एला डाच्छा डाच्छा पुइला।

थेसे एला लागिरी ग्याम सहोला।†\* ”

\* 11:5 यशै ३५:५, ६; ६१:१ † 11:10 चु ताम चा परमेश्वरसे थार्बा पिन्बा ख्रीष्टदा सुड्बा ताम हिन्ना। \* 11:10 मला ३:१

11 “च्यागो, दान्देधोना बपतिस्मा पिन्बा यूहन्ना भन्दा घेन म्हि खालैनोन न्हबा आरे। तसैनोन जुन म्हि स्वर्गला यहुल्सारी जम्मान भन्दा जजा मुला, थे बपतिस्मा पिन्बा यूहन्ना भन्दा घेन हिन्ना।† 12 बपतिस्मा पिन्बा यूहन्नाला धुइहेन्से दान्देधोना थेःना लबा स्वर्गला यहुल्साला बारैरी ल्हानान गे तबा मुला। तर हाडसे हाडदान शक्तिशाली म्हन्बा म्हिगदे चा हाडलान भडसे स्वर्गला यहुल्सारी वाड्बारी म्हाइबा मुला।\* 13 तिग्दा भिसम यूहन्नाला धुइधोना परमेश्वरसे मोशादा पिन्बा ठिमदेन जम्मान अगमवक्तागदेसे परमेश्वरला यहुल्साला बारैरी पाड्बा मुला। 14 एनीगदेसे अगमवक्तागदेसे पाड्बा ताम विश्वास लबा हिन्सम थेनीगदेसे खाल भिसी पाड्बा एलिया चा चुनोन यूहन्ना हिन्ना।\* 15 जुन म्हिदा ड्यान्बा सेम मुला, थेसे ड्यान्सी घोउ।

16 “दान्देला म्हिगदेदा डाइ खाहड् लसी घोना लसे? थेनीगदे मी ग्यामरीक्यार क्लाड्बा कोलागदे हड्बान हिन्ना। थेनीगदेसे हाडला ह्योगदेदा ड्योइसी चुहड् भिमुला,

17 ‘डन्से एनीगदेला लागिरी बाँसुरी हाप्सी पिन्जी, तर एनीगदे आस्य्हनी।

ओच्छे डन्से दुखला व्हाइ गोजी, तर एनीगदे आक्रानी।’

18 चुहड् लसीन यूहन्नासे अडगुरला निडगु आथुड्ना फोइथान चिसी प्रार्थना लमुबा, जमा म्हिगदेसे ‘थेदा म्हडसे स्याप्बा म्हि’ भिसी भिबा मुबा। 19 परमेश्वरसे पुइखबा म्हि चा चबा थुड्बा लसी भ्रजी। थेतबासेलमा म्हिगदेसे डादा ‘च्यागो, ल्हानान चबा स्हेदेन ल्हानान निडगु कासी ड्य्होइसी भ्रबा, तिरो दुइबादेन पापीगदेला

† 11:11 यूहन्नासे थाबा पिन्बा ख्रीष्ट योना फेपखला भिबा ताम थेःना लसी घेन गे लबा मुबा, तसैनोन येशूला चेलागदेसे येशूदा थाबा पिन्बा ख्रीष्टदा डोसेजी भिसी थेःना लजी। थे ताम यूहन्नासे लबा गे भन्दा घेन मुबा। \* 11:12 लूका १६:१६ \* 11:14 मला ४:५; मत्ती १७:१०-१३; मर्कु ९:११-१३

हो' भिसी भिमुला! तर परमेश्वरला बुद्धिग्याम गे लबा म्हिदा थेसे लबा गेगदेग्यामसेन थे ठीक हिन्ना भिसी था याड्ला।”

येशूसे विश्वास आलबा शहरला म्हिगदेदा बड्बा  
लूका १०:१३-१५

20 जमाहेनसे जुन जुन नाम्सारी येशूसे ल्हानान उदेकला गेगदे लबा मुबा, थे नाम्साला म्हिगदेदा दाहेनसे ज्यबा तसेला आरे भिसी सुड्बारी छ्याइजी, तिग्दा भिसम थेनीगदेसे हाड हाडला पाप ख्लासी परमेश्वरपट्टि आदोःनी। 21 “खोराजीनदेन बेथसेदाला म्हिगदे, एनीगदेसे परमेश्वरग्याम सजाय याड्ला। तिग्दा भिसम एनीगदेला नाम्सारी लबा हड्बा उदेकला गेगदे टुरोसदेन सीदोन शहररी लबा हिन्सम ओन्मान थेनीगदेसे बोरा क्वान्सी मेफ्रा फोर्सी हाड हाडला पाप ख्लासी परमेश्वरपट्टि दोःसेला मुबा।\* 22 तर एनीगदेसे डाला ताम ड्यान्गो, परमेश्वरसे निसाफ लबा धुइरी एनीगदेला दुख भन्दा टुरोसदेन सीदोनला म्हिगदेला दुख नाखम्बा तला 23 कफर्नहुमला म्हिगदे, तिग एनीगदे स्वर्गरीन धोला भिसी म्हन्मुला? आधो! एनीगदेदा मी नर्गरी भ्याड्ला। तिग्दा भिसम एनीगदेला गुडरी लबा उदेकला गेगदे सदोमरी लबा हिन्सम थे नाम्सा तिनीधोना चिसेला मुबा।\* 24 च्यागो, परमेश्वरसे निसाफ लबा धुइरी सदोमला म्हिगदेसे भन्दा एनीगदेसे ल्हानान सजाय याड्ला?”\*

25 थे धुइरी येशूसे चुहड् भिसी प्रार्थना लजी, “मुदेन जम्बुलिडला प्रभु आबा, हाडदा धन्यवाद मुला, तिग्दा भिसम हाडसे ज्ञान बुद्धि मुबा म्हिगदेदेन सेबा घोबा म्हिगदेग्याम छुम्सी थान्बा ताम तिगै आसेबा म्हिगदेदा उन्सी पिन्जी। 26 हिन्ना आबा, चुहड् लमान हाड ताड्जी।

\* 11:21 यशै २३:१-१८; इज २६:१-२८:२६; योए ३:४-८; आमो १:९-१०; जक ९:२-४

\* 11:23 यशै १४:१३-१५; उत्प १९:२४-२८ \* 11:24 मत्ती १०:१५; लूका १०:१२

27 “डाला आबासे डादा जम्मान स्हे जिम्मा पिन्बा मुला। थेतबासेलमा झा खाल हिन्ना भिसी आबादा बाहेक स्य्हान्दो खालैदान था आरे। थेहङ् लसीन आबा खाल भिसी झादेन झासे आबादा डोसेना लबा म्हिगदेसे बाहेक स्य्हान्दो खालैदान आबा खाल हिन्ना भिसी था आरे।\* ”

डा मुबा ग्लारी खसी बल्पबा न्हउ

28 “धोइ पुइसी बल्पबा म्हिगदे, डा मुबा ग्लारी खउ, डाइ एनीगदेला बल्पबा साल्ना लला। 29 डाला जुवा<sup>†</sup> पुइसी डाग्याम लोपगो, तिग्दा भिसम डाला सेम डेम्बादेन दयासे प्लिङ्बा मुला। थेतबासेलमा एनीगदेला सेमरी शान्ति तला।\* 30 तिग्दा भिसम डाइ कापबा जुवा सजिलो मुला, ओच्छे डाइ कापबा धोइ याड्बा मुला।”

## 12

येशू बल्पबा न्हबा धिननाएनोन प्रभु हिन्ना

मर्कुस २:२३-२८; ३:१-६; लूका ६:१-११

1 येशूदेन थेला चेलागदे बल्पबा न्हबा धिनकुनु बुग्याम फेपबान मुबा। थे धुइरी फोखेन्बासे लमा थेला चेलागदेसे ग्वाला नम थुसी चबारी छ्याइजी।\* 2 थेनीगदेसे चुहङ् लबा म्राड्सी फरिसीगदेसे येशूदा “च्यागो, ह्याडला चेलागदेसे बल्पबा न्हबा धिनकुनु लबारीन आतबा गे लजी” भिसी पाड्जी।

3 जमाहेनसे थेनीगदेदा येशूसे चुहङ् भिसी सुङ्जी, “दाऊददेन थेला ह्योगदेदा फोखेन्बा धुइरी थेनीगदेसे तिग लजी? तिग एनीगदेसे खाइमै परमेश्वरला बचन पढब लबा आरे? ” 4 थे धुइरी दाऊदसे परमेश्वरला दिमरी वाड्सी परमेश्वरदा फुल्बा गेड भसी

\* 11:27 यूह ३:३५; १:१८; १०:१५ † 11:29 चुरी जुवा भिबा चा परमेश्वरसे सुड्बा ताम ड्यानबादेन गाहो गे हिन्ना। \* 11:29 यर्मि ६:१६ \* 12:1 क्यव २३:२५

\* 12:3 १ शमू २१:१-६

हाडला ह्योगदेदेन छ्याम ढिक्सी चजी। थे गेड थेनीगदेसे चबारीन आतमुबा। तिगदा भिसम थे गेड परमेश्वरला मन्दिररी पूजा लबा म्हिसे जे चबारी तमुबा।\* 5 ओच्छे एनीगदेसे परमेश्वरसे मोशादा पिन्बा ठिम पढब लबा आरे? बल्पबा न्हबा धिनकुनुएनोन परमेश्वरला मन्दिररी पूजा लबा म्हिगदेसे गे लमुला, तसैनोन थेनीगदेसे पाप लबा मुला भिसी आम्हनमुला।\* 6 तर एनीगदेसे डाला ताम ड्यानगो, परमेश्वरला मन्दिर भन्दा घेन चुरी स्य्हान्दो खालै मुला। 7 थेतबासेलमा 'डाइ म्हाइबा चा बलिदान आहिन, तर एनीगदेसे स्य्हान्दोदा लबा दया हिन्ना' भिसी बचनरी श्रिबा ताम घोबा हिन्सम एनीगदेसे तिगै दोष आरेबा म्हिदा दोष आलसेला मुबा।\* 8 तिगदा भिसम परमेश्वरसे पुइखबा म्हि बल्पबा न्हबा धिनना प्रभु हिन्ना।”

बल्पबा न्हबा धिनकुनु येशूसे आखम्बा म्हिदा खम्ना लबा 9 थेग्याम येशू यहूदीगदे हुप तबा दिमरी फेपूजी। 10 थेरी या गिक खर्बा म्हि मुबा। फरिसीगदेसे येशूदा दोष लबाला लागिरी “तिग बल्पबा न्हबा धिनकुनु खालै म्हिदा खम्ना लबा ठीक हिन्ना?” भिसी ड्योइजी।

11 जमाहेन्से येशूसे थेनीगदेदा चुहड् भिसी सुड्जी, “एनीगदे न्हडरी खालैला ग्यु गिक बल्पबा न्हबा धिनकुनु व्हाडरी ताइजी भिसम एसे थे ग्युदा आते:ना थेहड्-नोन थान्ना?\*” 12 एनीगदेसे ग्युदा मी ते:मुला भिसम म्हि ग्यु भन्दा घेन आहिन? थेतबासेलमा बल्पबा न्हबा धिनकुनु खालैदा ज्यबा लबा ठीक हिन्ना।”

13 जमाहेन्से येशूसे थे म्हिदा “एला या तन्गब लउ” भिसी सुड्माहेन्से थेसे या तन्गब लजी। तन्गब लमैछ्याम थेला या अर्गु या हड्बान ज्यबा तजी। 14 जमाहेन्से फरिसीगदे थेग्याम थोन्सी

\* 12:4 लेवी २४:९ \* 12:5 गन्ती २८:९-१० \* 12:7 मत्ती ९:१३; होशे ६:६

\* 12:11 लूका १४:५

निजी, ओच्छे येशूदा खाहड् लसी साइबा भिसी हाड हाड न्हडरी सल्लाह लबारी छ्याइजी।

### परमेश्वरसे धम्बा म्हि

15 फरिसीगदेला ताम था याड्सी येशू थेंग्याम फेपूजी। जमाहेनसे म्हिला हुलएनोन येशूदेन छ्यामनोन खजी, ओच्छे येशूसे आखम्बा जम्मान म्हिगदेदा खम्ना लजी। 16 तर येशूसे थें म्हिला ल्हुइरी मुबा म्हडदा “च्यागो, डा परमेश्वरला झा हिन्ना भिसी खालैदा थापाङ्गो” भिसी सुड्जी। 17 यशैया भिबा अगमवक्तासे पाड्बा ताम पूरा तबारीन येशूसे चुहड् सुड्बा हिन्ना। यशैया अगमवक्ताग्याम परमेश्वरसे चुहड् भिसी सुड्बा मुला,

18 “डाइ धम्बा डादा तेन्बा म्हि म्हाड्सी डा ताड्बा मुला।

ओच्छे थेंदा डाइ माया लसी डाला आत्मा थेंथोरी थान्सी पिन्बा मुला,  
थेंसे डाइ लबा निसाफला बारेरी जम्मान य्हलला म्हिगदेदा पाड्ला।

19 थें छेबा बड्बा लसी आभ्र

ओच्छे ल्हानान क्रिड्सीएनोन आभ्र।

थेतबासेलमा थें ग्यामरीक्यार क्रिड्सी भ्रबा खालैसे आथे:।

20 थिबा मादा आक्युडना जोगब लसी थान्बा हड् लसी दुखरी मुबा म्हिगदेदा थेंसे जोगब लसी थान्ना।

थेहड् लसीन छ्युगु जिन्सी सिबारी छ्याइबा नाडसलदा सिआपुड्बा हड् लसी थेंसे

विश्वासरी कमजोर तबा म्हिगदेदाएनोन जोगब लसी थान्ना।

ओच्छे जम्मादान ठीक निसाफ लसी थान्ना लला।

21 थेतबासेलमा जम्मान य्हलला म्हिगदेसे थेंथोरी आश लला।”\*

\* 12:21 यशैया ४२:१-४

येशूदेन म्हडला ग्ले बालजिबुल

मर्कुस ३:२०-३०; लूका ११:१४-२३

22 जमाहेन्से म्हिगदेसे म्हडसे स्याप्सी ताइ दोबादेन मी आम्राड्बा म्हि गिकदा येशू मुबा ग्लारी भजी। येशूसे थेदा खम्ना लजी, जमाहेन्से थेसे म्राड्खम्जी तामएनोन पाड्खम्जी। 23 चु म्राड्सी थेरी मुबा जम्मान म्हिगदे उदेक तसी “चु दाऊद ग्लेला सन्ताननोन हिन्ना?” भिसी भिजी।\*

24 तर चुहड्बा ताम थेःसी फरिसीगदेसे येशूदा “चु म्हिसे मी म्हडगदेला ग्ले बालजिबुलला शक्तिग्याम जे म्हडगदे ताप्बा हिन्ना” भिसी भिजी।\*

25 तर थेनीगदेला सेमला ताम था याड्सी येशूसे थेनीगदेदा चुहड् भिसी सुड्जी, “च्यागो, जुन यहुल्साला म्हिगदे ह्राड ह्राड न्हडरी तोबा छेबा लला थे यहुल्सा नाश तला, ओच्छे दिम गिकलान म्हिएनोन ह्राड ह्राड न्हडरी आढिक्नी भिसम थे दिमएनोन फुप्ला। 26 थेतबासेलमा शैतानसे शैतानदान ताप्जी भिसम थेनीगदे ह्राड ह्राड न्हडरी फेला। थेहड् लजी भिसम थेनीगदेला यहुल्सा खाहड् लसी टुला? 27 डाइ बालजिबुलला शक्तिग्याम म्हड ताप्मुला भिसम एनीगदेला चेलागदेसे चा खाल्ला शक्तिग्याम म्हड ताप्बा हिन्ना? थेतबासेलमा एनीगदेला गल्ती थेनीगदेसेन उन्ना। 28 तर डाइ परमेश्वरला आत्माग्याम म्हड ताप्बा मुला भिसम एनीगदेला गुडरी परमेश्वरला यहुल्सा खसी जिन्बा मुला।

29 “भड्बा म्हिला दिमरी वाड्सी डाच्छा थे म्हिदा आखीना खालैसे थेला धन सम्पत्ति य्हो लखम्ला? थे भड्बा म्हिदा खीमाहेन्से जे थेसे थेला धन सम्पत्ति भोर्खम्ला।

\* 12:23 मत्ती ९:२७ † 12:24 “बालजिबुल” भिबा शैतानना अर्गु मिन हिन्ना।

\* 12:24 मत्ती ९:३४; १०:२५ † 12:29 येशूसे चु कथा थेसे भड्बा म्हि हड्बा शैतानना ग्लेदा ढाजी भिसी घोना लबारी सुड्बा हिन्ना। तिगदा भिसम थेसे म्हडडा म्हिला लहुड्ग्याम ताप्बा मुबा।

30 “जुन म्हि डादेन छ्याम आढिक, थे म्हि डाला बिरोधी तला। ओच्छे जुन म्हिसे डा मुबा ग्लारी म्हिगदे आभ, थे म्हिसे डाला बिरोधीरी गे लला।\* 31 थेतबासेलमा म्हिगदेसे जसूतोण पाप गेदेन पाप तामगदे लसैनोन थेनीगदेदा माफ लला। तर परमेश्वरला आत्मादा बिरोध लसी पाप ताम लबा म्हिसे खाइमै माफ आयाड्। 32 थेहड् लसीन खालै म्हिसे परमेश्वरसे पुइखबा म्हिदा बिरोध लसी ताम पाड्सै थेसे माफ याड्ला। तर परमेश्वरला आत्मादा बिरोध लसी ताम पाड्जी भिसम थेदा दान्देल्ला धुइरी माफ आल, लिच्छाला जुनीरीनोन माफ आयाड्।\* ”

दोड खाहड् लसी डोसेबा

लूका ६:४३-४५

33 “ज्यना लसी सयार लबा दोडरी ज्यना लसीन रोला। ओच्छे ज्यना लसी सयार आलबा दोडरी ज्यना लसी आरो। थेतबासेलमा सयार लजीम कि आलजीम भिबा ताम रोग्यामसेन था तला।\* 34 पुखीला कोलागदे, एनीगदेला सेमरीन पाप मुला भिसम खाहड् लसी ज्यबा ताम पाड्खम्ला? तिग्दा भिसम सेमरी जुन ताम मुला, थेनोन ताम एनीगदेसे पाड्बा हिन्ना।\* 35 ज्यबा सेम मुबा म्हिला सेम न्हडग्याम ज्यबान ताम थोन्मुला ओच्छे नइबा सेम मुबा म्हिला सेम न्हडग्याम नइबान ताम थोन्मुला।\* 36 थेतबासेलमा एनीगदेसे डाला ताम ड्यान्गो, परमेश्वरसे निसाफ लबा धिनकुनु आतो:बा ताम पाड्बा म्हिगदेसे हाड हाडला हिसाब उन्तो:ला। 37 तिग्दा भिसम एला दोष मुला कि आरे भिबा एला तामग्यामसेन था तला।”

म्हिगदेसे उदेकला चिनु महाइबा

मर्कूस ८:११-१२; लूका ११:२९-३२

\* 12:30 मर्कू ९:३९ \* 12:32 लूका १२:१० \* 12:33 मत्ती ७:२० \* 12:34

मत्ती ३:७; २३:३३; १५:१८; लूका ३:७ \* 12:35 मत्ती १५:१८

38 जमाहेन्से यहूदी धर्मगुरुगदेदेन फरिसीगदे न्हडला कोइ कोइसे येशूदा “गुरु, डन्दा हाडसे लबा उदेकला गे च्याबा सेम मुला” भिसी पाड्मा,\*

39 येशूसे थेनीगदेदा चुहड् भिसी जोहाब पिन्जी, “नइबा बानिबेहोर थोसी स्यहान्दोदेन छ्याम ब्रेल्सी भ्रबा म्हिगदेसे उदेकला चिनु जे म्हाइमुला। तर दान्देला म्हिगदेदा चा योना अगमवक्ताला चिनु बाहेक अर्गु चिनु आउन।\* 40 तिग्दा भिसम धिन सोम म्हुन सोमधोना योना घेन तार्डाला फोरी चिबा हड् लसी परमेश्वरसे पुइखबा म्हिएनोन धिन सोम म्हुन सोमधोना धुर्सारी तला।\* 41 च्यागो, परमेश्वरसे निसाफ लबा धुइरी निनवे शहरला म्हिगदे रे:सी दान्देला म्हिगदेला दोष उन्ना। तिग्दा भिसम योना अगमवक्तासे पाड्बा परमेश्वरला यहुल्सा समाचार थे:सी, थेनीगदे हाड हाडला पाप ख्लासी परमेश्वरपट्टि दो:बा मुबा। तर चुरी योना अगमवक्ता भन्दा घेन म्हि गिक मुला। तसैनोन एनीगदेसे थेला ताम आड्याननी।\* 42 निसाफ लबा धुइरी ल्होग्याम खबा ग्लेसयासे दान्देला म्हिगदेला दोष उन्ना, तिग्दा भिसम थे सोलोमन ग्लेला ज्ञान बुद्धिला ताम ड्यानबारी ल्हानान थारेडग्याम खबा मुबा। तर च्यागो, चुरी सोलोमन ग्ले भन्दा घेन म्हि मुसैनोन थेला ताम आड्याननी।\*

डाच्छा थोन्सी निबा म्हड दो:सी खमाहेन्से

43 “म्हड महिला ल्हुडग्याम थोन्सी निमाहेन्से थेसे बलपबा न्हबारी तोडतोडबा ग्लारीक्यार ग्ला महाइसी भ्रला। ओच्छे खानडएनोन बलपबा न्हबा ग्ला आयाड्माहेन्से, 44 ‘डा जुन महिला ल्हुडग्याम थोन्सी खजी थेनोन महिला ल्हुइरी चिबारी निड’ भिसी

\* 12:38 मत्ती १६:१; मर्कु ८:११ \* 12:39 मत्ती १६:४; मर्कु ८:१२ \* 12:40 जोना १:१७ \* 12:41 जोना ३:५ \* 12:42 १ राजा १०:१-१०; २ इति ९:१-१२

दोःसी निला। दोःसी खमा थेसे डाच्छा ह्वाड चिबा ग्ला खालै आरेबा साडसाडबा म्राड्ला। <sup>45</sup> जमाहेन्से थे म्हड निसी ह्वाड भन्दा नइबा अर्गु गोर निस म्हडगदे भसी थे म्हि न्हडरी वाड्सी चिमुला। थेतबासेलमा थे महिला गति डाच्छाला भन्दा लिच्छाला गति झन नइबा तला। दान्देला म्हिगदेदाएनोन थेहड्बान तला।”

येशूला आमादेन आलेगदे

मर्कूस ३:३१-३५; लूका ८:१९-२१

<sup>46</sup> येशू म्हिगदेदेन छयाम ताम लबान लबा धुडरी येशूदेन छयाम ताम लबारी भिसी थेला आमादेन आलेगदे मडग्यार खसी चिबा मुबा। <sup>47</sup> जमाहेन्से म्हि गिकसे “ह्वाडदेन छयाम ताम लबारी भिसी ह्वाडला आमादेन आलेगदे मडग्यार खसी चिमुला” भिसी येशूदा पाड्जी।

<sup>48</sup> तर येशूसे थे म्हिदा “डाला आमा खाल? डाला आलेगदे खाल?” <sup>49</sup> ओच्छे येशूसे ह्वाडला चेलागदेदा उन्बान चुहड् भिसी सुड्जी, “च्यागो, चुरी मुबा जम्मान डाला आमादेन आलेगदे हिन्ना। <sup>50</sup> तिग्दा भिसम जुन म्हि स्वर्गरी धन्छ्याबा डाला आबासे म्हन्बा अन्छार भ्रला थेनोन डाला आमा, डाला आडा ओच्छे डाला आले हिन्ना।”

## 13

ब्लु द्वबाला उखान

मर्कूस ४:१-९; लूका ८:४-८

<sup>1</sup> जमाकुनु येशू दिमग्याम फेप्सी समुन्द्रला कुनीरी धन्छ्याजी।  
<sup>2</sup> ओच्छे थेरी महिला हुल मुबासेलमा येशू दोगारी धन्छ्याजी। ओच्छे महिला हुल चा समुन्द्रला कुनीरीक्यार राप्सी चिजी।\*  
<sup>3</sup> जमाहेन्से थेरी मुबा म्हिगदेदा येशूसे उखानग्याम ल्हानान ताम

\* 13:2 लूका ५:१-३

लोपबान चुहड् भिसी सुड्जी, “च्यागो, ब्लु ढ्वबा म्हि गिक ब्लु ढ्वबारी भ्रजी। <sup>4</sup> थे म्हिसे ब्लु ढ्वमा कोइ ब्लु ग्यामरी परब तजी, थे ब्लु चरागदे खसी चजी। <sup>5</sup> कोइ ब्लु चा युडबाला घहड मुबा सरी परब तजी, ओच्छे थेरी साप्रा ल्हाना आरेबासे लमा योनान फुड्जी। <sup>6</sup> तर साप्रा ल्हाना आरेबासे लमा थेला टा नुपना निआम्याड्नी। थेतबासेलमा धिनीसे क्रोसी थे दोड सिजी। <sup>7</sup> कोइ ब्लु चा पुजु झाडरी परब तजी, ओच्छे थे ब्लुदेन पुजु दोड छ्याम छ्यामनोन फुड्जी। तर पुजु दोड लहेबान निबासे लमा थे दोडदा हाप तजी। <sup>8</sup> कोइ ब्लु चा ज्यबा सरी परब तसी फुड्जी, ओच्छे कोइ दोडरी दोब्बर, कोइ दोडरी तेब्बर, कोइ दोडरी चौबरधोना रोजी। <sup>9</sup> जुन म्हिदा ड्यानबा सेम मुला थेसे ड्यानसी घोड।”

येशूसे तिग्दा उखान सुड्बा?

मर्कुस ४:१०-१२; लूका ८:९-१०

<sup>10</sup> जमाहेन्से चेलागदेसे येशूदा “हाडसे थेनीगदेदा तिग्दा उखानग्यामसे जे लोपबा?” भिसी ड्योडमा, <sup>11</sup> येशूसे थेनीगदेदा चुहड् भिसी जोहाब पिन्जी, “म्हिसे था आयाड्बा स्वर्गला यहुल्साला ताम डाइ एनीगदेदा घोखम्बा ज्ञान बुद्धि पिन्बा मुला। तर थेनीगदेदा चु ज्ञान बुद्धि पिन्बा आरे। <sup>12</sup> तिग्दा भिसम जुन म्हिसे डाइ लोपबा तामदा सेम लसी ड्यानना, थेदा डाइ अझन घोना लला। तर डाइ लोपबा ताम आड्यानबादा चा थेसे जुन घोबा मुला थे तामएनोन म्हाना लला।\* <sup>13</sup> थेनीगदेसे डाइ लबा गे च्याबाम च्यामुला तर आम्राड्मुला, ओच्छे डाइ पाड्बा ताम ड्यानबाम ड्यानमुला तर आघोमुला। थेतबासेलमान डाइ थेनीगदेदा उखानग्याम पाड्बा हिन्ना।

<sup>14</sup> “परमेश्वरसे यशैया अगमवक्ताग्याम सुड्बा ताम चुहड् लसी पूरा तबा मुला,

\* 13:12 मत्ती २५:२९; मर्कु ४:२५; लूका ८:१८; १९:२६

‘थेनीगदेसे ड्यान्बाम ड्यान्मुला तर खाइमै आघोमुला,  
 च्याबाम च्यामुला तर खाइमै आम्राड्मुला,  
 15 तिग्दा भिसम चु म्हिगदेला सेम कोड्बा मुला,  
 थेनीगदेला नाब्यडसे आथे:मुला,  
 ओच्छे थेनीगदेसे मी च्युम्बा मुला।  
 आहिन्सम थेनीगदेसे म्राड्सेला मुबा,  
 थे:सेला मुबा, सेमहेन्सेन घोसेला मुबा,  
 डापट्टि दो:सेला मुबा,  
 ओच्छे थेनीगदेदा डाइ खम्ना लसेला मुबा।’ ”\*

16 जमाहेन्से येशूसे हाडला चेलागदेदा चुहड् भिसी सुड्जी,  
 “एनीगदेसे परमेश्वरग्याम मोलम याड्ला, तिग्दा भिसम एनीगदेसे  
 म्राड्बाएनोन मुला थे:बाएनोन मुला। 17 च्यागो, एनीगदेसे डाला  
 ताम ड्यान्गो, ल्हानान अगमवक्तादेन परमेश्वरसे म्हनबा अन्छार  
 भ्रबा म्हिगदेसे एनीगदेसे म्राड्बा चु तामगदे च्याबारी म्हाइमुबा।  
 तर थेनीगदेसे आम्राड्नी, ओच्छे एनीगदेसे थे:बा ताम थेनीगदेसे  
 थे:बारी म्हाइजी, तर थे:बारी आम्याड्नी।”\*

ब्लु ढ्वबा उखानना अर्थ

मर्कूस ४:१३-२०; लूका ८:११-१५

18 “लु, ब्लु ढ्वबा उखानना अर्थ ड्यान्गो। 19 ग्यामरीक्यार  
 परब तबा ब्लुला अर्थ चुनोन हिन्ना, जुन म्हिसे परमेश्वरला  
 बचन ड्यान्ना, तर थेसे घोबा भन्दा डाच्छान शैतान खसी  
 थेनीगदेला सेमग्याम थे ताम ब्यन्सी भोर्ला। 20 युड्बाला घहड  
 मुबा सरीक्यार परब तबा ब्लुला अर्थ चुनोन हिन्ना, जुन म्हिसे  
 परमेश्वरला बचन ड्यान्सी तुरुन्तन विश्वास लला। 21 तर  
 थेनीगदेला विश्वासला टा आरेबासे लमा, थे छिन्नड जे चिला।

\* 13:15 यशै ६:९-१० \* 13:17 लूका १०:२३-२४

ओच्छे परमेश्वरला बचनदा विश्वास लबासे लमा थेनीगदेदा आपत विपत खमाहेन्से थेनीगदेसे विश्वास लबा खलाला।<sup>22</sup> पुजु झाड न्हडरी परब तबा बलुला अर्थ चा जुन म्हिसे परमेश्वरला बचन ड्यान्ना, तर चु जम्बुलिडला धन्दा सुर्दादेन धन सम्पत्तिला लोभसे लमा परमेश्वरला बचनदा गे लआपुड्। थेतबासेलमा थेला विश्वासग्याम तिगै आरो।<sup>23</sup> तर ज्यबा सरी परब तबा बलुला अर्थ चा जुन म्हिसे परमेश्वरला बचन ड्यान्सी ह्याडला सेमरी थान्ना, ओच्छे थेला विश्वासग्याम दोब्बर, तेब्बर, चौबरधोनाला रो रोला।”

### कोडोड माला उखान

<sup>24</sup> दोःसी येशूसे थेनीगदेदा उखान गिक सुड्जी, “च्यागो, स्वर्गला यहुल्सा ह्याडला बुरी ज्यबा बलु ढ्वबा म्हि हड्बान हिनना।<sup>25</sup> तर जम्मान म्हिगदे महेर्बा धुडरी थेला शत्रु खसी ग्वा न्हडरी कोडोडं ढ्वसी निजी।<sup>26</sup> थे ग्वा ल्हेबान निसी रोबा धुडरी चा ग्वा न्हडरी कोडोडला दोडएनोन म्राड्जी।

<sup>27</sup> “थेतबासेलमा नोकरगदे दिमला मालिक मुबा ग्लारी खसी ‘बुरी ह्याडसे ग्वा जे ढ्वबा आहिन? थेरीम कोडोडएनोन फुड्जीम’ भिसी भिजी।

<sup>28</sup> “जमाहेन्से दिमला मालिकसे थेनीगदेदा ‘खालै शत्रुसे चुहड् लबा हिनना’ भिसी भिमा, नोकरगदेसे ‘थेहड् भिसम डनी निसी थे कोडोड स्योड्सी भ्याड्गो?’ भिसी भिजी।

<sup>29</sup> “तर थे मालिकसे नोकरगदेदा चुहड् भिसी पाड्जी, ‘दान्देन थास्योड्गो, तिग्दा भिसम एनीगदेसे कोडोड भिसी स्योड्मा ग्वाएनोन स्योड्सी भ्याड्ला।<sup>30</sup> बरु ग्वा खन्बा धुड आततेधोना थेहड्बान मुगै। ग्वा खन्बा धुडरी खन्बागदेदा डाच्छा कोडोड

† 13:25 “कोडोड” भिबा चा सुन हड्बान म्राड्बा म्रा हिनना।

स्योइसी खाड्बाला लागिरी ग्ला गिकरी थान्गो। तर एनीगदेसे ग्वा जे भसी डाला भकारीरी थान्गो भिसी पाड्ला।”

पच्छै बलुला उखानदेन खमीरला उखान

मर्कूस ४:३०-३४; लूका १३:१८-२१

31 दोःसी येशूसे थेनीगदेदा अर्गु उखान गिक सुड्जी, “च्यागो, स्वर्गला यहूलसा म्हि गिकसे घुर्यानरी ढ्वबा पच्छै बलुला गेडा गिक हड्बान हिन्ना। 32 पच्छैला गेडा ढापढुपगदे न्हडरी जम्मान भन्दा जजा तसैनोन थे फुइसी ल्हेबान निसी दोडनोन दोला। ओच्छे थे पच्छै दोडला हाँगारी चरागदे खसी जड सहोसी चिला।”

33 दोःसीनोन येशूसे थेनीगदेदा अर्गु उखान गिक सुड्जी, “च्यागो, स्वर्गला यहूलसा चा गेडरी युबा खमीर हड्बान हिन्ना। थे खमीर म्रिडम्हेमे गिकसे फाम सोम ब्राी युसी ज्योप्ला। ओच्छे थे ब्रा आभोतेधोना थेसे घप्सी थान्ना।”

34 येशूसे महिला हुलदा जम्मान ताम उखानग्यामसे जे लोप्जी। उखान आसुड्तेधोना थेनीगदेदा येशूसे तिगै ताम आलोप्नी। 35 परमेश्वरसे अगमवक्ताग्याम सुड्बा ताम चुहड् लसी पूरा तजी, “डाइ ताम लमा उखानग्यामसे जे लला, ओच्छे जम्बुलिड ठुड्माहेन्से दान्देधोना था आरेबा ताम डाइ घोना लला।”\*

कोडोड म्राला उखानना अर्थ

36 जमाहेन्से थे महिला हुलदा ख्लासी येशू दिम न्हडरी फेप्जी। ओच्छे थेला चेलागदेएनोन दिम न्हडरी खसी, “बुरी फुइबा कोडोड म्राला उखानना अर्थ घोना लसी पिन्गो” भिसी इयोइमा, 37 येशूसे थेनीगदेदा चुहड् भिसी सुड्जी, “ज्यबा बलु ढ्वबा म्हि चा परमेश्वरसे पुइखबा म्हि हिन्ना। 38 बु भिबा चा चु जम्बुलिड हिन्ना ओच्छे ज्यबा बलु भिबा चा परमेश्वरला यहूलसाला

\* 13:35 भजन ७८:२

म्हिंगदे हिन्ना, कोडोड म्रा भिबा चा परमेश्वरदा बिरोध लबागदे हिन्ना। 39 ओच्छे कोडोड ह्वबा शत्रु चा शैतान हिन्ना, बाली खन्बा धुइ भिबा चा परमेश्वरसे जम्बुलिडला जम्मान म्हिंगदेला निसाफ लबा धुइ हिन्ना।† ओच्छे बाली खन्बागदे चा स्वर्गदूतगदे हिन्ना। 40 कोडोड स्योइसी म्हिंगदेसे खाहङ् लसी मेरी फर्मुला थेहङ् लसीन परमेश्वरसे जम्बुलिडला जम्मान म्हिंगदेला निसाफ लबा धुइरीनोन थेहङ् नोन लला। 41 जमा धुइरी परमेश्वरसे पुइखबा म्हिसेनोन डाला स्वर्गदूतगदेदा पुइखला। थेनीगदेसे म्हिंगदेदा पाप लपुड्बा जम्मान सहेदेन पाप गे लबा जम्मान म्हिंगदेदा डाला यहुल्साग्याम हुप लला। 42 ओच्छे थेनीगदेदा मेरी युला, थेरी थेनीगदे स्वा क्रेसी क्रेसी क्राबा क्रिङ्बा लला। 43 जमाहेन्से परमेश्वरसे म्हन्बा अन्छार भ्रबा म्हिंगदे हाडला परमेश्वर आबाला यहुल्सारी धिनी हङ् नोन यहाल यहाल तसी चिला। जुन म्हिदा घोबा सेम मुला थेसे ज्यना लसी ड्यान्सी घोउ।

ल्हुसी थान्बा धनना उखानदेन मोतीला उखान

44 “च्यागो, स्वर्गला यहुल्सा वारीरी ल्हुसी थान्बा धन हङ्बान हिन्ना। थे धन म्हि गिकसे स्यापजी। जमाहेन्से थे ल्हानान ताङ्सी थे धन थेरीन ल्हुसी थान्सी दिमरी निजी। ओच्छे थेसे हाडदेन छ्याम मुबा जति जम्मान चुङ्सी थे वारी ग्लुजी।

45 “चुहङ् लसीन स्वर्गला यहुल्सा ज्यबा खाल्ला मोती म्हाइसी भ्रबा व्यापारी हङ्बान हिन्ना। 46 थेसे ज्यबा खाल्ला मोती स्यापमाहेन्से हाडदेन छ्याम मुबा जति जम्मान चुङ्सी थे मोती ग्लुजी।

तार्डा चुङ्बा घ्याडला उखान

† 13:39 “निसाफ लबा धुइ” चा ग्रीक बाइबलरी जम्बुलिड जिन्बा धुइ भिसी भ्रिबा मुला। पद ४० देन ४९ पदरीनोन चुहङ् लसीन भ्रिबा मुला।

47 “थेह्ण्ड लसीन स्वर्गला य्हुल्सा समुन्द्ररी रोप्बा घ्याड ह्ण्डबान हिन्ना। थे घ्याडरी ल्हानान थरीला तार्डागदे परब तला। 48 ओच्छे घ्याड नाडनोन तार्डा परब तमाहेन्से म्हिगदेसे समुन्द्रला कुनीरी भसी गे खेल्बा तार्डागदे तार्डरी थान्ना, गे आखेलबा तार्डागदे पाखारी भ्याड्ला। 49 चुह्ण्डनोन लसी परमेश्वरसे जम्बुलिडला जम्मान म्हिगदेला निसाफ लबा धुडरीनोन स्वर्गदूतगदे खसी ज्यबा गे लबा म्हिगदेदेन नडबा गे लबा म्हिगदेदा फेला। 50 ओच्छे परमेश्वरसे कुल्बा ताम आड्यानबागदेदा चा मेरी युला। थेरी म्हिगदे स्वा क्रेसी क्रेसी क्राबा क्रिड्बा लला।”

### छारदेन पुरानो धन

51 जमाहेन्से येशूसे थेनीगदेदा “एनीगदेसे चु ताम जम्मान घोजी?” भिसी ड्योडमा, “घोजी” भिसी थेनीगदेसे येशूदा जोहाब पिन्जी। 52 थेतबासेलमा येशूसे चेलागदेदा “च्यागो, स्वर्गला य्हुल्साला बारेरी था याड्बा यहूदी धर्मगुरुगदे दिमला दोप्ता ह्ण्डबान हिन्ना। तिग्दा भिसम थेसे ह्ण्डला दुकुटीग्याम छारदेन पुरानो धनगदे ते:ला” भिसी सुड्जी।

### नासरतला म्हिगदेसे येशूदा मान आलबा

मर्कूस ६:१-६; लूका ४:१६-३०

53 चु उखानगदे सुड्सी जिन्माहेन्से येशू थेग्याम ह्ण्डला नाम्सारी फेप्जी। 54 ओच्छे ह्ण्डला नाम्सारी धोखमाहेन्से यहूदीगदे हुप तबा दिमरी फेप्सी थेरी मुबा म्हिगदेदा लोप्जी। येशूसे लोप्बा म्नाड्सी थेरी मुबा म्हिगदे उदेक तसी चुह्ण्ड भिजी, “चु म्हिसे चुह्ण्डबा उदेकला गे लबा शक्तिदेन बुद्धि खानडग्याम याड्जी? 55 चु सिकर्मीला झा आहिन? चुला आमा मरियम ओच्छे आलेगदे याकूब, योसेफ, सिमोनदेन यहूदा आहिन? 56 चुला जम्मान आडागदे

य्हाडदेन छ्यामनोन आरे? तसैनोन चुसे चु जम्मान ज्ञान बुद्धिदेन शक्ति खानडग्याम याड्जी?” 57 जमाहेन्से थेनीगदेदा येशूदेन छ्याम बोमो खजी।

तर येशूसे थेनीगदेदा “च्यागो, अगमवक्तादा हाडला नाम्सारीदेन हाडला दिमरी बाहेक अर्गु खजिबै ग्लारी निसैनोन मान लला” भिसी सुड्जी।\* 58 थेनीगदेसे विश्वास आलबा म्राड्सी येशूसे थेरी ल्हाना उदेकला गे आलनी।

## 14

बपत्तिस्मा पिन्बा यूहन्नादा साइबा

मर्कूस ६:१४-२९; लूका ९:७-९

1 थे धुडरी गालील अञ्चलरी शासन लबा हेरोदसे येशूसे लबा उदेकला गेला बारेरी थे:जी। 2 जमाहेन्से थेसे हाडला गे लबागदेदा “थे म्हि बपत्तिस्मा पिन्बा यूहन्ना हिन्ना। थे सिबाग्याम सोसी खबा हिन्ना। थेतबासेलमान थेसे चुहड्बा उदेकला गेगदे लबा हिन्ना” भिसी भिजी।

3 हेरोदसे हाडला आले फिलिपला म्रिड हेरोदियाससे लमा डाच्छा यूहन्नादा झ्याल्खानरी झाड्मुबा।\* 4 तिग्दा भिसम हेरोदसे हाडला आले चाडदा थान्बासे लमा यूहन्नासे हेरोददा “हाडसे आले चाडदेन छ्याम ब्याह लबा ठीक आहिन” भिसी पाड्मुबा।\* 5 थेतबासेलमा हेरोदसे यूहन्नादा साइबारी म्हाड्मुबा। तर हेरोद म्हिगदे म्राड्सी लोड्मुबा। तिग्दा भिसम म्हिगदेसे बपत्तिस्मा पिन्बा यूहन्नादा अगमवक्ता हिन्ना भिसी भिमुबा।

6 हेरोदसे हाड न्हबा धिनदा ढन्सी घेन भोज लजी। जमाकुनु हेरोदियासला झामे जम्मान म्हिगदेला डाच्छापट्टि स्य्हसी हेरोददा

\* 13:57 यूह ४:४४ \* 14:3 लूका ३:१९-२० \* 14:4 लेवी १८:१६; २०:२१

ल्हानान ताड्ना लजी। 7 थेतबासेलमा हेरोदसे थेदा “एसे जे ह्रीबा थेनोन पिन्ना” भिसी कबुल लजी।

8 तर थेला आमामसे थेदा बपतिस्मा पिन्बा यूहन्नाला थोबो ह्रीगो भिसी पाड्बासे लमा थेसे “डादा दान्देन बपतिस्मा पिन्बा यूहन्नाला थोबो खार्बारी भउ” भिसी भिजी।

9 जमाहेन्से हेरोद ग्लेदा ल्हानान दुख ड्हमजी। तसैनोन हाडला डोन्बोगदेला ओन्छाडरी जे ह्रीसै पिन्ना भिसी घान फाबासे लमा थेसे भिबा हड्नोन लउ भिसी सिपाहीगदेदा कुल्जी। 10 ओच्छे थेनीगदे झ्याल्खानरी निसी यूहन्नाला थोबो थाजी। 11 जमाहेन्से यूहन्नाला थोबो खार्बारी भसी थे माइदा पिन्जी। ओच्छे थे माइसे भोर्सी हाडला आमामादा पिन्जी। 12 यूहन्नादा साइजी भिबा ताम थे:माहेन्से यूहन्नाला चेलागदे खसी लास भोर्सी ल्हुजी। जमाहेन्से यूहन्नाला चेलागदे येशू मुबा ग्लारी खसी थे जम्मान ताम पाड्जी।

येशूसे हजार डा म्हिदा चबा सहे पिन्बा

मर्कूस ६:३०-४४; लूका ९:१०-१७; यूहन्ना ६:१-१५

13 बपतिस्मा पिन्बा यूहन्नादा साइजी भिबा ताम थे:माहेन्से येशू हाड गिक जे दोगारी क्रे:सी सुनसान ग्लारी फेपजी। तर येशू थेग्याम सुनसान ग्लारी फेपजी भिबा ताम थे:सी शहर शहरग्याम म्हिला हुल भ्रसीन येशू मुबा ग्लारी निजी। 14 येशू समुन्द्रला कुनीरी धोमा ल्हानान म्हिला हुलदा म्राड्सी थेदा दया रे:जी। थेतबासेलमा येशूसे थेनीगदेला आखम्बा म्हिगदेदा खम्ना लजी।

15 ओच्छे ड्यसे तमाहेन्से येशूला चेलागदे थे मुबा ग्लारी खसी “दाहेन्से ड्यसे तसी जिन्जी, चु सुनसान ग्लारी तिगै आरे। थेतबासेलमा चु म्हिगदेदा पुडगो। ओच्छे थेनीगदे नाम्सा नाम्सारी निसी हाड हाडला लागिरी चबा सहे ग्लुसी चगै” भिसी येशूदा पाड्जी।

16 तर येशूसे थेनीगदेदा “चु म्हिगदेदा तिग्दा पुइसे? एनीगदेसेन चुगदेदा चबा स्हे पिन्गो” भिसी सुड्जी।

17 जमाहेन्से थेनीगदेसे येशूदा “डन्देन छ्याम गोर डा गेडदेन गोर न्ही तार्डा भन्दा अर्गु तिगै आरे” भिसी भिजी।

18 येशूसे थेनीगदेदा “थे गेडदेन तार्डा डादा भउ” भिसी सुड्जी।

19 जमाहेन्से येशूसे म्हिगदेदा पाडरी चिपुड्जी। ओच्छे गेडदेन तार्डा यारी थोसी स्वर्गपट्टि स्हीबान परमेश्वरदा धन्यवाद पिन्जी। ओच्छे गेड क्युड्सी म्हिगदेदा भो लसी पिन्गो भिसी चेलागदेदा पिन्जी। जमाहेन्से चेलागदेसे भो लसी म्हिगदेदा पिन्जी। 20 जम्मान म्हिगदेसे भ्रेन्ना चसीनोन लेड्बा गेडदेन तार्डा चेलागदेसे च्युक न्ही सोली दुइजी। 21 थेरी गेड चबा म्हिगदे म्रिडम्हेमेदेन कोलागदे बाहेकनोन हजार डा हेम्फेबेगदे मुबा।

येशू समुन्द्रथोरी भ्रबा

मर्कूस ६:४५-५२; यूहन्ना ६:१६-२१

22 जमाहेन्से येशूसे तुरुन्तन हाडला चेलागदेदा दौंगारी क्रे:सी क्यामसडपट्टि हाड भन्दा डाच्छा पुड्जी। थे धुइरी येशूसे चा म्हिला हुलदा पुइबान लजी। 23 म्हिगदे पुइसी जिन्माहेन्से येशू हाड गिक जे प्रार्थना लबारी गडरी फेप्जी। थेरी ड्यसेधोनान येशू गिक जे मुबा। 24 थे धुइरी चेलागदे क्रे:सी निबा दौंगा समुन्द्रला कुनीग्याम ल्हानान थारेड धोसी जिन्बा मुबा। तसैनोन लाबा उलटोग्याम खबासे लमा समुन्द्ररी छाल रे:सी थेनीगदेदा क्यामसडपट्टि निबारी गाहो तबा मुबा।

25 स्य्होला तीन बजेरीक्यार येशू समुन्द्रथोरी भ्रबान थेनीगदेपट्टि फेप्खजी। 26 चेलागदेसे येशू समुन्द्रथोरी भ्रसी फेप्खबान लबा म्राड्सी “चु मी म्हडनोन हिन्ना!” भिसी थेनीगदे लोड्सी क्रिड्जी। 27 तर तुरुन्तन येशूसे थेनीगदेदा “भड लउ, डानोन हिन्ना, थालोड्गो” भिसी सुड्जी।

28 जमाहेन्से पत्रुससे येशूदा “प्रभु, ह्वाडनोन हिन्सम डादाएनोन समुन्द्रथोरी भ्रसी ह्वाड मुबा ग्लारी खउ भिसी सुड्गो” भिसी भिजी।

29 येशूसे “लु, खउ!” भिसी सुड्माहेन्से पत्रुस दौंगाग्याम फापसी येशू मुबा ग्लारी निबारी समुन्द्रथोरी भ्रबारी छ्याइजी। 30 तर घेन लाबा खबा म्हाड्सी थे लोड्जी। लोड्बासे लमा थे समुन्द्ररी डुबब तबारी छ्याइजी। जमाहेन्से थेसे “प्रभु, डादा जोगब लउ” भिसी क्रिड्जी।

31 येशूसे तुरुन्तन पत्रुसला या चुड्सी “खाइ एला विश्वास, एसे तिग्दा शङ्का लबा?” भिसी सुड्जी। 32 येशूदेन पत्रुस दौंगारी क्रेःमाहेन्से लाबा म्हाजी। 33 जमाहेन्से दौंगारी मुबा चेलागदेसे येशूदा फ्या लसी, “ह्वाड पक्कान परमेश्वरला झा हिन्ना” भिसी भिजी।

येशूसे आखम्बा ल्हानान म्हिगदेदा खम्ना लबा

मर्कूस ६:५३-५६

34 थेनीगदे समुन्द्र थासी गनेसरेत भिबा ग्लारी धोखजी। 35 थे ग्लाला म्हिगदेसे येशूदा डोसेमाहेन्से क्यारमारला नाम्साला म्हिगदेदा येशू फेपखजी भिसी पाड्सी पिन्जी। जमाहेन्से म्हिगदेसे आखम्बा म्हिगदे जम्मादान येशू मुबा ग्लारी भसी, 36 “चुगदेदा ह्वाडला क्वान्ना जो जे भिसै थुर्पुड्गो” भिसी बिन्ती लजी, ओच्छे येशूला क्वान थुर्बा जति जम्मान खम्जी।

## 15

रिमठिमला बारैरी लोपबा

मर्कूस ७:१-२३

1 यरूशलेमग्याम खबा फरिसीगदेदेन यहूदी धर्मगुरुगदे येशू मुबा ग्लारी खसी, 2 “ह्वाडला चेलागदेसे तिग्दा आखे म्हेमेला रिमठिमदा ख्लाबा? तिग्दा चबा भन्दा डाच्छा या आखुबा?”

भिंसी ड्योइमा, <sup>3</sup> येशूसे थेनीगदेदा चुहड् भिंसी सुड्जी, “एनीगदेसे चा तिग्दा परमेश्वरसे कुल्बा ताम आड्यान्ना आखे म्हेमेला रिमठिम तेन्बा? <sup>4</sup> तिग्दा भिसम परमेश्वरसे ‘एसे हाडला आबा आमामादा मान लउ,’ ओच्छे ‘जुन म्हिसे हाडला आबा आमामादा बिरोध लसी नइबा ताम लला थेदा चा साइनोन तोःला’ भिंसी सुड्बा मुला।\* <sup>5</sup> तर एनीगदेसे चा ‘जुन म्हिसे हाडला आबा आमामादा पिन्तोःबा स्हे परमेश्वरदा फुल्बा मुला, थेसे हाडला आबा आमामादा मान लआतोः’ भिंसी लोप्मुला। <sup>6</sup> चुहड् लसी एनीगदेसे हाडला रिमठिम अन्छार भ्रगै भिंसी परमेश्वरसे कुल्बा ताम चा गे आखेल्बा स्होबा मुला। <sup>7</sup> थेतबासेलमा कप्टीगदे, परमेश्वरसे यशैया अगमवक्ताग्याम सुड्बा ताम एनीगदेला गे अन्छार ढिक्बा मुला।

<sup>8</sup> ‘चु म्हिगदेसे सुडसे जे डादा मान लमुला,  
तर सेमहेन्से चा मान आलमुला।

<sup>9</sup> ओच्छे थेनीगदेसे डादा तेन्बाम तेन्मुला,  
तसैनोन परमेश्वरसे कुल्बा तामदा भन्दा म्हिसे स्होबा रिमठिमदा  
घेन म्हनमुला।’ ”\*

<sup>10</sup> जमाहेन्से येशूसे म्हिला हुलदा हाड मुबा ग्लारी ड्योइसी,  
“डाइ पाड्बा ताम तिग चीम भिंसी एनीगदेसे घोबारी म्हाइगो।  
<sup>11</sup> परमेश्वरदा तेन्बारी म्हिदा खजिबै चबा स्हेसे न्होड्ना आल।  
तर म्हिला सेमग्याम थोन्बा नइबा तामसे चा म्हिदा न्होड्ना  
लमुला” भिंसी सुड्जी।†

\* 15:4 प्रस्था २०:१२; २१:१७; वयव ५:१६; लेवी २०:९ \* 15:9 यशै २९:१३

† 15:11 यहूदीगदेला ठिम अन्छार खालैसे सय्हानदोदेन छयाम ढिक्सी परमेश्वरदा तेन्बारी थे चोखो ततोःबा मुबा। थे परमेश्वरसे कुल्बा खजिबै ताम अन्छार आभ्रनी भिसम थेदा अशुद्ध भिंसी पाड्मुबा ओच्छे थे दोःसी शुद्ध दोबारी थेसे बलि फुल्तोःबा मुबा।

12 जमाहेन्से चेलागदेदे येशू मुबा ग्लारी खसी “ह्वाडला ताम थेःसी फरिसीगदे ह्वाडदेन छ्याम बोमो खबा ताम ह्वाडदा था मुला?” भिसी पाङ्जी।

13 तर येशूसे चेलागदेदा चुह्ङ् भिसी सुङ्जी, “स्वर्गरी धन्छ्याबा डाला आबासे आसूबा दोडगदेदा स्योइसी भ्याङ्ला। 14 थेतबासेलमा थेनीगदेदा तिगै पाङ्आतोः। थेनीगदे मी आम्राङ्बा म्हिगदेदा लोपूबा मी आम्राङ्बा म्हिगदे हिन्ना। थेतबासेलमा मी आम्राङ्बा म्हिसे मी आम्राङ्बादान चुङ्सी भोर्सम न्हीनोन व्हाडरी ताङ्ला।”†\*

15 जमाहेन्से पत्रुससे येशूदा “म्हिगदेदा चबा सहेसे न्होङ्ना आलमुला भिसी ह्वाडसे सुङ्बा ताम डन्दा घोना लसी पिन्गो” भिसी भिमा, 16 येशूसे थेनीगदेदा चुह्ङ् भिसी सुङ्जी, “दान्देधोना अङ्ग एनीगदेसे घोबा आरे? 17 चबा सहे चमाहेन्से फोरी धोमुला। ओच्छे फोग्यामसेनोन मङ्ग्यार थोन्मुला भिबा ताम एनीगदेदा था आरे? 18 तर म्हिला सेमरी जुन ताम मुला थेनोन ताम सुङ्ग्याम थोन्मुला, ओच्छे थेनोन तामसे म्हिदा न्होङ्ना लमुला। 19 तिगदा भिसम म्हिला सेमग्याम थोन्बा नइबा तामगदे चा म्हि साङ्बा, म्हिला मिडदेन छ्याम ब्रेल्सी भ्रबा, खालैदेन छ्याम ब्रेल्सी भ्रबा, य्हो लबा, लुसीला ताम पाङ्बा ओच्छे म्हिला तामगन लबा हिन्ना। 20 चु जम्मान तामसे चा म्हिदा न्होङ्ना लमुला। तर या आखुना चसी म्हिदा न्होङ्ना आलमुला।”

अर्गु य्हलला मिडम्हेमेला विश्वास

मर्कूस ७:२४-३०

† 15:13 थे फरिसीगदे चा परमेश्वरसे आसूबा दोडगदे ह्ङ्बान हिन्ना। ओच्छे परमेश्वरसे थेनीगदे जम्मादान दोड स्योइबा ह्ङ् लसी लेःला, तिगदा भिसम थेनीगदेसे परमेश्वरसे महन्बा ह्ङ् लसी आलोपनी। † 15:14 चुदे खालै म्हि सत्य ताम आसेबा म्हिसे लोपूबा अन्छार भ्रजी भिसम तिरेकुनु थे नाश तसी निला। \* 15:14 लूका ६:३९

21 जमाहेन्से येशू थे शहर ख्लासी टुरोसदेन सीदोन भिबा ग्लारीक्यार फेपजी। 22 थे शहरला अर्गु यहुलला कनानी म्रिडम्हेमे गिक क्रिड्बान खसी येशूदा “प्रभु, दाऊद ग्लेला सन्तान, डादा दया लउ। डाला झामेदा म्हडसे ल्हानान दुख पिन्बा मुला” भिसी भिजी। 23 तर येशूसे तिगै जोहाब आपिन्नी। जमाहेन्से चेलागदेसे येशूदा “चु म्रिडम्हेमेदा चुग्याम पुइगो। तिगदा भिसम चु क्रिड्बान य्हाडला लिच्छा लिच्छा भसी छेर्ना लजी” भिसी बिन्ती लजी।

24 जमाहेन्से येशूसे थे म्रिडम्हेमेदा “च्यागो, परमेश्वरसे डादा म्हाबा ग्यु हड् तसी चिबा इस्राएलला म्हिगदेला लागिरी जे पुइखबा हिन्ना” भिसी सुड्जी।

25 तर थे म्रिडम्हेमेसे येशूदा फ्या लबान, “प्रभु, डादा हो लउ” भिसी भिजी।

26 जमाहेन्से येशूसे थे म्रिडम्हेमेदा “च्यागो, कोलागदेदा पिन्तोःबा गेड नगीदां पिन्बा ठीक आहिन” भिसी सुड्मा, 27 थे म्रिडम्हेमेसे “हिन्ना प्रभु, तर नगीसेनोन थेला दोप्तासे चमा सरी ताइबा भ्राइभुइ मी चम्याड्मुला” भिसी भिजी।

28 जमाहेन्से येशूसे थे म्रिडम्हेमेदा “माइ, एला विश्वास घेन चीम। एला विश्वाससे लमा एसे म्हन्बा हड् नोन तबा मुला” भिसी सुड्जी। थेनोन धुइरी थेला झामे खम्जी।

येशूसे ल्हानान थरीला रोगसे स्याप्बा म्हिदा खम्ना लबा

29 जमाहेन्से येशू थे ग्ला ख्लासी गालील समुन्द्रला कुनीग्याम गडरी फेपसी धन्छ्याजी। 30 ओच्छे महिला हुल येशू मुबा ग्लारी खजी। थेनीगदेसे कुज्या तबा, मी आम्राड्बादेन ताइ दोबा ओच्छे ल्हानान थरीला रोगसे स्याप्बा म्हिगदेदा भजी। जमाहेन्से येशूसे

† 15:26 यहूदीगदेसे अर्गु यहुलला म्हिगदेदा हेला लसी हि नगी भिसी पाइमुबा। तर येशूसे चा यहूदीगदेदा कोलागदेदेन छ्याम ओच्छे अर्गु यहुलला म्हिगदेदा चा दिमला नगीदेन दाँजब लसी घोना लसी सुड्बा मुबा।

थे आखम्बा म्हिगदेदा खम्ना लजी। <sup>31</sup> येशूसे ताइ दोबा म्हि, कुज्या म्हि, मी आम्राड्बा म्हिदेन जम्मान आखम्बा म्हिगदेदा खम्ना लबा म्राड्सी थेरी मुबा जम्मान म्हिगदे उदेक म्हन्सी इस्राएलला म्हिगदेसे तेन्बा परमेश्वरला जयजयकार लजी।

येशूसे हजार बलि म्हिदा चबा सहे पिन्बा  
मर्कुस ८:१-१०

<sup>32</sup> जमाहेन्से येशूसे चेलागदेदा हाड मुबा ग्लारी ड्योइसी, “चु म्हिगदे म्राड्सी डादा दया रे:जी। तिग्दा भिसम चुगदे डादेन छ्याम भ्रबा तिनी सोमरे तजी। ओच्छे चुगदेदेन छ्याम तिगै चबा सहे आरे। थेतबासेलमा चुगदेदा फोइथाननोन पुइबारी आत। फोइथाननोन दिमरी पुइजी भिसम चुगदे ग्यामरीन बिहोस तला” भिसी सुड्जी।

<sup>33</sup> जमाहेन्से चेलागदेसे येशूदा “चुहड्बा तिगै आयाड्बा ग्लारी चुदेला महिला हुलदा ख्वाबारी डन्से खानड्ग्याम गेड भसे?” भिसी भिजी।

<sup>34</sup> येशूसे थेनीगदेदा “एनीगदेदेन छ्याम गेड गाते मुला?” भिसी ड्योइमा, थेनीगदेसे “डन्देन छ्याम गोर निस गेडदेन जजाबा तार्डागदे जजाकी मुला” भिसी भिजी।

<sup>35</sup> जमाहेन्से येशूसे थेरी मुबा महिला हुलदा पाडरी चिपुड्जी। <sup>36</sup> येशूसे गोर निस गेडदेन तार्डा थोसी परमेश्वरदा धन्यवाद पिन्जी। ओच्छे गेड क्युइसी चेलागदेदा पिन्जी। जमाहेन्से चेलागदेसे म्हिगदेदा भो लसी पिन्जी। <sup>37</sup> ओच्छे जम्मान म्हिगदेसे मेन्ना चजी। जमाहेन्से चेलागदेसे लेड्बा गेडदेन तार्डा दुइमा सोली निस तजी। <sup>38</sup> थेरी चबागदे न्हडरी कोलागदेदेन म्रिड्म्हेमे बाहेकनोन हेम्फेबेगदे जे हजार बलि मुबा। <sup>39</sup> जमाहेन्से येशूसे जम्मान म्हिगदेदा पुइजी। ओच्छे येशू हाडला चेलागदेदेन छ्याम दौंगारी क्रे:सी मगादान भिबा नाम्सारीक्यार फेपजी।

## 16

यहूदी धर्मगुरुगदेसे येशूदा स्वर्गला चिनु उन्गो भिसी पाड्बा  
मर्कूस ८:११-१३; लूका १२:५४-५६

<sup>1</sup> कोइ कोइ फरिसीगदेदेन सदुकीगदे येशूला सेम च्याबाला  
लागिरी येशू मुबा ग्लारी खजी। ओच्छे “चुदे हाड परमेश्वरग्याम  
फेपूखबा हिन्सम उन्दा स्वर्गला चिनु उन्गो” भिसी पाड्मा,\*  
<sup>2</sup> येशूसे थेनीगदेदा चुहड् भिसी सुड्जी, “एनीगदेसे ड्यसे मु वाला  
तबा म्राड्सम ‘न्हडगर धिन ज्यबा तला’ भिसी भिमुला। <sup>3</sup> ओच्छे  
स्य्होरी चा खसुदेन मु वाला तबा म्राड्सम ‘तिनी लाबालुडसर  
खनम’ भिसी मु च्यासी एनीगदेसे धिन फेबारी खम्मुला। तर  
एनीगदेदा ज्यना लसी उन्बा चु धुइला चिनु चा एनीगदेसे घोखम्बा  
आरे। <sup>4</sup> नइबा बानिबेहोर थोसी स्य्हान्दोदेन छ्याम ब्रेल्सी भ्रबा  
महिगदेसे उदेकला चिनु जे म्हाइमुला। तर दान्देला महिगदेदा चा  
योना अगमवत्काला चिनु बाहेक अर्गु चिनु आउन।” जमाहेन्से येशू  
थे ग्लाग्याम फेपूजी।\*

येशूसे फरिसीदेन सदुकीगदेला खमीरला बारेरी सुड्बा  
मर्कूस ८:१४-२१

<sup>5</sup> समुन्द्रला क्यामसडपट्टि धोखमाहेन्से गेड भबारी म्ले:जीम  
भिसी चेलागदेसे था याड्जी। <sup>6</sup> थेनोन धुइरी येशूसे थेनीगदेदा  
“च्यागो, एनीगदे फरिसीदेन सदुकीगदेला खमीरग्याम होशियार  
तसी चिउ” भिसी सुड्जी।\*

<sup>7</sup> तर चेलागदेसे चा “यहाडसे गेड भबारी म्ले:बासे लमा  
येशूसे चुहड् सुड्बा हिन्ना” भिसी हाड हाड न्हडरी ताम लबारी  
छ्याइजी।

\* 16:1 मत्ती १२:३८; लूका ११:१६ \* 16:4 मत्ती १२:४०; लूका ११:२९ \* 16:6  
लूका १२:१

8 येशूसे चु ताम था याङ्सी, “एनीगदे खाहङ्बा विश्वास आरेबा म्हिगदे! एनीगदेसे हाडदेन छ्याम गेड आरे भिसी तिग्दा ताम लसी चिबा? 9 एनीगदेसे अझ घोबा आरे? डाइ गोर डा गेडसे हजार डा म्हिगदेदा ख्वामा एनीगदेसे गाते सोली गेड दुइबा मुबा? थे ताम म्ले:सी जिन्जी? \* 10 ओच्छे डाइ गोर निस गेडसे हजार बलि म्हिगदेदा ख्वामा एनीगदेसे गाते सोली दुइमुबा? \* 11 एनीगदेसे अझ तिग्दा आघोबा? डाइ एनीगदेदा गेडला बारेरी पाङ्बा आहिन। तर फरिसीदेन सदुकीगदेला खमीर हङ्बान तामग्याम होशियार तसी चिउ” भिसी पाङ्बा हिन्ना।

12 जमाहेनसे थेनीगदेसे येशूसे गेडरी युबा खमीरग्याम आहिन, तर फरिसीदेन सदुकीगदेसे लोप्बा तामग्याम होशियार तसी चिउ भिसी सुङ्बा चीम भिसी घोजी।

येशू परमेश्वरला म्हि ख्रीष्ट हिन्ना

मर्कूस ८:२७-३०; लूका ९:१८-२१

13 कैसरिया फिलिप्पी भिबा ग्लारी धोखमाहेनसे येशूसे हाडला चेलागदेदा “म्हिगदेसे परमेश्वरसे पुइखबा म्हिदा खाल भिसी भिमुला?” भिसी ड्योइमा, 14 चेलागदेसे “खालैसे बपुत्तिस्मा पिन्बा यूहन्ना, खालैसे एलिया अगमवक्ता, खालैसे यर्मिया अगमवक्ता थेहङ् लसीन खालैसे अगमवक्तागदे न्हडला गिक हिन्ना भिसी भिमुला” भिसी येशूदा जोहाब पिन्जी। \*

15 दो:सी येशूसे थेनीगदेदा “तर एनीगदेसे चा डा खाल भिसी म्हन्मुला?” भिसी ड्योइमा, 16 सिमोन पत्रुससे “हाड परमेश्वरला झा थार्बा पिन्बा ख्रीष्ट हिन्ना” भिसी भिजी। \*

17 जमाहेनसे येशूसे थेदा “योनाला झा सिमोन, एसे परमेश्वरग्याम मोलम याङ्बा मुला। तिग्दा भिसम चु ताम

\* 16:9 मत्ती १४:१७-२१

\* 16:10 मत्ती १५:३४-३८

\* 16:14 मत्ती १४:१-२;

मर्कू ६:१४-१५; लूका ९:७-८

\* 16:16 यूह ६:६८-६९

एदा म्हिगदेसे पाङ्सी था तबा आहिन। तर स्वर्गरी धन्छ्याबा डाला आबासे सुङ्सी था याङ्बा हिन्ना।<sup>18</sup> च्यागो, एसे डाला ताम ड्यानगो, एला मिन पत्रुसां हिन्ना। चु युडबाला पहराथोरी डाइ डाला मण्डली सहोला। चु मण्डलीदा कालला शक्तिगदेसे खाइमै ढाबारी आखम।<sup>19</sup> थेतबासेलमा डाइ एदा स्वर्गला य्हुल्साला साँचोगदे पिन्ना। एसे जम्बुलिडरी जुन सहे ढुङ्ला, थे सहे स्वर्गरीनोन ढुङ्ला। ओच्छे एसे जम्बुलिडरी जुन सहे ठोङ्ला, थे सहे स्वर्गरीनोन ठोङ्ला” भिसी सुङ्जी।†\*<sup>20</sup> तर चेलागदेदा येशूसे “डा थाबां पिन्बा ख्रीष्ट हिन्ना भिसी खालैदा थापाङ्गो” भिसी सुङ्जी।

येशूसे हाड खाहङ् लसी सिला भिबा ताम चेलागदेदा सुङ्बा  
मर्कस ८:३१-९:१; लूका ९:२२-२७

<sup>21</sup> जमाहेन्से येशूसे हाडला चेलागदेदा “यरूशलेमरी निसी डाइ यहूदी गन्बागदे, परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदेग्याम ल्हानान दुख नातोःला। थेनीगदेसे डादा दुख पिन्सी पिन्सीन साइला। तसैनोन डादा सिबाग्याम सोमरेमाकुनु सोना लला” भिसी सुङ्जी।

<sup>22</sup> चु ताम थेःमाहेन्से पत्रुससे येशूदा जजाकी क्याथाड भोर्सी “प्रभु, हाडदा परमेश्वरसे खाइमै चुहङ् तआपुङ्गै, हाडदा चुहङ् खाइमै आत!” भिसी बङ्जी।

<sup>23</sup> तर येशू फ्लिक दोःसी पत्रुसदा “डादा कोल्ना लबारी म्हाइबा शैतान, ए चुग्याम थोन्सी निउ! तिग्दा भिसम एसे परमेश्वरसे सुङ्बा तामदा भन्दा म्हिगदेला तामदा सेम लमुला” भिसी सुङ्जी।

† 16:18 “पत्रुस” भिबाला अर्थ चा युडबा हिन्ना। † 16:19 चु पदरी येशूसे पत्रुसदा मण्डलीरी तिगै ताम लपुङ्बादेन लआपुङ्बा अधिकार पिन्ना भिसी सुङ्जी। \* 16:19 मत्ती १८:१८; यूह २०:२३

24 जमाहेनसे येशूसे हाडला चेलागदेदा चुहड् भिसी सुड्जी, “खालै म्हि डाला चेला दोबा सेम मुसम थेसे हाडला ज्याननोन माया मारब लसी हाडला क्रुस हाडसेन पुइसी डादेन छ्याम भ्रगै।\* 25 तिग्दा भिसम जुन म्हिसे हाडला ज्यान जोगब लबारी म्हाइला, थे म्हिसे जुकजुकधोनाला जुनी आयाड्। तर डाला लागिरी ज्याननोन पिन्खम्बा म्हिसे चा जुकजुकधोनाला जुनी याड्ला।\* 26 म्हिसे जम्बुलिडनोन यारी किन्सी हाडला ज्यान चा निजी भिसम थेदा तिग ज्यबा तला? जम्बुलिडरी म्हिला ज्यान भन्दा घेन अर्गु तिगै स्हे मुला? 27 तिग्दा भिसम लिच्छा परमेश्वरसे पुइखबा म्हि हाडला आबाला घेन य्हालदेन शक्तिरी स्वर्गदूतदेन छ्याम खला। ओच्छे थेसे जम्मान म्हिदा थेनीगदेसे लबा गे अन्छारला इनाम पिन्ना।\* 28 च्यागो, एनीगदेसे डाला ताम ड्यानगो, चुरी मुबा म्हिगदे न्हडला कोइ कोइ म्हि चा परमेश्वरसे पुइखबा म्हि हाडला यहुल्सारी खबा आम्राड्तेधोना आसि।”

## 17

येशूला स्य्हाल पोबा

मर्कूस ९:२-१३; लूका ९:२८-३६

1 दुरे लिच्छा येशूसे पत्रुस, याकूबदेन याकूबला आले यूहननादा जे हाडदेन छ्याम नोबा गडरी भोर्सी फेपूजी। 2 चेलागदेसे च्याना च्यानान येशूला स्य्हाल पोसी धिनी हड् य्हाल य्हाल तजी। ओच्छे थेला क्वानएनोन धिनीला स्हेर हड्बान तजी।† 3 थेनोन धुइरी थेनीगदेसे थेरी मोशादेन एलिया, येशूदेन छ्याम ताम लबान

\* 16:24 मत्ती १०:३८; लूका १४:२७ \* 16:25 मत्ती १०:३९; लूका १७:३३; यूह १२:२५ \* 16:27 मत्ती २५:३१; भजन ६२:१२; रोमी २:५ † 17:2 “क्वानएनोन धिनीला स्हेर हड्बान तजी” कोइ कोइ बाइबलरी चा तार तार तजी भिसी भ्रिबा मुला। तर ग्रीक बाइबल अन्छार चु पदला मुल अर्थ चा धिनीला स्हेर हड्बान य्हाल य्हाल तजी भिसी पाड्बा हिन्ना (मर्कूस ९:३; लूका ९:२९)।

लबा म्राड्जी। 4 चु म्राड्सी पत्रुससे येशूदा “प्रभु, य्हाड चुरी मुबा ज्यबा तजीम। ह्वाडदा ज्यबा छोर्सम चुरी डाइ छाप्रो सोम स्होला, गिक ह्वाडला लागिरी, गिक मोशाला लागिरी ओच्छे गिक एलियाला लागिरी” भिसी भिजी। 5 थेसे थेह्ण्ड पाड्ना पाड्नान तार तार्बा खसु खसी थेनीगदेदा घप्जी। थे खसु न्हड्ग्याम “चु डाइ सेमहेन्से माया लबा डाला झा हिनना, थेदा म्राड्सी डा ल्हानान ताड्बा मुला। थेतबासेलमा एनीगदेसे चुसे भिबा ताम ड्यान्गो” भिबा काइ थे:जी।\*

6 थे ताम थे:माहेन्से चेलागदे लोड्सी सरी ख्लुप तजी। 7 तर येशू थेनीगदे मुबा ग्लारी खसी थेनीगदेदा थुर्सी “रे:गो, एनीगदे थालोड्गो” भिसी सुड्जी। 8 जमाहेन्से थेनीगदे रे:सी च्यामा थेरी येशू बाहेक स्य्हान्दो खालैदा आम्राड्नी।

9 जमाहेन्से येशू ह्वाडला चेलागदेदेन छ्याम गड्ग्याम फापबान लबा धुइरी येशूसे चेलागदेदा “च्यागो, परमेश्वरसे पुइखबा म्हि सिबाग्याम आसोतेधोना एनीगदेसे तिनी म्राड्बा चु ताम खालैदा थापाड्गो” भिसी सुड्जी।

10 जमाहेन्से चेलागदेसे येशूदा “यहूदी धर्मगुरुगदेसे तिग्दा एलिया अगमवक्ता डाच्छा खतो:ला भिबा?” भिसी ड्योइमा,\* 11 येशूसे चेलागदेदा चुह्ण्ड भिसी सुड्जी, “हिनना, डाच्छा एलिया खला ओच्छे थेसे जम्मान ताम ढिक्ना लला। 12 तर एनीगदेसे डाला ताम ड्यान्गो, तिग्दा भिसम एलिया खसी जिन्बा मुला। तसैनोन थेदा डोआसेना म्हिगदेसे जे लइ म्हनबा थेनोन लजी। थेह्ण्ड लसीन परमेश्वरसे पुइखबा म्हिसेनोन थेनीगदेला याग्याम ल्हानान दुख नातो:बा मुला।”\* 13 जमाहेन्से येशूसे बपत्तिसमा पिन्बा यूहन्नाला बारेरी सुड्जीम भिबा ताम चेलागदेसे घोजी।

\* 17:5 वयव १८:१५; भजन २:७; यशै ४२:१; मत्ती ३:१७; मर्कु १:११; लूका ३:२२; २ पत्रु १:१७-१८ \* 17:10 मला ४:५ \* 17:12 मत्ती ११:१४

येशूसे म्हडसे स्यापबा कोलादा खम्ना लबा

मर्कूस ९:१४-२९; लूका ९:३७-४३

14 थेनीगदे म्हिला हुल मुबा ग्लारी धोखमाहेन्से म्हि गिक  
येशूला डाच्छापट्टि पुइ जूसी, 15 “प्रभु, डाला झादा दया लउ, तिगदा  
भिसम थेदा सह म्हडसे ल्हानान दुख पिन्बा मुला। थेदा खाइमाम  
मेरी, खाइमाम क्युइरी भ्याइमुला। 16 थेदा खम्ना लसी पिन्गो  
भिसी डाइ ह्वाडला चेलागदे मुबा ग्लारी भमुबा। तर थेनीगदेसे  
खम्ना लबारी आखम्नी” भिसी भिजी।

17 जमाहेन्से येशूसे थेनीगदेदा “विश्वास आलबादेन नइबा  
सेम थोबा म्हिगदे, खाइमाधोना डा एनीगदेदेन छ्याम तला?  
खाइमाधोना डाइ एनीगदेदा नासे? थेदा चुरी भउ” भिसी सुइजी।  
18 ओच्छे येशूसे थे म्हडदा बइजी। बइमाहेन्से थे कोलाला  
लहुइग्याम म्हड थोन्सी यार्जी। जमाहेन्से थे कोला तुरुन्तन  
खम्जी।

19 ओच्छे चेलागदे सुटुक्क येशू मुबा ग्लारी खसी “तिगदा डन्से  
थे म्हडदा तापबारी आखम्नी” भिसी इयोइमा, 20 येशूसे थेनीगदेदा  
“एनीगदेला विश्वास आयोबासे लमा हिनना। थेतबासेलमा  
एनीगदेसे डाला ताम इयान्गो, चुदे एनीगदेदेन छ्याम पच्छैला ब्लु  
गिक ते:बा जे विश्वास मुसैनोन चु गडदा ‘चुग्याम ले:उ’ भिसम  
थे ले:ला। एनीगदेला लागिरी आतबा गे तिगै आरे।†\* 21 तसैनोन  
चुहइबा म्हड चा फोइथान चिसी प्रार्थना आलतेधोना थोन्सी  
आयार्मुला” भिसी सुइजी।†

† 17:20 म्हिसे गाते विश्वास लबा मुला भिबा चा घेन ताम आहिन, तर थेला जजाबा  
विश्वासरी परमेश्वरला शक्ति गाते घेन मुला भिबा ताम चा घेन ताम हिनना। \* 17:20  
मत्ती २१:२१; मर्कूस ११:२३; १ कोर १३:२ † 17:21 चु पदला ताम ल्हाना हइबा ग्रीक  
बाइबलरी भिबा आरे। मर्कूस ९:२९ सहीगो।

येशूसे हाड खाहड लसी सिला भिबा ताम दोःसी सुड्बा  
मर्कूस ९:३०-३२; लूका ९:४३-४५

22 थेनीगदे गालील अञ्चलरी हुप तबा धुडरी येशूसे चेलागदेदा  
“परमेश्वरसे पुइखबा म्हिदा म्हिगदेला यारी जिम्मा पिन्ना।  
23 थेनीगदेसे थेदा साइला। तसैनोन सिसी सोमरेमाकुनु थेदा  
सिबाग्याम सोना लला” भिसी सुड्जी। चु ताम थेःसी चेलागदेदा  
ल्हानान दुख ड्हम्जी।

परमेश्वरला मन्दिरला तिरो

24 येशू हाडला चेलागदेदेन छ्याम कफर्नहुम नाम्सारी फेपखबा  
धुडरी परमेश्वरला मन्दिरला तिरो दुड्बा म्हिगदे पत्रुस मुबा ग्लारी  
खसी, “एनीगदेला गुरुसे परमेश्वरला मन्दिरला तिरो फामुला कि  
आफामुला?” भिसी ड्योइमा,\* 25 पत्रुससे “फामुला” भिसी भिजी।  
जमाहेन्से पत्रुस दिम न्हडरी वाड्सी येशूदा पाड्बारी छ्याइमा  
येशूसेन, “सिमोन, एला तिग सेम मुला? जम्बुलिडला ग्लेगदेसे  
हाडलान म्हिगदेग्याम तिरो दुइमुला कि स्य्हान्दो म्हिगदेग्याम  
दुइमुला?” भिसी ड्योइजी।

26 पत्रुससे “स्य्हान्दो म्हिगदेग्याम दुइमुला” भिसी जोहाब  
पिन्जी।

जमाहेन्से येशूसे चुहड् भिसी सुड्जी, “थेहड् भिसम हाडला  
म्हिगदेसे चा आफासै तबा चीम। 27 तसैनोन ए समुन्द्ररी निसी  
बल्छीसे तार्डा साइसी भउ। एसे जम्मान भन्दा डाच्छा साइबा  
तार्डाला सुडरी च्यागो, एसे थेला सुडरी म्हुइला डबल गिक  
स्याप्ला। थे डबल भोर्सी यहाड न्हीला तिरो फागो। थेनीगदे  
यहाडदेन छ्याम बोमो थाखगै।”

\* 17:24 प्रस्था ३०:१३; ३८:२६

## 18

परमेश्वरला यहुल्सारी खाल घेन तला

मर्कूस ९:३३-३७, ४२-४८; लूका ९:४६-४८; १७:१-२

1 थे धुइरी चेलागदे येशू मुबा ग्लारी खसी, “स्वर्गला यहुल्सारी जम्मान भन्दा घेन खाल तला?” भिसी ड्योइमा,\* 2 येशूसे कोला गिकदा ड्योइजी। ओच्छे थेनीगदेला गुडरी रापुड्सी, 3 चुहड् भिसी सुड्बारी छ्याइजी, “च्यागो, एनीगदेसे डाला ताम ड्यानगो, एनीगदेसे हाड हाडला सेम पोसी चु कोलागदे हड्बा आतनी भिसम खाइमै स्वर्गला यहुल्सारी वाड्आम्याड्।\* 4 जुन म्हि चु कोला हड्बान सोजो तला थेनोन स्वर्गला यहुल्सारी जम्मान भन्दा घेन तला। 5 जुन म्हिसे चुहड्बा कोलादा डाला मिनरी वास्ता लला, थेसे डादाएनोन वास्ता लला।

6 “तर जुन म्हिसे डादा विश्वास लबा चु कोलागदे न्हडला गिकदा पाप लपुड्ला, थेहड्बा म्हिदा मी खारेरी हान्दा च्योसी समुन्दरी डुबब लबान ज्यबा तला। 7 चु जम्बुलिडरी म्हिगदेदा पाप लपुड्बा स्हेगदे मुला। थेतबासेलमा चु जम्बुलिडला म्हिगदेसे परमेश्वरग्याम सजाय याड्ला। पाप लपुड्बा स्हेगदे मी मुनोन मुला, तसैनोन जुन म्हिसे स्य्हान्दोदा पाप लपुड्ला थे परमेश्वरग्याम सजाय याड्बा म्हि हिन्ना।

8 “एला यादेन काडरी खजिबासे चा एदा पाप लपुड्ला थे थासी भ्याड्गो। तिग्दा भिसम या काड मुसी खाइमै आसिबा मेरी निबा भन्दा मी बरु ठुडे तसी जुकजुकधोनाला जुनी याड्बा चा एला लागिरी ज्यबा तला।\* 9 एला मीसे एदा पाप लपुड्जी भिसम तेःसी भ्याड्गो। तिग्दा भिसम मी न्हीनोन मुसी नर्गरी खाइमै आसिबा

\* 18:1 लूका २२:२४

\* 18:3 मर्कू १०:१५; लूका १८:१७

\* 18:8 मत्ती ५:३०

मेरी निबा भन्दा मी बरु काना तसी जुकजुकधोनाला जुनी याड्बा चा एदा ज्यबा तला।\*

महाबा ग्युला उखान

लूका १५:३-७

10 “च्यागो, एनीगदेसे चु कोलागदे न्हडरी खालैदान हेला थालउ। तिग्दा भिसम चु कोलागदेदा च्याबा स्वर्गदूतगदे स्वर्गरी धनछ्याबा डाला आबादेन छ्याम सदन तला। थेतबासेलमा एनीगदे होशियार तसी चिउ।† 11 तिग्दा भिसम परमेश्वरसे पुइखबा म्हि म्हाबागदेदा म्हाइबारीदेन थार्बा पिन्बारी खबा हिन्ना।†

12 “च्यागो, खालै म्हिला ग्यार्जा गिक ग्यु न्हडरी गिक म्हाजी भिसम थेसे तिग लला? तिग थेसे बोगल बलिसे च्युक कु ग्युदा गडरीन ख्लासी म्हाबा ग्यु म्हाइबारी आनि? 13 च्यागो, डाला ताम ड्यानगो, चुदे थे म्हिसे म्हाबा ग्यु स्यापजी भिसम थे आम्हबा बोगल बलिसे च्युक कु ग्युगदेला लागिरी भन्दा थे स्यापबा ग्यु गिकला लागिरी ल्हानान ताड्ला। 14 थेहड् लसीन स्वर्गरी धनछ्याबा एनीगदेला परमेश्वर आबालाएनोन चु कोलागदे न्हडरी खालैनोन नाश थातगै भिबा सेम मुला।

बिरोध लबा म्हि

15 “चुदे परमेश्वरदा विश्वास लबा खालै म्हिसे एला बिरोध लसी आज्यबा गे लजी भिसम ए गिक जे थे मुबा ग्लारी निसी थेदा घोना लउ। चुदे एला ताम ड्यानसी थेसे हाडसे लबा आज्यबा गे ख्लाजी भिसम थे एला ह्यो तला।\* 16 तर थेसे एला ताम आड्याननी भिसम एसे हाडदेन छ्याम स्य्हान्दो म्हि गिक अथवा न्ही भोर्सी

\* 18:9 मत्ती ५:२९ † 18:10 येशूदा विश्वास लबा कोलागदे च्याबा स्वर्गदूतगदेसे कोलागदेला वास्तु लसी सदन थेनीगदेला बारेरी परमेश्वरदा पाड्मुला। † 18:11 चु पदला ताम ल्हाना हड्बा ग्रीक बाइबलरी भिबा आरे (लूका १९:१० सहीगो)। \* 18:15 लूका १७:३

निउ। ओच्छे परमेश्वरला बचनसे पाड्बा हड् म्हि न्ही अथवा सोम साक्षी थान्सी जम्मान ताम पक्का लउ।\* 17 थे म्हिसे थेनीगदेला तामएनोन आड्यान्नी भिसम एसे मण्डलीदा पाड्गो। मण्डलीला तामएनोन आड्यान्नी भिसम एसे थेदा परमेश्वरदा आतेन्बा म्हिदेन तिरो दुइबा म्हि हड्बान म्हनसी ख्लापिन्गो। 18 एनीगदेसे डाला ताम ड्यान्गो, एनीगदेसे जम्बुलिडरी जुन सहे ढुड्ला थे सहे स्वर्गरीनोन ढुड्ला। ओच्छे एनीगदेसे जम्बुलिडरी जुन सहे ठोड्ला, थे सहे स्वर्गरीनोन ठोड्ला।\*

19 “दोःसी डाइ एनीगदेदा पाड्ला, जम्बुलिडरी एनीगदे न्हडला म्हि न्ही ढिक्सी तिगै ताम ह्नीजी भिसम स्वर्गरी धन्छ्याबा डाला आबासे एनीगदेदा पिन्ना। 20 तिग्दा भिसम डाला मिनरी म्हि न्ही सोम ढिक्सी खजिबै ग्लारी हुप तजी† भिसम डा थेनीगदेदेन छ्याम तला।”

### माफ आपिन्बा नोकरला उखान

21 जमाहेन्से पत्रुससे येशूदा “प्रभु, परमेश्वरदा विश्वास लबा म्हिसे डादा आज्यना लजी भिसम डाइ थेदा गाते रेमधोना माफ लतोःबा? निसरेमधोना?” भिसी ड्योइमा, 22 येशूसे थेदा चुहड् भिसी जोहाब पिन्जी, “निसरेमधोना जे आहिन, एसे थेदा सदन माफ लउ!†” 23 तिग्दा भिसम स्वर्गला यहुल्सा मी गले गिक हड्बान हिन्ना। थेसे हाडला नोकरगदेदेन छ्याम हिसाब किताब किन्बारी म्हाइजी। 24 थे ग्लेसे हिसाब किताब किन्बारी छ्याइमा हजार च्युइ म्हरला डबल† छे किन्बा नोकरदा ग्ले मुबा ग्लारी भजी। 25 तर थे नोकरसे छे फाबारी आखम्बासे लमा ग्लेसे थेदा, थेला

\* 18:16 व्यव १९:१५ \* 18:18 मत्ती १६:१९; यूह २०:२३ † 18:20 डाला मिनरी हुप तबा भिबा चा येशूदा विश्वास लबा म्हिगदे हिन्ना। † 18:22 “सदन माफ लउ” भिबादा ग्रीक बाइबलरी चा सात गुण सत्तरी पल्ट माफ लउ भिसी भिबा मुला।  
\* 18:22 लूका १७:३-४ † 18:24 “हजार च्युइ म्हरला डबल” भिबा चा करोडौं करोड टाडगा हिन्ना।

मिड, झा झामेदेन थेदेन छ्याम मुबा जम्मान सहे चूड्सी जम्मान टाडगा किन्गो” भिसी कुल्जी।

26 जमाहेन्से थे नोकरसे ग्लेदा फ्या लबान, “हाडसे तिगै रेधोना भ्रान्गो। डाइ हाडला जम्मान टाडगा फाला” भिसी बिन्ती लजी।

27 थे नोकरदा म्राड्सी ग्लेदा दया रे:जी। ओच्छे ग्लेसे थेदा ‘दाहेन्से तजी, एसे चु छे फाआतो:’ भिसी ख्लापिन्जी।

28 “जमाहेन्से थे नोकर निजी। निबान लमा थेसे डाचछा ग्यार्जा गिक महुइला डबल पिन्बा होदा स्याप्जी। जमाहेन्से थेसे ह्योला खारेरी न्हेप्सी ‘डाला टाडगा दान्देन भउ’ भिसी भिजी। 29 जमाहेन्से थे होसे थेदा फ्या लबान, ‘तिगै रे भ्रान्गो डाइ एला जम्मान टाडगा पिन्ना’ भिसी बिन्ती लजी। 30 तर थेसे आड्यानना होदा टाडगा आपिन्तेधोना झ्याल्खानरी झाड्जी।

31 “थे नोकरसे थेहड् लबा म्राड्सी स्यहान्दो होगदेदा ल्हानान दुख ड्हम्सी थेसे लबा जम्मान ताम ग्लेदा पाड्जी। 32 थेहड्बा ताम थे:सी ग्लेसे थे नोकरदा हाड मुबा ग्लारी ड्योइजी। ओच्छे थेदा ‘पापी नोकर, एला ताम थे:सी डाइ दया लसी एसे फातो:बा जम्मान टाडगा ख्लापिन्जी। 33 डाइ एदा दया लमाहेन्से एसेनोन एला होदा दया लआतो:बा?’ भिसी भिजी। 34 थे नोकरला बेहोर म्राड्सी ग्लेदा ल्हानान बोमो खजी। जमाहेन्से थेदाएनोन जम्मान छे आफातेधोना सजाय पिन्बा म्हिगदेला यारी जिम्मा पिन्जी।

35 “थेहड् लसीन एनीगदेसेनोन परमेश्वरदा विश्वास लबा खालै म्हिदा सेमहेन्सेन माफ आलनी भिसम स्वर्गरी धन्छ्याबा डाला आबासेनोन एनीगदेदा थेहड् नोन लला।”

## 19

येशूसे छोडपत्र लबारी आत भिसी लोप्बा

मर्कस १०:१-१२

1 चु ताम सुड्सी जिन्माहेन्से येशू गालील अञ्चलग्याम यर्दन स्योडला क्यामसडपट्टि यहूदिया अञ्चलरी फेपूजी। 2 येशूला लिच्छा लिच्छा महिला हुल खजी। ओच्छे येशूसे थेनीगदेदा खमना लजी।

3 ओच्छे कोइ कोइ फरिसीगदेसे येशूला सेम च्याबाला लागिरी, “खालै म्हिसे हाडला मिडदा तिगै दोष उन्सी छोडपत्र लबा ठीक हिन्ना कि आहिन” भिसी ड्योइजी।

4 जमाहेन्से येशूसे थेनीगदेदा चुहड् भिसी सुड्जी, “परमेश्वरसे जम्बुलिड छ्यामाहेन्सेन ‘हेम्कोलादेन मिडकोला सहोबा हिन्ना’ भिबा ताम एनीगदेसे पढब लबा आरे?”\* 5 ‘थेतबासेलमा म्हिसे हाडला आबादेन आमादा ख्लासी हाडला मिडदेन छ्याम ढिक्सी चिमुला। ओच्छे थेन्नी ल्हुइ गिक हड्बान तला”\* 6 दाहेन्से थेन्नी ल्हुइ न्ही आहिन, तर ल्हुइ गिकनोन हिन्ना। थेतबासेलमा परमेश्वरसे सहोबा जोडीदा खालैसेन थाफेगै।”

7 थेनीगदेसे दोःसी येशूदा “थेहड् भिसम मोशासे तिग्दा छोडपत्र भिसी मिडदा ख्लागो भिसी कुल्बा?” भिसी ड्योइजी।\*

8 जमाहेन्से येशूसे थेनीगदेदा “मोशासे मी एनीगदेला सेम कोड्बासे मिडदा ख्लाबारी तला भिसी पाड्बा हिन्ना। तर डाच्छाहेन्से चा चुहड्बा ठिम आरेबा। 9 थेतबासेलमा एनीगदेसे डाला ताम ड्यानगो, जुन म्हिसे हाडला मिड स्य्हान्दोदेन छ्याम ब्रेल्सी आभ्रसै ख्लासी स्य्हान्दो मिडमहेमेदेन छ्याम ब्याह लला थेसे चा डाच्छाला मिडला बिरोधरी ब्रेल्सी भ्रबा हिन्ना। ओच्छे स्य्हान्दोसे ख्लाबा मिडमहेमेदेन छ्याम ब्याह लबा म्हिएनोन ब्रेल्सी भ्रबा हिन्ना”† भिसी सुड्जी।\*

\* 19:4 उत्प १:२७; ५:२ \* 19:5 उत्प २:२४ \* 19:7 व्यव २४:१-४; मत्ती ५:३१

† 19:9 चु ताम “स्य्हान्दोसे ख्लाबा मिडमहेमेदेन छ्याम ब्याह लबा म्हिएनोन ब्रेल्सी भ्रबा हिन्ना” भिसी ल्हाना हड्बा ग्रीक बाइबलरी भ्रबा आरे। \* 19:9 मत्ती ५:३२; १ कोर ७:१०-११

10 जमाहेन्से चेलागदेसे येशूदा “मिड हेम्बो न्हडरी चुहड् तसम ब्याह आलबान ज्यबा हिन्ना” भिसी भिजी।

11 येशूसे थेनीगदेदा चुहड् भिसी सुड्जी, “तर जम्मान म्हि ब्याह आलना चिबारी आखम। जुन म्हिदा परमेश्वरसे ब्याह आलना चिखम्बा शक्ति पिन्ना थे जे चिखम्ला। 12 तिग्दा भिसम कोइ न्हमान नपुंसक न्हमुला, कोइ म्हिदा चा स्य्हान्दो म्हिसे नपुंसक स्होसी थान्मुला। ओच्छे कोइ म्हि चा स्वर्गला य्हुल्साला गे लबारी नपुंसक हड् लसीन ब्याह आलना चिमुला। जुन म्हि चुहड् लसी चिखम्ला, थे म्हि जे चुहड् लसी चिउ” भिसी सुड्जी।

येशूसे कोलागदेदा मोलम पिन्बा

मर्कूस १०:१३-१६; लूका १८:१५-१७

13 येशूसे हाडला छ्या कोलागदेथोरी थान्सी मोलम पिन्गै भिसी म्हिगदेसे हाडला कोलागदेदा येशू मुबा ग्लारी भजी। चु म्राड्सी येशूला चेलागदेसे थे कोलागदे भबा म्हिगदेदा बड्जी। 14 तर येशूसे चेलागदेदा “कोलागदेदा डा मुबा ग्लारी खपुड्गो, थेनीगदेला ग्याम थाकागो। तिग्दा भिसम स्वर्गला य्हुल्सा चु कोलागदे हड्बालान हिन्ना” भिसी सुड्जी। 15 जमाहेन्से येशूसे कोलागदेथोरी हाडला छ्या थान्सी मोलम पिन्जी। ओच्छे येशू थे ग्याम फेप्जी।

परमेश्वरला य्हुल्सादेन फ्युक्पो म्हि

मर्कूस १०:१७-३१; लूका १८:१८-३०

16 फ्युक्पो म्हि गिक येशू मुबा ग्लारी खसी, “गुरु, जुकजुकधोनाला जुनी याड्बारी डाइ ज्यबा गे तिग लतो:ला?” भिसी ड्योइजी। 17 जमाहेन्से येशूसे थेदा “एसे डादा ज्यबा तिग हिन्ना भिसी तिग्दा ड्योइबा? च्यागो, ज्यबा मी परमेश्वर जे मुला। थेतबासेलमा एदा जुकजुकधोनाला जुनी याड्बा सेम मुसम परमेश्वरसे कुल्बा अन्छार भ्रउ” भिसी सुड्जी।

18 थे म्हिसे येशूदा “परमेश्वरसे कुल्बा खजिबा ताम?” भिसी भिमा, येशूसे थेदा चुहड् भिसी सुड्जी, “एसे म्हि थासाइगो, स्यूहान्दोदेन छ्याम ब्रेल्सी थाभ्रउ, य्हो थालउ, लुसीला ताम पाड्सी थाभ्रउ,\* 19 हाडला आबा आमादा मान लउ, ओच्छे एसे हाडला खिमजेमदा हाडदा हड्नोन माया लउ।”\*

20 जमाहेनसे थे म्हिसे येशूदा “चु जम्मान ताम मी डाइ लसीन चिबा मुला। दाहेनसे डाइ लतोःबा तिग मुला?” भिसी भिजी।

21 जमाहेनसे येशूसे थेदा “चुदे ए परमेश्वरदा सेम निबा म्हि दोबा हिन्सम एदेन छ्याम मुबा जम्मान धन सम्पत्ति चूड्सी प्राडबोगदेदा भो लसी पिन्गो। एसे स्वर्गरी धन सम्पत्ति याड्ला, ओच्छे डादेन छ्याम भ्रउ।” भिसी सुड्जी। 22 येशूला ताम थेःसी थे म्हि ल्हानान दुख ड्हम्सी निजी। तिग्दा भिसम थेदेन छ्याम ल्हानान धन सम्पत्ति मुबा।

23 ओच्छे येशूसे हाडला चेलागदेदा चुहड् भिसी सुड्जी, “च्यागो, एनीगदेसे डाला ताम ड्यानगो, फ्युकपो म्हिदा स्वर्गला यहुल्सारी वाड्बारी ल्हानान गाहो मुला। 24 दोःसी डाइ एनीगदेदा पाड्ला, फ्युकपो म्हिदा परमेश्वरला यहुल्सारी वाड्बारी भन्दा ऊंटदा दापला मीग्याम वाड्बारी सजिलो मुला।”

25 चुहड्बा ताम थेःसी चेलागदे उदेक म्हन्बान, “थेहड् भिसम खालसे थार्बा याड्ला?” भिसी येशूदा ड्योड्जी।†

26 जमाहेनसे येशूसे थेनीगदेदा सहीबान, “चु गे म्हिसे लबारीन आखम्बा गे हिन्ना। तर परमेश्वरसे चु जम्मान गे लखम्ला” भिसी सुड्जी।

\* 19:18 प्रस्था २०:१३-१६; वयव ५:१७-२० \* 19:19 प्रस्था २०:१२; वयव ५:१६; लेवी १९:१८ † 19:25 यहूदीगदेसे फ्युकपो म्हिगदेदा चा परमेश्वरसे मोलम पिन्मुला भिसी म्हन्मुबा।

27 जमाहेन्से पत्रुससे येशूदा “डन्से मी जम्मान सहे ख्लासी हाडदेन छ्याम भ्रबा मुला। दाहेन्से डन्से चा तिग याड्ला?” भिसी भिजी।

28 येशूसे थेनीगदेदा चुहड् भिसी सुड्जी, “एनीगदेसे डाला ताम ड्यान्गो, परमेश्वरसे छार जम्बुलिड सहोमा परमेश्वरसे पुइखबा म्हि य्हाल य्हाल्बा शक्तिशाली ठिरी चिबा धुइरी एनीगदे डादेन छ्याम भ्रबागदेएनोन हाडला च्युक न्ही ठिरी चिला। ओच्छे इस्राएलला च्युक न्ही वंशला निसाफ लला।\* 29 थेहड् लसीन जुन म्हिसे डाला लागिरी हाडला दिमनाम, ज्योज्ज्यो आले, नाना आडा, आबा आमामेन झा झामे खलाला, थेसे थे भन्दा दोब्वर, तेब्वर, चौबरधोना याड्ला। ओच्छे जुकजुकधोनाला जुनी याड्बा अधिकार याड्ला” भिसी सुड्जी। 30 तर दान्दे डाच्छा मुबागदे न्हडला ल्हानान म्हि लिच्छा तला। ओच्छे दान्दे लिच्छा मुबागदे चा डाच्छा तला।\*

## 20

### अडगुरला वारीरी गे लबागदेला उखान

1 “च्यागो, स्वर्गला यहलसा अडगुर वारीला दोप्ता गिक हड्बान हिनना। थे म्हि स्यहोरीन हाडला वारीरी गे लबारी म्हि म्हाइबारी निजी। 2 थेसे म्हि स्यापमाहेन्से धिन गिकला ज्याला तोगब लसी थेनीगदेदा अडगुर वारीरी गे लउ भिसी पुड्जी।

3 “दोःसी थे दोप्ता नौ बजेरीक्यार बजाररी निमा गे आयाड्ना चिबा म्हि म्हाड्जी। 4 जमाहेन्से थेसे थे म्हिगदेदा ‘एनीगदेएनोन डाला अडगुर वारीरी गे लबारी निउ। डाइ एनीगदेदा ठीक ज्याला पिन्ना’ भिसी भिमाहेन्से, 5 थेनीगदे गे लबारी निजी।

\* 19:28 मत्ती २५:३१

\* 19:30 मत्ती २०:१६; लूका १३:३०

“थेह्ङ् लसीन दोःसी थे दोप्तासे बाह् बजेदेन तीन बजेरीक्यारएनोन स्य्हान्दो म्हिगदे भसी गे लपुङ्जी।

6 “पाँच बजेरीक्यार दोःसी थे दोप्ता बजाररी निमा गे आयाङ्ना चिबा म्हिगदे स्यापुजी। थेतबासेलमा थेसे थे म्हिगदेदा ‘एनीगदे तिग्दा गे आलना धिन गिक य्होङ्सी चिबा?’ भिसी भिमा, 7 थेनीगदेसे ‘खाइ उन्दा खालैसेन गे आपिन्नी’ भिसी भिजी। जमाहेन्से थे दोप्तासे ‘थेह्ङ् भिसम एनीगदे डाला अङ्गुर वारीरी निसी गे लउ’ भिसी भिजी।

8 “इयसे तमाहेन्से थे अङ्गुर वारीला दोप्तासे नाइकेदा ‘गे लबागदे जम्मादान इयोइसी थेनीगदेदा ज्याला पिन्गो। ज्याला पिन्बा धुइरी जम्मान भन्दा लिच्छा गे लबारी खबा म्हिगदेदा डाच्छा पिन्गो, ओच्छे डाच्छा गे लबारी खबा म्हिगदेदा चा लिच्छा पिन्गो’ भिसी कुल्जी।\* 9 जमाहेन्से पाँच बजेरी गे लबारी खबा म्हि खजी। थेनीगदेदा धिन गिकलान ज्याला पिन्जी। 10 पाँच बजेरी खबागदेदा धिन गिकला ज्याला पिन्बा म्राङ्सी स्य्होरी जम्मान भन्दा डाच्छा खसी गे लबागदेसे चा य्हाङ्से मी थे भन्दा ल्हानान याङ्ला तला भिसी म्हनजी। तर थेनीगदेसेनोन धिन गिकला ज्याला जे याङ्जी। 11 ज्याला याङ्माहेन्से थेनीगदेसे थे अङ्गुर वारीला दोप्ताला बिरोध लबान ताम लबारी छ्याइजी। 12 ‘लिच्छा खसी घण्टा गिक जे गे लबा चुगदेदा डनी स्य्होहेन्से धिन गिकनोन छेपबा छबा नासी गे लबागदेदा तेनोन तिग्दा हाङ्से ज्याला पिन्बा’ भिसी थेनीगदेसे भिजी,

13 “तर थे अङ्गुर म्राङ्ला दोप्तासे थेनीगदे न्हङ्ला म्हि गिकदा चुह्ङ् भिसी जोहाब पिन्जी, ‘च्यागो, एनीगदेदा डाइ तिगै अन्याय लबा आरे। डाइ धिन गिकला ज्याला पिन्ना भिमा एसेन तला भिसी गे लबा आहिन? 14 थेतबासेलमा एला ज्याला भोर्सी निउ। लिच्छा

\* 20:8 लेवी १९:१३; वयव २४:१५

खसै चुगदेदा एदा तेनोन पिन्बा डाला सेम मुला। 15 डादेन मुबा सहे डाइ म्हन्बा अन्छार पिन्आम्याङ्? डाइ ताङ्सी पिन्बा ग्लारी एसे तिग्दा डाह लबा?

16 “चुहङ् लसी लिच्छाला म्हि डाच्छा, डाच्छाला म्हि लिच्छा तला।”†\*

डादा साइला भिसी येशूसे दोःसीनोन सुङ्बा

मर्कूस १०:३२-३४; लूका १८:३१-३४

17 यरूशलेमपट्टि फेपबान लबा धुइरी येशूसे हाडला च्युक न्ही चेलागदेदा कुनी गिकरी भोर्सी चुहङ् भिसी सुङ्जी, 18 “च्यागो, दान्दे यहाड यरूशलेमपट्टि निबान मुला। दाहेन्से परमेश्वरसे पुइखबा म्हिदा परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदेला यारी जिम्मा पिन्ना। जमाहेन्से थेनीगदेसे थेदा ‘चुदा साइनोन तोःला’ भिसी पाङ्ला। 19 ओच्छे थेदा अर्गु य्हुलला म्हिगदेला यारी जिम्मा पिन्ना। जमाहेन्से थेनीगदेसे थेदा खिसी लबान कोर्सासे तोबा ग्याङ्बा लसी कुसरी टाँगब लसी साइला। तर थेदा सोमरेमाकुनु सिबाग्याम सोना लला।”

जब्दियाला म्रिडसे लबा बिन्ती

मर्कूस १०:३५-४५

20 जमाहेन्से जब्दियाला म्रिडसे हाडला झा न्हीदा छ्यामनोन येशू मुबा ग्लारी भसी खजी। ओच्छे थेसे येशूदा फ्या लबान बिन्ती लजी।

† 20:16 चु उखानग्याम येशूसे लोपबा ताम चा डाच्छाहेन्से विश्वास लबा म्हिदेन लिच्छा विश्वास लबा म्हि न्हीसेन च्योच्यो इनाम याङ्ला भिबा हिन्ना। तिग्दा भिसम इनाम चा परमेश्वरला दयामायाग्याम ओहङ्गोन पिन्बा मोलम हिन्ना। \* 20:16 मत्ती १९:३०; मर्कू १०:३१; लूका १३:३०

21 जमाहेन्से येशूसे थेदा “एदा तिग तोःबा?” भिसी सुड्मा, थेसे येशूदा “हाडसे शासन लबा धुइरी डाला झा न्हीदा गिकदा हाडला दाहिनेपट्टि गिकदा देब्रेपट्टि चिपुड्ला भिसी सुड्गो” भिसी भिजी।

22 तर येशूसे थेनीगदेदा “तिग ह्नीदोबा भिसी एनीगदेदा थानोन आरे। डाइ नाबा दुख एनीगदेसे नाबारी खम्ला?” भिसी सुड्जी।  
थेनीगदेसे “खम्ला” भिसी भिजी।

23 जमाहेन्से येशूसे थेनीगदेदा “एनीगदेसे डाइ नाबा दुख मी नाला। तर डाला दाहिने देब्रे चिपुड्बा अधिकार डाला यारी आरे। चु ग्ला डाला आबासे जुन म्हिला लागिरी सहोबा हिन्ना थे जे चिम्याड्ला” भिसी सुड्जी।

24 चु ताम थेःसी स्य्हान्दो चेला च्युइदा चा थेन्ना ज्योज्यो आले न्हीदेन छ्याम बोमो रेःजी। 25 तर येशूसे थेनीगदेदा हाड मुबा ग्लारी ड्योइसी चुहड् भिसी सुड्जी, “च्यागो, एनीगदेदा चु ताम थानोन मुला, अर्गु यहुलला शासन लबा म्हिगदेसे हाडला सेमसे म्हन्बा अनछार म्हिगदेथोरी शासन लमुला। ओच्छे घेन घेन पदरी मुबा म्हिगदेसे हाड भन्दा धिरी मुबा म्हिगदेथोरी शासन लमुला। 26 तर एनीगदे चा थेहड् तबारी आत। जुन म्हि जम्मान भन्दा घेन दोबारी म्हाइला थेसे चा एनीगदेला सेवा लतोःला।\* 27 ओच्छे एनीगदे न्हडरी जुन म्हि डाच्छा तबारी म्हाइला थे चा एनीगदेला नोकर दोतोःला।\* 28 थेहड् लसीन परमेश्वरसे पुइखबा म्हिएनोन स्य्हान्दोगदेग्याम सेवा किन्बारी आहिन, तर स्य्हान्दोगदेला सेवा लबारी ओच्छे हाडलान ज्यान पिन्सी ल्हानान म्हिगदेला पापला सय फाबारी खबा हिन्ना।”

येशूसे मी आम्राड्बा म्हि न्हीदा खम्ला लबा

मर्कुस १०:४६-५२; लूका १८:३५-४३

\* 20:26 लूका २२:२५-२६ \* 20:27 मत्ती २३:११; लूका २२:२६

29 येशू हाडला चेलागदेदेन छ्याम यरीहो भिबा शहरग्याम फेपबान लबा धुइरी म्हिला हुलएनोन थेनीगदेदेन छ्याम छ्याम खजी। 30 ग्यामला कुनीरी चिबा मी आम्राड्बा म्हि न्हीसे येशू थेनोन ग्याम फेपबान लबा ताम था याड्सी “प्रभु, दाऊद ग्लेला सन्तान! डन्दा दया लउ” भिसी क्रिड्बान भिजी।

31 थे म्हि न्हीदा येशूदेन छ्यामनोन खबा म्हिगदेसे “कुटिसी चिउ” भिसी बड्जी। तर थेन्नी झन क्रिड्बान, “प्रभु, दाऊद ग्लेला सन्तान डन्दा दया लउ” भिसी भिजी।

32 जमाहेन्से थेन तसी येशूसे थेनीगदेदा “डाइ एनीगदेला लागिरी तिग लगै भिसी म्हन्बा मुला?” भिसी ड्योड्जी।

33 थेनीगदेसे येशूदा “प्रभु हाडसे डन्ना मी म्राड्ना लपिन्गो” भिसी भिजी।

34 थेनीगदेला ताम थेःसी येशूदा दया रेःसी येशूसे थेनीगदेला मीरी थुर्जी। थुर्मेछ्याम थेनीगदेसे म्राड्जी। ओच्छे थेनीगदे येशूदेन छ्याम भ्रजी।

## 21

येशू यरूशलेमरी फेपबा

मर्कूस ११:१-११; लूका १९:२८-४०; यूहन्ना १२:१२-१६

1 येशू हाडला चेलागदेदेन छ्याम फेपबान लमा यरूशलेम डामला जैतून भिबा गडला बेथफागे नाम्सारी धोखजी। ओच्छे येशूसे हाडला चेला न्हीदा पुड्जी। 2 पुड्बा धुइरी चुहड् भिसी सुड्जी, “एनी जजाकी क्याथाडला नाम्सारी निउ। एनी थेरी धोमैछ्याम च्युन्सी थान्बा गधाला मामादेन कोला म्राड्ला। जमाहेन्से एनीसे थे गधाला मामादेन कोलादा बलसी डा मुबा ग्लारी भउ। 3 थेरी एनीदा खालैसे तिगै भिजी भिसम ‘चु प्रभुदा तोःबा मुला’ भिसी भिउ। जमाहेन्से थेनीगदेसे एनीदा पुड्खला।”

4 अगमवक्ताग्याम पाड्बा बचन पूरा तगै भिसी चु तबा हिन्ना।

5 “सियोनना† म्हिगदेदा चुहङ् भिसी पाङ्गो,  
‘च्यागो, एनीगदेला ग्ले एनीगदे मुबा ग्लारी  
गधाला कोलाथोरी क्रेःसी फेप्खबान मुला।  
थे ल्हानान सोजो मुला।’”\*

6 जमाहेन्से चेला न्ही निसी येशूसे कुल्बा अन्छार लजी।  
7 थेनीगदेसे गधाला मामादेन कोला भजी। ओच्छे थे गधाला  
मामादेन कोलाथोरी हाड हाडला घ तीजी। जमाहेन्से येशू थेथोरी  
धन्छ्याजी। 8 ओच्छे थेरी मुबा ल्हानान म्हिगदेसे ग्यामरी  
हाड हाडला घगदे तीजी, कोइसे स्याउला थासी ग्यामरी तीजी,  
9 जमाहेन्से येशूला लिच्छा डाच्छा भ्रबा जम्मान म्हिला हुलसे  
चुहङ् भिसी क्रिड्बान जयजयकार लजी,  
“दाऊद ग्लेला सन्तानला जयजयकार तगै।

परमप्रभुला मिनरी फेप्खबासे परमेश्वरग्याम मोलम याङ्गै।  
थेहङ् लसीन स्वर्गरी धन्छ्याबा परमेश्वरदा जयजयकार तगै।”

10 येशू यरूशलेमरी धोमाहेन्से शहर नाडनोन हल्ली खल्ली  
तजी। ओच्छे म्हिगदेसे “चु खाल हिन्ना?” भिसी ड्योइजी।\*

11 येशूदेन छ्याम खबा म्हिला हुलसे “चु गालीलला नासरत  
भिबा नाम्साग्याम फेप्खबा अगमवक्ता येशू हिन्ना” भिसी भिजी।

येशू परमेश्वरला मन्दिररी फेप्बा

मर्कूस ११:१५-१९; लूका १९:४५-४८; यूहन्ना २:१३-२२

12 येशूसे परमेश्वरला मन्दिर न्हडरी चूड्बादेन ग्लुबागदेदा  
ताप्जी। ओच्छे टाडगा देप्बारी चिबागदेला टेबुलदेन ढुकुर  
चूड्बारी चिबागदे जम्मालान चिबा ग्लागदे प्लाड प्लिड लसी  
भ्याङ्जी। 13 ओच्छे येशूसे थेनीगदेदा चुहङ् भिसी सुङ्जी,  
“च्यागो, ‘डाला दिम यूहुल यूहुलला म्हिगदेसे प्रार्थना लबा दिम

† 21:5 “सियोन” भिबा चा यरूशलेम शहरदा पाङ्बा हिन्ना। \* 21:5 जक ९:९

\* 21:10 भजन ११८:२६-२७

दोला' भिसी परमेश्वरला बचनरी भिबा मुला। तर एनीगदेसे मी डाला दिमदा य्होगदे चिबा ग्ला सहोबा मुला।”\*

14 येशू परमेश्वरला मन्दिररी मुबा धुइरी मी आम्राड्बा म्हिदेन कुज्या म्हिगदे येशू मुबा ग्लारी खजी। जमाहेन्से येशूसे थेनीगदेदा खमना लजी। 15 तर येशूसे लबा उदेकला गेदेन परमेश्वरला मन्दिररी कोलागदेसे “दाऊद ग्लेला सन्तानना जयजयकार तगै” भिसी क्रिड्बा म्नाड्सी परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदे बोमो खजी।† 16 थेनीगदेसे येशूदा “चु कोलागदेसे तिग भिबान मुला हाडसे थे:बा आरे?” भिसी भिमा, येशूसे थेनीगदेदा चुहड् भिसी सुड्जी, “थे:बा मुला। तर परमेश्वरला बचनरी चुहड् भिसी भिबा मुला, ‘प्रभु, हाडसे लैनु कोलागदेदेन जजा कोलागदेदाएनोन जयजयकार लतो:ला भिसी लोप्बा मुला’ तिग एनीगदेसे चु ताम पढब लबा आरे?”\*

17 जमाहेन्से थेनीगदेदा थेरी ख्लासी येशू बेथानिया भिबा नाम्सारी फेप्सी जमाकुनु म्हनुड थेरीन धन्छयाजी।

तिगै आरोबा अञ्जीरला दोड

मर्कूस ११:१२-१४, २०-२४

18 न्हडगरदड स्य्होरी यरूशलेमपट्टि दो:सी फेप्खबान लबा धुइरी येशूदा फोखेन्जी। 19 ग्यामरी फेप्बान लबा धुइरी येशूसे ग्यामला कुनीरी अञ्जीरला दोड गिक म्नाड्जी। थे दोडरी अञ्जीर मुजी वा भिसी स्हीबारी फेप्मा भा जे म्नाड्सी “दाहेन्से चु दोडरी

\* 21:13 यशै ५६:७; यर्मि ७:११ † 21:15 यहूदी धर्मगुरुगदेसे येशूदा खीष्ट हिनना भिसी विश्वास आलमुबा। ओचछे स्य्हानदो म्हिगदेसे येशूदा खीष्ट भिबासे लमा थेनीगदेदा बोमो रे:जी। चुदे स्य्हानदो म्हिगदेसे येशूदा लहानान सेम निजी भिसम येशूसे स्य्हानदो म्हिगदेदा थेनीगदेला बिरोधरी रे:पुड्ला भिसी थेनीगदे लोड्मुबा। \* 21:16 भजन ८:२

खाइमै अञ्जीर थारोगै” भिसी येशूसे सुड्जी। थेहड् सुड्मैछ्याम थे अञ्जीर दोड खर्जी।†

20 अञ्जीर दोड खर्सी निबा म्राड्सी उदेक म्हनबान येशूला चेलागदेसे “दान्देला दान्देन खाहड् लसी चु अञ्जीर दोड खर्जी?” भिसी भिमा, 21 येशूसे थेनीगदेदा चुहड् भिसी सुड्जी, “च्यागो, एनीगदेसे डाला ताम ड्यान्गो, एनीगदेला सेमरी शङ्का आलना विश्वास लजी भिसम चु अञ्जीर दोडदा लबा हड् जे आहिन, तर चु गडदाएनोन ‘ए होक निसी समुन्द्ररी ताइगो’ भिसम थेहड्-नोन तला। 22 ओच्छे एनीगदेसे विश्वास लसी प्रार्थना लमा जुन ताम हीला थेनोन एनीगदेसे याड्-ला।”

येशूला अधिकारला बारेरी ड्योडबा

मर्कूस ११:२७-३३; लूका २०:१-८

23 परमेश्वरला मन्दिररी फेप्सी येशूसे म्हिगदेदा लोपबान लबा धुइरी परमेश्वरला मन्दिररी पूजा लबा मुल म्हिगदेदेन यहूदी गन्बागदे येशू मुबा ग्लारी खसी “हाडसे खानडग्याम अधिकार याड्सी चु गे लबा हिन्ना? हाडदा चु अधिकार खालसे पिन्बा हिन्ना?” भिसी ड्योडमा, 24 येशूसे थेनीगदेदा चुहड् भिसी सुड्जी, “एनीगदेदाएनोन डाइ ताम गिक ड्योडला। थे तामला जोहाब पिन्जी भिसम डादा चु गेगदे लबारी खालसे अधिकार पिन्जी थे एनीगदेदा पाड्-ला। 25 यूहन्नादा बपतिस्मा पिन्बा अधिकार खालसे पिन्जी? परमेश्वरसे कि म्हिगदेसे?”

जमाहेन्से थेनीगदे हाड हाड न्हडरी सल्लाह लबान, “परमेश्वरग्याम भिजी भिसम थेसे य्हाडदा ‘थेहड् भिसम एनीगदेसे तिग्दा यूहन्नादा विश्वास आलबा?’ भिसी भिला। 26 तर म्हिगदेग्याम भिजी भिसम महिला हुलसे साइला भिसी

† 21:19 येशूसे यहूदी धर्मगुरुगदेदा परमेश्वरसे सजाय पिन्ना भिबा ताम उन्बाला लागिरी अञ्जीरला दोड खर्ना लबा हिन्ना।

य्हाड लोड्मुला। तिग्दा भिसम जम्मासेन यूहन्नादा अगमवक्ता हिन्ना भिसी भिमुला।” 27 थेतबासेलमा थेनीगदेसे “डन्दा था आरे” भिसी येशूदा जोहाब पिन्जी।

येशूसे थेनीगदेदा “थेहड् भिसम डाइएनोन चु गेगदे खाल्ला अधिकारग्याम लबा हिन्ना, थे एनीगदेदा आपाड्” भिसी सुड्जी।

### झा न्ही मुबा म्हिला उखान

28 येशूसे अझ चुहड् भिसी सुड्जी, “डाइ एनीगदेदा झा न्ही मुबा म्हिला उखान पाड्ला। एनीगदेसे चुग्याम तिग घोला? थे म्हे थेबा झा मुबा ग्लारी निसी ‘ए तिनी अडगुर वारीरी निसी गे लउ झा’ भिसी कुल्मा, 29 थेसे ‘डा आनि आबा’ भिसी जोहाब पिन्जी। तर लिच्छा सेम दोःसी थे गे लबारी निजी।

30 “थेहड् लसीन थे झा च्याड्बा मुबा ग्लारी निसी थेदाएनोन थेहड् नोन भिसी कुल्मा, थेसे ‘तला आबा डा निला’ भिसी भिजी। तर थे आनिनी।”

31 जमाहेन्से येशूसे परमेश्वरला मन्दिररी पूजा लबा मुल म्हिगदेदेन यहूदी गन्बागदेदा “चु न्ही न्हडरी खजिबासे चा आबासे कुल्बा ताम ड्यान्जी” भिसी ड्योइमा, थेनीगदेसे “थेबा झासे” भिसी जोहाब पिन्जी।

ओच्छे येशूसे थेनीगदेदा चुहड् भिसी सुड्जी, “च्यागो, एनीगदेसे डाला ताम ड्यान्गो, एनीगदे भन्दा डाच्छा तिरो दुड्बा म्हिगदेदेन बेश्यागदे परमेश्वरला यहुल्सारी निला। 32 तिग्दा भिसम बपत्तिस्मा पिन्बा यूहन्नासे एनीगदेदा परमेश्वरसे म्हन्बा अन्छारला ग्याम उन्बारी खमाएनोन एनीगदेसे थेदा विश्वास आलनी। बरु तिरो दुड्बा म्हिगदेदेन बेश्यागदेसे चा थेदा विश्वास लजी। थेनीगदेसे विश्वास लबा म्राड्सीनोन

एनीगदेसे हाड हाडला पाप ख्लासी परमेश्वरपट्टि आदोःनी। ओच्छे थेला ताम विश्वास आलनी।

अधियाँ सहोबा म्हिगदेला उखान

मर्कूस १२:१-१२; लूका २०:९-१९

33 “अर्गु उखानएनोन ड्यानगो, फ्युकपो म्हि गिकसे वारीरी अडगुर सूसी क्युर्सिन परखाल लजी। ओच्छे अडगुर म्हर्बारी कोल सहोसी अडगुर वारी खुड्बारी नोबा छाप्रो गिक सहोजी। जमाहेन्से अधियाँरी पिन्सी थे अर्गु यहुल्सारी निजी।\* ”

34 “अडगुर मिन्बा धुइ तमाहेन्से थे फ्युकपो म्हिसे हाडला भो किन्बाला लागिरी अधियाँ लबागदे मुबा ग्लारी हाडला नोकरगदेदा पुइजी। 35 ओच्छे अधियाँ लबागदेसे थे फ्युकपो महिला नोकर गिकदा चुइसी तोबा गयाड्बा लजी, गिकदा साइजी तर स्य्हानदो गिकदा चा युडबासे तोजी। 36 थे फ्युकपो म्हिसे दोःसी डाच्छाला भन्दा ल्हानान नोकरगदे पुइजी, तर थेनीगदेसे थे नोकरगदेदाएनोन थेहड्दोन लजी। 37 “जमाहेन्से थे फ्युकपो म्हिसे जम्मान भन्दा लिच्छा ‘थेनीगदेसे डाला झादा मी मान लला तला’ भिसी थेसे हाडला झादान थेनीगदे मुबा ग्लारी पुइजी। 38 तर थेदा खबान लबा म्राइसी अधियाँ लबागदेसे ‘चु मी यहडला धनीला झा हिन्ना, यहडसे थेदा साइगे। जमाहेन्से थेला सम्पत्ति यहडलान तला’ भिसी हाड हाड न्हडरी ताम लजी। 39 जमाहेन्से थेनीगदेसे थे फ्युकपो महिला झादा चुइसी अडगुर वारीग्याम क्याथाड भोर्सी साइजी। ”

40 जमाहेन्से परमेश्वरला मन्दिररी पूजा लबा मुल म्हिगदेदेन यहूदी गन्बागदेदा येशूसे “दाहेन्से अडगुर वारीला धनी खसी थे अधियाँ लबा म्हिगदेदा तिग लला?” भिसी ड्योइमा, 41 थेनीगदेसे “थे अडगुर वारीला धनीसे थेहड्बा नइबा गे लबा म्हिगदेदा नाश

\* 21:33 यशै ५:१-२

लला। ओच्छे जुन म्हिसे अङ्गुर मिन्माहेन्से ह्वाडला भो पिन्ना थेह्ण्डबा म्हिगदेदा अधियाँ पिन्ना” भिसी येशूदा जोहाब पिन्जी।†

42 जमाहेन्से येशूसे थेनीगदेदा चुह्ण्ड भिसी सुङ्गी, “एनीगदेसे परमेश्वरला बचन खाइमै पढब लबा आरे?

‘जुन युडबादा दिम स्होबा कर्मीगदेसे गे आखेल भिसी भ्याड्बा मुबा

थेनोन युडबा दिमला सुर युडबा दोजी।

चु परमप्रभुग्याम तबासे लमा

य्हाडला लागिरी उदेकला ताम हिन्ना’

भिसी भिबा मुला।\*

43 “थेतबासेलमा एनीगदेसे डाला ताम ड्यान्गो। च्यागो, दाहेन्से परमेश्वरला य्हुल्सा एनीगदेग्याम ब्यन्सी परमेश्वरसे कुल्बा अन्छार भ्रबा य्हुलला म्हिगदेदा पिन्ना। 44 थे युडबाथोरी ताइबा म्हि चा जम्मान छारछिर निला, ओच्छे थे युडबा खालैथोरी ताइजी भिसम थेरी मुबा म्हि फ्लातफ्लेत निला।”†

45 येशूसे सुड्बा उखान थे:माहेन्से परमेश्वरला मन्दिररी पूजा लबा मुल म्हिगदेदेन फरिसीगदेसे “चु ताम येशूसे य्हाडलान बारेरी पाड्बा ताम हिन्ना” भिसी घोजी। 46 थेतबासेलमा थेनीगदेसे येशूदा चुड्बारी म्हाइजी, तर थेनीगदे महिला हुल म्हाइसी लोङ्गी। तिग्दा भिसम म्हिगदेसे येशूदा अगमवक्ता भिसी म्हन्मुबा।

## 22

ब्याह भोजला उखान

लूका १४:१५-२४

† 21:41 थे वारीला धनीला झा चा परमेश्वरला झा येशू ह्ण्डबान हिन्ना। \* 21:42 भजन ११८:२२-२३ † 21:44 लूका २०:१८ सहीगो, चु पदला ताम कोइ कोइ ग्रीक बाइबलरी भिबा आरे।

1 दोःसीनोन येशूसे थेनीगदेदा उखानग्याम चुहड् भिसी सुड्जी,  
2 “स्वर्गला यह्लुसा चुहड्बान हिनना, ग्ले गिकसे हाडला झाला  
ब्याहला भोज ठीक लजी। 3 ओच्छे निम्तो याड्बा म्हिगदेदा  
ड्योइबारी हाडला नोकरगदे पुड्जी। तर निम्तो याड्बा म्हिगदेसे  
खबा सेम आलनी।

4 “दोःसी ग्लेसे निम्तो याड्बा म्हिगदेदा ‘डाइ छोबा छोबा  
म्हे बहर साइसी ब्याहला भोज ठीक लसी जिन्बा मुला। दाहेन्से  
हाडनी फेप्खउ भिउ’ भिसी स्य्हान्दो नोकरगदेदा पुड्जी।

5 “तर थे निम्तो याड्बा म्हिगदेसे नोकरगदेला तामदा थेगोन  
आलना कोइ हाडला बु वारीरीक्यार निजी, कोइ व्यापार लबारी  
निजी, 6 ओच्छे स्य्हान्दोगदेसे चा थे नोकरगदेदा चुड्सी तोबा  
ग्याड्बा लसी साइजी। 7 चु ताम थेःसी ग्ले ल्हानान बोमो  
खजी। जमाहेन्से ग्लेसे सिपाहीगदेदा पुड्सी हाडला नोकरगदे  
साइबागदेदा साइजी। ओच्छे थेनीगदेला शहरएनोन खाड्जी।

8 “जमाहेन्से ग्लेसे हाडला नोकरगदेदा चुहड् भिसी कुल्जी,  
‘ब्याहला भोज ठीक लसी जिन्बा मुला। तसैनोन निम्तो याड्बा  
म्हिगदे य्हाडला भोजरी खबाधोनाला आरेम। 9 थेतबासेलमा  
दाहेन्से एनीगदे ग्याम ग्यामरी निउ। ओच्छे स्याप्बागदे  
जम्मादान ब्याहला भोज चबारी खउ भिसी निम्तो पिन्गो।’  
10 ओच्छे नोकरगदे ग्याम ग्यामरी निसी ज्यबा गे लबा तसै  
आज्यबा गे लबा तसै स्याप्तेबा जम्मादान निम्तो पिन्जी। चुहड्  
लसी ब्याह दिम नाडनोन डोन्बोगदे तजी।

11 “डोन्बोगदेदा च्याबारी भिसी ग्ले दिम न्हडरी खमा थेरी  
ब्याहरी खबा धुइरी क्वान्तोःबा क्वान आक्वानना खबा म्हि  
गिकदा म्राड्जी। 12 थेदा म्राड्सी, ‘ओहो, हो!, ए मी ब्याहरी  
क्वान्तोःबा क्वान आक्वानना चुरी खाहड् लसी खजी?’ भिसी  
ड्योइमा, थे म्हिसे तिगै जोहाब पिन्आखम्नी। 13 जमाहेन्से ग्लेसे

हाडला नोकरगदेदा 'चुला या काड खीसी मडग्यार धोपधोपबा ग्लारी भ्याङ्गो। थेरी म्हिगदे स्वा क्रेसी क्राबा क्रिड्बा लला' भिसी कुल्जी।\*

14 "तिग्दा भिसम ड्योइबागदे ल्हानान मुला, तर धम्बागदे चा ल्हाना आरे।"

तिरो फाबा ठीक हिन्ना कि आहिन?

मर्कुस १२:१३-१७; लूका २०:२०-२६

15 जमाहेन्से फरिसीगदे येशू मुबा ग्लाग्याम निजी। ओच्छे दाहेन्से येशूदा थेलान तामग्याम खाहड् लसी फसब लसे भिसी हाड हाड न्हडरी सल्लाह लजी। 16 थेनीगदेसे हाडला चेलागदेदा हेरोद ग्लेला म्हिगदेदेन छ्याम येशू मुबा ग्लारी पुइजी। थे म्हिगदे येशू मुबा ग्लारी निसी चुहड् भिसी भिजी, "गुरु, हाड सत्य म्हि हिन्ना, ओच्छे हाडसे खालैदा वास्ता आलमुला भिसी उन्दा था मुला। तिग्दा भिसम हाडसे महिला ली च्यासी गे आलमुला, तर हाडसे म्हिगदेदा लोपबा धुइरी परमेश्वरला ग्याम ज्यना लसी उन्मुला। 17 थेतबासेलमा रोमी ग्याल्बो कैसरदा तिरो फाबा ठीक हिन्ना कि आहिन? उन्दा सुङ्गो।"†

18 तर येशूसे थेनीगदेला सेमला नइबा ताम था याङ्सी "कप्टीगदे, तिग्दा एनीगदेसे डादा फसब लबारी महाइबा? 19 एनीगदेसे तिरो फाबा डबल डादा उन्गो" भिसी सुङ्मा, थेनीगदेसे डबल गिक भसी येशूदा पिन्जी। 20 जमाहेन्से येशूसे थेनीगदेदा "चु डबलरी मुबा छापदेन मिन खाल्ला हिन्ना?" भिसी सुङ्मा, 21 थेनीगदेसे "रोमी ग्याल्बो कैसरला" भिसी जोहाब पिन्जी।

\* 22:13 मत्ती ८:१२; २५:३०; लूका १३:२८ † 22:17 हेरोदला म्हिगदेदेन फरिसीगदेसे स्यहान्दो म्हिगदेसे येशूदा विश्वास लबा खलागै भिसी म्हन्मुबा।

जमाहेन्से येशूसे थेनीगदेदा “दाहेन्से एनीगदेसे रोमी ग्लेला जति रोमी ग्लेदा फागो। ओच्छे परमेश्वरला जति परमेश्वरदान फागो” भिसी सुड्जी।

22 चुहड्बा ताम थे:सी थेनीगदे उदेक तजी। जमाहेन्से थेनीगदेसे येशूदा ख्लासी निजी।

सिबाग्याम सोना लबाला बारेरी ड्योइबा

मर्कूस १२:१८-२७; लूका २०:२७-४०

23 म्हि सिमाहेन्से दो:सी आसो भिसी विश्वास लबा सदुकीगदे थेनोन धिनकुनु येशू मुबा ग्लारी खसी येशूदा चुहड् भिसी ड्योइबारी छ्याइजी।\* 24 “गुरु, मोशासे य्हाडदा पिन्बा ठिम अन्छार खालैला ज्योज्योसे ब्याह लसी कोलागदे आतनान सिजी भिसम ज्योज्योला लागिरी कोलागदे तगै भिसी आलेसे चाडदा ब्याह लतो:ला भिसी पाड्बा मुला।\* 25 डन्ना गुडरी ज्योज्यो आले निस मुबा। थेनीगदे न्हडरी थेबासे ब्याह लजी। तर कोलागदे आतनान थे सिजी। जमाहेन्से पाराडसे थेनोन चाडदेन छ्याम ब्याह लजी। 26 थेहड् लसीन पाराड साँजी लसी च्याड्बाधोनासेन थेनोन चाडदेन छ्याम ब्याह लजी। 27 थेनीगदे जम्मान सिमाहेन्से थे म्रिडम्हेमेनोन सिजी। 28 थेतबासेलमा डन्दा सुड्गो, सिबाग्याम सोना लजी भिसम थे म्रिडम्हेमे खजिबाला म्रिड तला? तिग्दा भिसम थेनीगदे जम्मासेन थे म्रिडम्हेमेदेन छ्याम ब्याह लबा मुला।” 29 जमाहेन्से येशूसे थेनीगदेदा चुहड् भिसी जोहाब पिन्जी, “एनीगदे अन्दोलरीन चीम, तिग्दा भिसम एनीगदेसे परमेश्वरला बचनदेन परमेश्वरला शक्तिला बारेरी घोबान आरेम। 30 तिग्दा भिसम सिबाग्याम सोना लबा धुडरी न्ह ब्याह लला न्ह ब्याह तला। तर थेनीगदे स्वर्गरी मुबा स्वर्गदूतगदे हड्बान तला। 31 सिबाग्याम सोना लबाला बारेरी परमेश्वरसे

\* 22:23 मुल २३:८ \* 22:24 व्यव २५:५

एनीगदेदा तिग सुङ्बा मुला, थे ताम एनीगदेसे पढब लबा आरे?  
 32 'डा अब्राहाम, इसहाकदेन याकूबला परमेश्वर हिन्ना' भिसी परमेश्वरसे मोशादा सुङ्बा मुबा। परमेश्वर सिबागदेला परमेश्वर आहिन, तर सोबागदेला परमेश्वर हिन्ना।”\*

33 येशूसे चुहङ् लसी लोपूबा म्राङ्सी थेरी मुबा महिला हुल उदेक तजी।

परमेश्वरसे कुल्बा मुल ताम

मर्कूस १२:२८-३४; लूका १०:२५-२८

34 येशूसे सदुकीगदेदा जोहाबनोन पिन्आखम्बा तना लजी भिबा ताम थे:सी फरिसीगदे ढिक्सी सल्लाह लबारी ग्ला गिकरी पोप तजी। 35 जमाहेन्से थेनीगदे न्हडला यहूदी धर्मगुरु गिकसे येशूला सेम च्याबाला लागिरी चुहङ् भिसी ड्योइजी, 36 “गुरु, परमेश्वरसे मोशादा पिन्बा ठिमरी जम्मान भन्दा मुल ताम चा खजिबा हिन्ना?”\*

37-38 येशूसे थेदा चुहङ् भिसी सुङ्जी, “च्यागो, परमेश्वरसे कुल्बा जम्मान भन्दा मुल ताम चा चुनोन हिन्ना। एसे हाडला परमप्रभु परमेश्वरदा हाडला जम्मान सेमहेन्से, जम्मान प्राणसे, जम्मान बुद्धिसे माया लउ।\* 39 ओच्छे अर्गु मुल ताम चा एसे हाडला खिमजेमदा हाडदा हङ्नोन माया लउ।\* 40 अगमवक्तागदेसे लोपूबा तामदेन मोशाला ठिमरी मुबा जम्मान तामगदे चा परमेश्वरसे कुल्बा चु मुल ताम न्हीग्यामनोन खबा हिन्ना।”

ख्रीष्ट खाल्ला झा हिन्ना?

मर्कूस १२:३५-३७; लूका २०:४१-४४

\* 22:32 प्रस्था ३:६ \* 22:36 लूका १०:२५-२८ \* 22:37-38 वयव ६:५

\* 22:39 लेवी १९:१८

41 जमाहेन्से येशूसे थेरी पोप तसी चिबा फरिसीगदेदा चुहङ् भिसी ड्योइजी, 42 “थाबां पिन्बा ख्रीष्टला बारेरी एनीगदेसे तिग म्हन्बा मुला? थे खाल्ला झा हिन्ना?”

थेनीगदेसे येशूदा “दाऊद ग्लेला सन्तान हिन्ना” भिसी जोहाब पिन्जी।

43 दोःसी येशूसे थेनीगदेदा चुहङ् भिसी सुङ्जी, “थेहङ् भिसम दाऊददा परमेश्वरला आत्माला शक्तिग्याम तिग्दा ख्रीष्टदा ‘प्रभु’ भिपुङ्जी? दाऊदसेन चुहङ् भिसी भिमुला,

44 ‘परमप्रभुसे डाला प्रभुदा,

“डाइ एला शत्रुगदेदा एला काड धिरी आथान्तेधोना ए डाला दाहिनेपट्टि चिउ भिसी सुङ्जी।” †\*

45 दाऊद ग्लेसेन ख्रीष्टदा प्रभु भिला भिसम खाहङ् लसी ख्रीष्ट दाऊद ग्लेला सन्तान तला?”† 46 जमाहेन्से खालैसेन येशूदा जोहाब गिकनोन लआखम्नी। जमाकुनुहेन्से खालैसेन येशूदा तिगै ताम ड्योइबा आँट आलनी।

## 23

येशूसे यहूदी धर्मगुरुदेन फरिसीगदेला दोष उन्बा

मर्कूस १२:३८-४०; लूका ११:३९-५२; २०:४५-४७

1 जमाहेन्से येशूसे हाडला चेलागदेदेन थेरी मुबा म्हिला हुलदा चुहङ् भिसी सुङ्जी, 2 “च्यागो, यहूदी धर्मगुरुदेन फरिसीगदेसे मोशाला ठिम लोप्बा अधिकार याड्बा मुला। 3 थेतबासेलमा थेनीगदेसे पाड्बा ताम एनीगदेसे ड्यानगो, तर थेनीगदेसे लबा हङ्बान गे चा थालउ। तिग्दा भिसम थेनीगदेसे एनीगदेदा लोप्बाम

† 22:44 परमेश्वरसे प्रभुदा स्वर्गरी हाडदेन छ्याम चिबारी ग्ले सहोबा मुला।

\* 22:44 भजन ११०:१ † 22:45 म्हिगदेसे दाऊद ग्लेला सन्तानदा दाऊद ग्ले भन्दा जजा भिसी म्हन्मुबा, तसैनोन दाऊद ग्लेसेनोन हाडला सन्तानदा प्रभु भिबासे लमा थेनीगदे उदेक तजी।

लोप्मुला, तर लोप्बा अन्छारला गे चा आलमुला। 4 ओच्छे म्हिगदेदा थेनीगदेसे पुइनोन आखम्बा धोइ काप्सी पिन्मुला। तर थेनीगदेसे भिसम थे धोइ थीबाला लागिरी या जुम्बीसेनोन आथुर्मुला।

5 “थेनीगदेसे जम्मान गे म्हिदा उन्बाला लागिरी लमुला। तिग्दा भिसम थेनीगदेसे परमेश्वरसे मोशादा पिन्बा ठिम कागजरी भिसी घेन घेन जन्तर सहोसी डोदेन नारीरी खीमुला। ओच्छे थेनीगदेसे क्वान्बा क्वान्ना जोरी हेड्बा हेड्बा फुर्गा कार्मुला।\* 6 थेनीगदेसे भोजरीदेन यहूदीगदे हुप तबा दिमला मुल ठिरी चिबारी सेम लमुला। 7 बजाररी निमाएनोन म्हिगदेसे फ्या लगै भिसी म्हन्मुला, ओच्छे ‘गुरु’ भिसीएनोन पाङ्गे भिसी म्हन्मुला। 8 तर एनीगदेदा खालैसेन ‘गुरु’ भिसी थाभिगै। तिग्दा भिसम एनीगदे ज्योज्यो आले हिन्ना। एनीगदेला गुरु चा गिक जे मुला।† 9 जम्बुलिडरी एनीगदेसे खालैदान आबा थापाङ्गो। तिग्दा भिसम स्वर्गरी एनीगदे जम्मालान आबा गिक जे मुला।† 10 ओच्छे एनीगदेदा खालैसेन ‘मालिक’ थाभिगै। तिग्दा भिसम एनीगदे जम्मालान मालिक थार्बा पिन्बा ख्रीष्ट जे हिन्ना। 11 एनीगदे न्हडला जुन म्हि घेन मुला, थेसे चा एनीगदे जम्मालान सेवा लतोःला।\* 12 ओच्छे जुन म्हिसे हाडसे हाडदान घेन सहोला, थे म्हि चा जजा दोला। तर हाडसे हाडदान जजा सहोबा म्हि चा घेन दोला।\*

13 “परमेश्वरग्याम सजाय याड्तोःबा यहूदी धर्मगुरुदेन फरिसीगदे, एनीगदे मी कप्टीगदे हिन्ना। तिग्दा भिसम एनीगदेसे

\* 23:5 मत्ती ६:१; गन्ती १५:३८; वयव ६:८ † 23:8 ख्रीष्टियानगदे न्हडरीनोन गुरुगदे तखम्ला (याकूब ३:१; एफिसी ४:११)। तर ख्रीष्ट चा जम्मालान मुल गुरु हिन्ना। † 23:9 येशूसे हाडला आबादा मान थालउ भिसी सुड्बा आहिन। तर परमेश्वरदा पिन्तोःबा मान जम्बुलिडरी स्यहानदो म्हिदा थालउ भिबा हिन्ना। \* 23:11 मत्ती २०:२६-२७; मर्क ९:३५; लूका २२:२६ \* 23:12 लूका १४:११; १८:१४

म्हिंगदेला डाचूछा स्वर्ग यहूल्साला प्राप दुड्मुला। ओचूछे एनीगदे हाडएनोन आनिमुला निबारी म्हाइबा म्हिदाएनोन निआपुड्मुला।

14 “परमेश्वरग्याम सजाय याड्तोःबा यहूदी धर्मगुरुदेन फरिसीगदे, एनीगदे मी कप्टीगदे हिन्ना। तिग्दा भिसम एनीगदेसे हेम्बो सिबा मिडम्हेमेगदेला दिमनाम ब्यन्मुला। ओचूछे म्हिदा उन्बाला लागिरी हेड्बा हेड्बा प्रार्थना लबा सहोमुला। थेतबासेलमा स्य्हान्दोगदेसे भन्दा एनीगदेसे ल्हाना सजाय याड्ला।†

15 “परमेश्वरग्याम सजाय याड्तोःबा यहूदी धर्मगुरुदेन फरिसीगदे, एनीगदे मी कप्टीगदे हिन्ना। तिग्दा भिसम एनीगदे गड स्योड थासी भ्रसै कोर्सी कोर्सी स्य्हान्दो म्हिदा हाडलान ग्यामरी भ्रपुड्मुला। ओचूछे तिगै लसी स्य्हान्दो म्हि गिक एनीगदेदेन छ्याम ढिक्जी भिसम एनीगदेसे थें म्हिदा हाड भन्दा आज्यबा सहोसी नर्गरी नितोःबा म्हि सहोमुला।

16 “स्य्हान्दोदा लोप्बा काना म्हिंगदे, एनीगदेसे परमेश्वरग्याम गाते सजाय याड्ला। एनीगदेसे म्हिंगदेदा लोप्बा धुड्डी ‘परमेश्वरला मन्दिरला मिन किन्सी घान फासैनोन तिगै आतमुला। तर परमेश्वरला मन्दिररी मुबा म्हरला मिन किन्सी घान फाजी भिसम चा थें घानसेन चमुला’ भिसी लोप्मुला। 17 मूर्ख कानागदे, खजिबा चा घेन? म्हरदा चोखो तना लबा परमेश्वरला मन्दिर घेन कि म्हर घेन? 18 ओचूछे ‘खालै म्हिसे बलि फुल्बा ग्लाला मिन किन्सी घान फाजी भिसम तिगै आतमुला, तर थैरी फुल्बा भेटीला मिन किन्सी घान फाजी भिसम चा थें घानसेन चमुला’ भिसीनोन एनीगदेसे लोप्मुला। 19 कानागदे, खजिबा चा घेन हिन्ना। भेटीदा चोखो तना लबा ग्ला घेन कि भेटी घेन?

† 23:14 चु पदला ताम ल्हाना हड्बा ग्रीक बाइबलरी भिबा आरे, कोइ कोइ बाइबलरी जे भिबा मुला। चु ताम मर्कूस १२:४० सहीगो।

20 थेतबासेलमा च्यागो, परमेश्वरला मन्दिररी बलि फुल्बा ग्लाला मिन किन्सी घान फाबा म्हिसे थेशोरी मुबा जम्मान सहेला मिन किन्सी घान फाबा तला। 21 ओच्छे परमेश्वरला मन्दिरला मिन किन्सी घान फाबासे थेरी धन्छ्याबाला मिन किन्सी घान फाबा तला। 22 थेहड्ड लसीन स्वर्गला मिन किन्सी घान फाबासे परमेश्वरला ठिदेन थेशोरी धन्छ्याबाला मिन किन्सी घान फाबा तला।\*

23 “परमेश्वरग्याम सजाय याड्तोःबा यहूदी धर्मगुरुदेन फरिसीगदे, एनीगदे मी कप्टीगदे हिन्ना। तिगदा भिसम एनीगदेसे बाबरीदेन सोंप ओच्छे जिराला भो च्युइला भो गिक चा पिन्मुला। तर ठीक निसाफ, दयादेन विश्वासला बारेरी परमेश्वरसे मोशादा पिन्बा ठिमला मुल तामदा चा आड्यान्मुला। तर एनीगदेसे चु गे न्हीनोन लतोःबा मुबा।\* 24 तर एनीगदेसे भुसुना हड्डबा जजा सहे चा म्राड्डबा, तर ऊँट हड्डबा घेन सहेदा चा आम्राड्डबा, एनीगदे मी कानान हिन्ना।†

25 “परमेश्वरग्याम सजाय याड्तोःबा यहूदी धर्मगुरुदेन फरिसीगदे, एनीगदे मी कप्टीगदे हिन्ना। एनीगदेसे खोरेदेन खार्बाला पाखापट्टि जे म्याप्मुला। तर न्हडपट्टि चा चीबुन थान्बा हड्ड लसी एनीगदेसे ह्वाडला सेमरी लोभदेन म्हिदा ठगब लबा हड्डबा नड्डबा ताम थान्मुला। 26 काना फरिसीगदे, डाच्छा खार्बादेन खोरे न्हडपट्टि ज्यना लसी म्याप्गो। जमाहेन्से जे थे खार्बादेन खोरे पाखापट्टि ज्यना लसी धाला।

27 “परमेश्वरग्याम सजाय याड्तोःबा यहूदी धर्मगुरुदेन फरिसीगदे, एनीगदे मी कप्टीगदे हिन्ना। एनीगदे तार साप्रासे च्युर्सी

\* 23:22 यशै ६६:१; मत्ती ५:३४ \* 23:23 लेवी २७:३० † 23:24 चु पदरी येशूसे चुहड्ड भिसी लोपबारी छ्याड्जी, फरिसीगदेसे जजाबा भुसुना हड्डबा तामदा चा वास्ता लमुला, तर थेनीगदेसे परमेश्वरसे मोशादा पिन्बा ठिमरी मुबा घेन तामदा चा तिगै वास्ता आलमुला।

थान्बा धुर्सा हड्बान मुला। थे धुर्साला पाखापट्टि च्यामा चा जेबा म्नाड्मुला। तर न्हडरी भिसम सिबा म्हिला नखुदेन नइबा सहेगदेसे प्लिड्बा मुला।\* 28 थेहड् लसीन एनीगदे म्हिला ओन्छाडरी 'डनी परमेश्वरला डाच्छा ज्यबा म्हि हिन्ना' भिसी भ्रमुला। तर एनीगदेला सेम चा छलकपटदेन पापसे प्लिड्बा मुला।

29 "परमेश्वरग्याम सजाय याड्तोःबा यहूदी धर्मगुरुदेन फरिसीगदे, एनीगदे मी कप्टीगदे हिन्ना। तिग्दा भिसम एनीगदेसे अगमवक्तागदेला धुर्सा सहोमुला, ओच्छे परमेश्वरला डाच्छा ज्यबा म्हिगदेला धुर्सा जेना लसी थान्मुला। 30 ओच्छे 'डन्ना आखे म्हेमेसे अगमवक्तागदेदा साइबा धुडरी डनीएनोन थेनीगदेदेन छयाम मुबा हिन्सम थेनीगदेसे हड् चा डन्से आलसेला मुबा' भिसी एनीगदेसे पाड्मुला। 31 एनीगदेसे पाड्बा चुहड्बा तामग्यामसेन एनीगदे अगमवक्तागदेदा साइबागदेला सन्तान हिन्ना भिसी था तना लबा मुला। 32 दाहेन्से एनीगदेला आखे म्हेमेसे शुरु लबा पाप गे एनीगदेसे पूरा लउ।

33 "पुख्रीदेन पुख्रीला कोलागदे, नर्गरी नातोःबा दुखग्याम एनीगदे खाहड् लसी जोगब तला?\*" 34 थेतबासेलमा एनीगदेसे डाला ताम ड्यान्गो, दाहेन्से डाइ अगमवक्तागदेदेन बुद्धि मुबा म्हिगदेदा ओच्छे सत्य ताम लोपबा धर्मगुरुगदे एनीगदे मुबा ग्लारी पुइखला। थेनीगदेदा एनीगदेसे कोइदा साइला, कोइदा क्रुसरी टांगब लसी साइला, कोइदा एनीगदे हुप तबा दिमगदेरी भोर्सी कोर्से तोःला ओच्छे कोइदा शहर शहरग्याम ताप्ला। 35 थेतबासेलमा परमेश्वरला डाच्छा ज्यबा म्हि हाबिलदा साइबा धुइहेन्से बेरेक्याहला झा जकरियादा साइबा धुइधोना जमबुलिडरी मुबा जममान ज्यबा म्हिगदेदा साइबा पापला दोष एनीगदेसेन नातोःला। एनीगदेसे बेरेक्याहला झा जकरियादाएनोन परमेश्वरला मन्दिरदेन

\* 23:27 मुल २३:३ \* 23:33 मत्ती ३:७; १२:३४; लूका ३:७

बलि फुल्बा ग्लाला गुडरी साइजी।<sup>36</sup> च्यागो, एनीगदेसे डाला ताम इयान्गो, चु जम्मान पापला सजाय दान्देला म्हिगदेथोरीन खला।

यरूशलेमला म्हिगदे म्राड्सी येशूदा दुख इहम्बा  
लूका १३:३४, ३५

<sup>37</sup> “यरूशलेमला म्हिगदे, एनीगदेसे अगमवक्तागदेदा साइला ओच्छे परमेश्वरसे एनीगदे मुबा ग्लारी पुइखबागदेदा युडबासे तोला। डाइ एनीगदेला कोलागदेदा नागा मामासे हाडला कोलागदेदा भ्याप्से घपबा हड् लसी पोप लबारी म्हाइमा एनीगदेसे आइयान्नी।<sup>38</sup> थेतबासेलमा दाहेन्से परमेश्वरसे एनीगदेला शहर खलाला।\*<sup>39</sup> डाला ताम इयान्गो, एनीगदेसे ‘परमप्रभुला मिनरी फेप्खबादा मोलम याड्बा म्हि’ आभितेधोना डादा आम्राड्।”\*

## 24

परमेश्वरला मन्दिर नाश तला

मर्कूस १३:१-२; लूका २१:५-६

<sup>1</sup> जमाहेन्से येशू परमेश्वरला मन्दिरग्याम थोन्सी फेपबारी छ्याइमा थेला चेलागदे परमेश्वरला मन्दिरला दिमगदे उन्बारी भिसी येशूला डामरी खजी।<sup>2</sup> तर येशूसे थेनीगदेदा चुहड् भिसी सुड्जी, “एनीगदेसे चु जम्मान म्राड्बा मुला आहिन? च्यागो, एनीगदेसे डाला ताम इयान्गो, चु मन्दिरला युडबा गिकनोन बाँकी आचिना जम्मान फुप्ला” भिसी सुड्जी।

जम्बुलिड नाश तबा धुइला चिनुगदे

मर्कूस १३:३-१३; लूका २१:७-१९

<sup>3</sup> जमाहेन्से येशू जैतून भिबा गडरी धन्छ्याबा धुइरी, थेला चेलागदे सुट्कुक् खसी “हाडसे सुड्बा चु तामगदे खाइमा तला?

\* 23:38 यर्मि २२:५ \* 23:39 भजन ११८:२६

ओच्छे हाड फेपखबा धुइदेन परमेश्वरसे जम्बुलिडला जम्मान म्हिगदेला निसाफ लबा धुइरी खाहड्बा चिनु म्राड्ला? डन्दा सुङ्गो” भिसी भिजी।

4 येशूसे थेनीगदेदा चुहड् भिसी सुङ्गी, “एनीगदे होशियार तसी चिउ, एनीगदेदा खालैसेन झुक्याब थालगै। 5 तिग्दा भिसम ल्हानान म्हिगदे डाला मिन किन्सी ‘डानोन थार्बा पिन्बा ख्रीष्ट हिनना’ भिसी खला। ओच्छे ल्हानान म्हिदा झुक्याब लला। 6 एनीगदेसे लडाइदेन लडाइला हल्लागदे थे:ला। तसैनोन एनीगदे थालोङ्गो, तिग्दा भिसम चु तनोन तो:बा हिनना। तर थेनोन धुइरी चा चु जम्बुलिड नाश आत। 7 तिग्दा भिसम म्हि य्हुलला बिरोधरी म्हि य्हुलनोन ओच्छे य्हुल्साला बिरोधरी य्हुल्सा रे:ला। चुहड् तसी ग्ला ग्लारी अनिकाल तबादेन सड्गुल निला। 8 चु जम्मान ताम मी कोला न्हसेला मिडम्हेमेदा बेथासे थुर्बा हड्बा जे हिनना।

9 “थे धुइरी एनीगदेदा म्हिगदेसे चुङ्गी दुख पिन्ना, ओच्छे साइला। थेहड् लसीन डादा विश्वास लबासे लमा एनीगदेदा जम्मान य्हुलला म्हिगदेसे हेला लला।\* 10 थे धुइरी ल्हानान म्हिगदेसे डादा विश्वास लबा खलाला। ओच्छे गिकसे स्य्हान्दोदा चुङ्गी म्हिगदेला यारी जिम्मा पिन्बादेन हेला लला। 11 थे धुइरी ल्हानान फट्टा अगमवक्तागदे थोन्सी ल्हानान म्हिगदेदा झुक्याब लला। 12 थेहड् लसीन पाप गे ल्हानान तसी निबासे लमा ल्हानान म्हिसे स्य्हान्दोदा माया लबा खलाबान निला। 13 तर जस्तोन दुख तसैनोन जुन म्हिसे हाड आसितेथोना डादा विश्वास लसीन चिला थेसे थार्बा याड्ला।\* 14 ओच्छे जम्बुलिडला जम्मान य्हुलला म्हिगदेसे परमेश्वरला य्हुल्साला समाचार थे:सी जिन्माहेन्स जे नाश तबा धुइ खला।

\* 24:9 मत्ती १०:२२ \* 24:13 मत्ती १०:२२

लोड्बा खबा धुइ

मर्कूस १३:१४-२३; लूका २१:२०-२४

15 “थेतबासेलमा दानिएल अगमवक्तासे पाड्बा हड्णोन एनीगदेसे परमेश्वरला मन्दिरला चोखो ग्लारी नड्बा खबा सहे म्राड्ला।” चुला अर्थ पढब लबा म्हिसे घोगै।\* 16 “थे धुइरी यहूदिया अञ्चलरी मुबा म्हिगदे गडरीक्यार यागै।† 17 ओच्छे तलाथोरी मुबा म्हिगदे हाडला सामान किन्बारी मार फापसी दिम न्हडरी थावाड्गो। 18 बु वारीरी मुबागदे हाडला घ किन्बारी दोःसी दिमरी थानिउ।\* 19 थे धुइरी जिउ न्हीला मिडम्हेमेदेन कोलादा ड्हे ख्वाबा आमागदेदा झन गाते ल्हानान दुख तला! 20 थेतबासेलमा खड्बा लादेन बलपबा न्हबा धिनकुनु यारआतोःगै भिसी एनीगदेसे प्रार्थना लउ। 21 तिग्दा भिसम थे धुइरी तबा घेन दुख जम्बुलिड छ्यामाहेन्से दान्देधोना तबा आरे ओच्छे लिच्छाएनोन खाइमै तसेला आरे।\* 22 थेहड्बा दुखला धिन परमेश्वरसे तुन्ना आलबा हिन्सम खालैसेन थार्बा आयाड्सेला मुबा। तर परमेश्वरसे हाडसे धम्बा म्हिगदेला लागिरी थे धिन तुन्ना लसी पिन्ना।

23 “खालैसे एनीगदेदा ‘च्यागो, थार्बा पिन्बा ख्रीष्ट चुरी मुला,’ अथवा ‘थेरी मुला,’ भिजी भिसम थेनीगदेला ताम विश्वास थालउ। 24 तिग्दा भिसम फट्टा ख्रीष्टगदेदेन फट्टा अगमवक्तागदे थोन्ना। ओच्छे थेनीगदेसे खमतेधोना परमेश्वरसे धम्बा म्हिगदेदा झुक्याब लबाला लागिरी उदेकला घेन चिनुगदेदेन उदेकला गेगदे लसी उन्ना। 25 च्यागो, चु ताम डाइ एनीगदेदा डाच्छाहेन्सेन पाड्सी पिन्बा मुला।

\* 24:15 दानि ९:२७; ११:३१; १२:११ † 24:16 ईश्वी संवत् ७० सालरी रोमी सिपाहीगदेसे यरूशलेम शहर हाडला यारी किन्बा भन्दा डाच्छा ल्हानान ख्रीष्टियानगदेदा येशूसे होशियार तना लबारी चु ताम मुड्बा हिन्ना। थे धुइरी ल्हानान म्हिगदे यर्दन स्योडला स्यार झ्याडपट्टिला डेकापोलिस भिबा अञ्चलरी यार्जी।

\* 24:18 लूका १७:३१

\* 24:21 दानि १२:१; उन्बा ७:४४

26 “थेतबासेलमा म्हिगदेसे एनीगदेदा ‘येशू तोडतोडबा ग्लारी मुला’ भिजी भिसम, एनीगदे थेरी थानिउ। ओचछे ‘च्यागो, येशू मी कोठा न्हडरी मुला’ भिजी भिसैनोन एनीगदेसे थेनीगदेला ताम विश्वास थालउ। 27 तिग्दा भिसम स्यारपट्टि तिप्लीड खमा न्हुपधोना य्हाल तबा हड् लसी परमेश्वरसे पुइखबा म्हिएनोन थेहड् लसीन खला।\* ”

28 “जुन ग्लारी सिबा जन्तु मुला थेरी गिद्धागदे पोप तमुला।\* ”

परमेश्वरसे पुइखबा म्हि फेप्खबा धुइ

29 “थेहड्बा दुखला धिन खमैछ्याम,  
‘धिनीसे य्हाल पिन्बा खलाला  
ओचछे लनीला य्हाल महाला।  
जमाहेन्से मुला शक्तिगदे याडयोड तसी  
सुक सार जम्मान ताइला।\* ”

30 चुहड् तमाहेन्से मुरी परमेश्वरसे पुइखबा म्हि खबान लबा चिनु गिक म्राड्ला। ओचछे परमेश्वरसे पुइखबा म्हिदा स्वर्गला खसुरी शक्तिदेन घेन य्हाल य्हालरी खबा म्राड्सी जम्बुलिडरी मुबा जम्मान य्हलला म्हिगदे क्राबा क्रिड्बा लला।\* 31 बिगुलला घेन काइदेन छ्याम थेसे स्वर्गदूतगदेदा जम्बुलिडदेन मुला जम्मान ग्लारी पुइला। जमाहेन्से थे स्वर्गदूतगदेसे परमेश्वरसे धम्बा जम्मान म्हिगदेदा ग्ला गिकरी पोप लला।

अञ्जीरला दोड च्यासी लोप्तोःबा ताम

मर्कूस १३:२८-३१; लूका २१:२९-३३

32 “एनीगदेसे अञ्जीरला दोडदा च्यासी थेग्याम तिगै ताम लोपगो। थेला हाँगागदेरी भा भुमैछ्याम छेप्बा छबा ला वाड्जी

\* 24:27 लूका १७:२३-२४ \* 24:28 लूका १७:३७ \* 24:29 यशै १३:१०;  
३४:४; इज ३२:७; योए २:१०-३१; ३:१५; उन्बा ६:१२-१३ \* 24:30 दानि ७:१३; जक  
१२:१०-१४; उन्बा १:७

भिसी एनीगदेसे था याङ्मुला। <sup>33</sup> थेहङ् लसीन डाइ पाङ्बा जम्मान तामगदे तबा म्राङ्माहेन्से परमेश्वरसे पुइखबा म्हि खबा धिन खसी जिन्जी भिबा ताम एनीगदेसे था याङ्गो। <sup>34</sup> च्यागो, एनीगदेसे डाला ताम ड्यान्गो, चु जम्मान ताम पूरा आततेधोना दान्देला म्हिगदे आसि। <sup>35</sup> मुदेन जम्बुलिङ् म्हासी निसैनोन डाला बचन खाइमै आमहा।

सदन होशियार तसी चिउ

मर्कूस १३:३२-३५; लूका १२:३९-४०; १७:२६-२७, ३४-३५

<sup>36</sup> “थे दुखला धिनदेन धुइ खाइमा खला भिसी स्वर्गदूतदाएनोन था आरे ओच्छे डा परमेश्वरला झादाएनोन था आरे। थे ताम परमेश्वर आबादा जे था मुला। <sup>37</sup> ओन्मा नोआला धुइरी तबा हङ्नोन परमेश्वरसे पुइखबा म्हि दोःसी खबा धुइरीनोन तला।\* <sup>38</sup> तिग्दा भिसम नाम खसी भाल बाढी खबा भन्दा डाच्छा नोआ पानी जहाजरी वाङ्बा धिनकुनुधोना म्हिगदे चबा थुङ्बादेन ब्याह लबान मुबा। <sup>39</sup> ओच्छे नाम खसी भाल बाढीसे आभोर्तेधोना थेनीगदेसे तिग तला भिसी था आयाङ्नी। परमेश्वरसे पुइखबा म्हि खमाएनोन थेहङ् तला।\* <sup>40</sup> थे धुइरी बु वारीरी गे लसी चिबा म्हि न्ही न्हङ्री गिकदा भोर्ला गिकदा थेरीन खलाला। <sup>41</sup> थेहङ् लसीन हान्दारी ब्रा स्याङ्सी चिबा म्रिङ्म्हेमे न्ही न्हङ्री गिकदा भोर्ला, गिकदा थेरी खलाला।

<sup>42</sup> “थेतबासेलमा एनीगदे होशियार तसी छोर्सी चिउ। तिग्दा भिसम एनीगदेला प्रभु खाइमा खला भिबा ताम एनीगदेदा था आरे। <sup>43</sup> तर एनीगदेसे चु तामएनोन था याङ्गो, दिमला म्हिसे य्हो खबा धुइ था याङ्सम थे छोर्सी चिला, ओच्छे थेसे हाङ्गला दिम न्हङ्री य्हो वाङ्आपुङ्। <sup>44</sup> थेतबासेलमा एनीगदेएनोन होशियार

\* 24:37 उत्प ६:५-८ \* 24:39 उत्प ७:६-२४

तसी छोर्सी चिउ। तिग्दा भिसम परमेश्वरसे पुइखबा म्हिएनोन एनीगदेसे आमहन्बा धुइरी खला।\*

ज्यबा गे लबा नोकरदेन नइबा गे लबा नोकर  
लूका १२:४२-४६

45 “दिमरी गे लबा बुद्धि मुबादेन भर्तुप्पा म्हि खाल हिन्ना? मालिकसे दिमला स्यूहान्दो नोकरगदेदा ठीक ठीक धुइरी चबा थुइबा ढिक्ना लसी पिन्बारी जिम्मा पिन्थान्जी।” 46 मालिक दोःसी खबा धुइरीनोन थेसे मालिकसे कुल्सी थान्बा हइ लसी गे लबा म्राइजी भिसम इनाम याइबा नोकर थेनोन हिन्ना। 47 च्यागो, एनीगदेसे डाला ताम ड्यानगो, मालिकसे थेहइबा नोकरदा हाडला जम्मान धन सम्पत्ति जिम्मा पिन्ना। 48 तर थे नइबा नोकरसे ‘डाला मालिक योनान आख’ भिसी म्हन्सी, 49 ड्य्होइबा म्हिगदेदेन छ्याम चिसी चबा थुइबा लसी हाडदेन छ्यामनोन गे लबा नोकरगदेदा तोबा ग्याइबा लजी भिसम, 50 थेला मालिक थेसे आमहन्बा धिनदेन धुइरी धोखला। 51 जमाहेन्से मालिकसे थेदा ल्हानान सजाय पिन्सी कप्टी म्हिगदे मुबा ग्लारी भ्याइला। थेरी चा जम्मान म्हिगदे स्वा क्रेसी क्रेसी क्राबा क्रिइबा लसी चिला।”

## 25

म्रिडकोला गोर च्युइ

1 येशूसे अझ चुहइ भिसी सुइजी, “स्वर्गला य्हुल्सा चा गोर च्युइ म्रिडकोलागदेला ताम हइबान तला। थे गोर च्युइ म्रिडकोलागदे हाड हाडला नाडसल थोसी म्हाछारदा हुप तबारी निजी।” 2 थे गोर च्युइ म्रिडकोला न्हडरी गोर डा बुद्धि मुबा, गोर डा बुद्धि आरेबा मुबा। 3-4 तिग्दा भिसम बुद्धि मुबागदेसे चा नाडसलदेन

\* 24:44 लूका १२:३९-४० \* 25:1 लूका १२:३५

छ्युगुएनोन भोर्सी निजी, तर बुद्धि आरेबासे चा नाडसल जे भोर्सी निजी। <sup>5</sup> म्हाछार घइसी खबासे लमा थेनीगदे जम्मान छुप निजी।

<sup>6</sup> “तर म्हुन गडसलरी ‘म्हाछारदा स्यापबारी खउ’ भिबा काइ थे:जी। <sup>7</sup> जमाहेन्से थेनीगदे जम्मान रे:सी हाड हाडला नाडसल ठीक लजी। <sup>8</sup> ओच्छे बुद्धि आरेबा म्रिडकोलागदेसे बुद्धि मुबा म्रिडकोलागदेदा ‘डन्ना नाडसल सिबारी छ्याइजी, एनीगदेला छ्युगु डन्दाएनोन जजाकी जजाकी पिन्तो:जी’ भिसी हीजी। <sup>9</sup> तर बुद्धि मुबा म्रिडकोलागदेसे ‘डन्देन छ्याम मुबा छ्युगुसे य्हाड जम्मादान आछ्यो तला। बरु एनीगदे पसलरी निसी ग्लुसी भउ’ भिसी भिजी।

<sup>10</sup> “तर थेनीगदे छ्युगु ग्लुबारी निमा म्हाछार धोखजी। ओच्छे डाच्छान ठीक तसी चिबागदे म्हाछारदेन छ्याम भोज चबारी दिम न्हडरी वाड्जी। ओच्छे प्राप दुड्जी।

<sup>11</sup> “छिन्ड लिच्छा थे बुद्धि आरेबा म्रिडकोलागदे खसी ‘प्रभु, प्रभु डन्दाएनोन प्राप ठोड्सी पिन्गो’ भिसी भिमा, <sup>12</sup> म्हाछारसे थेनीगदेदा ‘च्यागो, एनीगदेसे डाला ताम ड्यानगो, डाइ एनीगदेदा डोसेबा आरे’ भिसी जोहाब पिन्जी।\*

<sup>13</sup> “थेतबासेलमा एनीगदे होशियार तसी चिउ। तिग्दा भिसम डा खजिबा धिनदेन धुइरी खला भिबा ताम एनीगदेदा था आरे।

म्हरला डबलला उखान

लूका १९:११-२७

<sup>14</sup> “थे धुइरी परमेश्वरला य्हुल्सा चुहड्बान तला, च्यागो, फ्युकपो म्हि गिक अर्गु य्हुल्सारी निबा धुइरी हाडला नोकरगदेदा ड्योइसी हाडला धन सम्पत्तिगदे जिम्मा पिन्जी। <sup>15</sup> अर्गु य्हुल्सारी निबा धुइरी थे फ्युकपो म्हिसे हाडला नोकरगदेसे तिग तिग गे लखम्मुला थे अन्छार गिकदा म्हरला डबल डा, गिकदा डबल न्ही, गिकदा डबल गिक पिन्सी निजी।

\* 25:12 लूका १३:२५

16 “जमाहेन्से म्हरला डबल डा याड्बा चा तुरुन्तन निजी। ओच्छे व्यापार लसी अर्गु म्हरला डबल डा सहोजी। 17 थेहड् लसीन म्हरला डबल न्ही याड्बासेनोन अर्गु म्हरला डबल न्ही सहोजी। 18 तर म्हरला डबल गिक याड्बासे चा थे डबल भोर्सी स न्हडरी ल्हूसी थान्जी।

19 “ल्हानान धिन लिच्छा थे नोकरगदेला मालिक खसी थेनीगदेदेन छ्याम हिसाब किताब म्हाइजी। 20 जमाहेन्से म्हरला डबल डा याड्बा नोकर खसी ‘मालिक, हाडसे डादा पिन्बा डबल डाग्याम डाइ अर्गु डबल डा सहोबा मुला, चु किन्गो’ भिसी भिमा, 21 मालिकसे थेदा ‘स्याबास ज्यबा नोकर, एसे जजा तामरी विश्वास उन्जी। थेतबासेलमा दाहेन्से डाइ एदा ल्हानान तामगदे जिम्मा पिन्ना। दाहेन्से ए डादेन छ्याम ताड्सी गे लउ’ भिसी भिजी।

22 “जमाहेन्से म्हरला डबल न्ही याड्बा नोकरएनोन खसी ‘मालिक, हाडसे डादा पिन्बा म्हरला डबल न्हीग्याम डाइ अर्गु म्हरला डबल न्ही सहोबा मुला, चु किन्गो’ भिसी भिमा, 23 थेदाएनोन मालिकसे ‘स्याबास ज्यबा नोकर, एसेनोन जजा तामरी विश्वास उन्जी। थेतबासेलमा एदाएनोन डाइ ल्हानान तामगदे जिम्मा पिन्ना। दाहेन्से एएनोन डादेन छ्याम ताड्सी गे लउ’ भिसी भिजी।

24 “थेहड् लसीन म्हरला डबल गिक याड्बा नोकरएनोन खसी ‘मालिक, हाड तिगै आढ्वबा ग्लाग्याम बाली दुइबारी म्हाइबादेन तिगै आय्हाप्बा ग्लारी पोप लबारी म्हाइबा खरो म्हि हिन्ना भिबा ताम डादा था मुबा। 25 थेतबासेलमा लोड्सी हाडसे डादा पिन्बा म्हरला डबल डाइ स न्हडरी ल्हूसी थान्जी। दाहेन्से हाडला चु डबल किन्गो’ भिसी भिजी।

26 “जमाहेन्से मालिकसे थेदा ‘ब्लेगु गे आखेल्बा नोकर, डाइ तिगै आढ्वना बाली दुइबारी म्हाइबादेन तिगै आय्हाप्बा

ग्लाग्याम पोप लबारी म्हाइमुला भिबा ताम एदा था मुबा हिन्सम, 27 एसे डाइ पिन्बा डबल बैकरी थान्तोःबा मुबा, एसे बैकरी थान्बा हिन्सम डाइ दोःसी ब्याजदेन थे डबल किन्म्याड्सेला' भिसी भिजी।

28 “जमाहेन्से मालिकसे ‘थे म्हरला डबल थेग्याम ब्यन्सी डबल च्युइ मुबा म्हिदा पिन्गो। 29 तिग्दा भिसम जुन म्हिदेन छ्याम मुला थेदा अर्गुएनोन पिन्ना। जमाहेन्से थेदेन छ्याम झन ल्हानान तला। तर जुन म्हिदेन छ्याम आरे थेदेन छ्याम मुबा जजाकीएनोन थेग्याम ब्यन्ना।†\* 30 दाहेन्से थे गे आखेल्बा नोकरदा मडग्यार धोपधोप्बा ग्लारी भ्याड्गो। थेरी म्हिगदे स्वा क्रेसी क्राबा क्रिड्बा लला।\* ”

### निसाफ लबा धिन

31 “परमेश्वरसे पुइखबा म्हि य्हाल य्हाल्बा शक्तिरी स्वर्गदूतगदेदेन छ्याम खसी हाडला ठिरी शक्तिशाली ग्ले दोसी धन्छ्याला।\* 32 थे धुइरी जम्बुलिडरी मुबा जम्मान य्हुलला म्हिगदे डा मुबा ग्लारी पोप तला। जमाहेन्से गोठालोसे रादेन ग्युदा फेबा हड् लसी थेसेनोन थे म्हिगदेदा फेला। 33 थेहड् लसी फेमाहेन्से डाइ रादा देब्रेपट्टि थान्ना। ओच्छे ग्युदा चा दाहिनेपट्टि थान्ना।

34 “जमाहेन्से डाइ हाडला दाहिनेपट्टि मुबा म्हिगदेदा चुहड् भिसी भिला, ‘डाला आबा परमेश्वरग्याम मोलम याड्बा म्हिगदे! जम्बुलिड छ्यामाहेन्सेन एनीगदेला लागिरी सहोसी थान्बा य्हुल्सारी खसी चिड। 35 तिग्दा भिसम डा खेन्बा फुइबा

† 25:29 चु उखानना अर्थ चा खालै म्हिसे परमेश्वरग्याम तिगै मोलम याड्बा मुसम थेदा पूरान चलब लतोःला, चुहड् लसी चलब लमा थेदेन छ्याम मुबा मोलम बढब तबान निला। तर थेसे थे मोलम चलब आलनी भिसम याड्बा मोलमएनोन म्हासी निला। \* 25:29

मत्ती १३:१२; मर्कू ४:२५; लूका ८:१८ \* 25:30 मत्ती ८:१२; २२:१३; लूका १३:२८

\* 25:31 मत्ती १६:२७; १९:२८

धुइरी एनीगदेसे डादा चबा थुइबा पिन्जी। डा विदेशी तसैनोन एनीगदेसे डादा हाडला दिमरी चिपुइजी। <sup>36</sup> ओच्छे डाइ क्वान क्वान्आम्याइबा धुइरी एनीगदेसे डादा क्वान पिन्जी। डा आखम्बा धुइरी एनीगदेसे डादा च्याजी, डा झ्याल्खानरी परब तमा एनीगदे डादा स्याप्वारी खजी।’

<sup>37</sup> “चुहइबा ताम थेःसी परमेश्वरसे कुल्बा ताम ड्यानबा म्हिगदेसे थेदा चुहइ भिसी ड्योइला, ‘प्रभु, डन्से हाडदा खाइमा खेन्बा फुइबा म्राइसी चबा थुइबा पिन्जी? <sup>38</sup> ओच्छे डन्से हाडदा खाइमा विदेशी भिसी डन्ना दिमरी स्य्हूपुइजी, ओच्छे खाइमा हाडसे क्वानआम्याइबा म्राइसी डन्से हाडदा क्वान पिन्जी। <sup>39</sup> हाड आखम्बा खाइमा म्राइसी डन्से हाडदा च्याजी? खाइमा हाड झ्याल्खानरी परब तबा म्राइसी डनी हाडदा स्याप्वारी खजी?’

<sup>40</sup> “जमाहेन्से डाइ थेनीगदेदा ‘एनीगदेसे डाला ताम ड्यानगो, चु डाला आलेगदे न्हडला जम्मान भन्दा जजा आले गिकदा एनीगदेसे जे लबा मुबा थे डालान लागिरी लबा हिन्ना’ भिसी भिला।

<sup>41</sup> “दोःसी डाइ हाडला देब्रेपट्टि मुबा म्हिगदेदा चा चुहइ भिसी भिला, ‘नाश तसी निबा म्हिगदे, दाहेन्से एनीगदे शैतानदेन थेला दूतगदेला लागिरी सहोबा खाइमै आसिबा मेरी निउ! <sup>42</sup> तिगदा भिसम डा खेन्बा फुइबा धुइरी एनीगदेसे डादा चबा थुइबा आपिन्नी। <sup>43</sup> डा विदेशी मुमा एनीगदेसे डादा एनीगदेला दिमरी चिआपुइनी। डाइ क्वान क्वान्आम्याइमा एनीगदेसे डादा क्वान आपिन्नी। डा आखम्बा धुइरी एनीगदेसे डादा आच्यानी। ओच्छे डा झ्याल्खानरी परब तबा धुइरी एनीगदे डादा स्याप्वारी आखनी।’

<sup>44</sup> “जमाहेन्से थेनीगदेसेनोन ‘प्रभु, खाइमा डन्से हाड खेन्बा फुइबादेन विदेशी, क्वान क्वान्आम्याइबा, आखम्बा ओच्छे

झ्याल्खानरी परब तबा म्राङ्सीनोन ह्वाडला वास्ता आलनी? भिसी झ्योइला।

45 “जमाहेन्से डाइ थेनीगदेदा ‘एनीगदेसे डाला ताम झ्यान्गो, चु डाला आलेगदे न्हडला जम्मान भन्दा जजा आलेदा एनीगदेसे वास्ता आलबान डादा वास्ता आलबा हिनना’ भिसी भिला।

46 “थेतबासेलमा परमेश्वरसे कुल्बा ताम आझ्यान्बा म्हिगदेसे चा जुकजुकधोनान सजाय याडला। तर परमेश्वरसे कुल्बा ताम झ्यान्बा म्हिगदेसे चा जुकजुकधोनाला जुनी याडला।”\*

## 26

येशूदा साइबारी म्हाइबा

मर्कूस १४:१-२; लूका २२:१-२; यूहन्ना ११:४५-५३

1 चु जम्मान ताम सुङ्सी जिन्माहेन्से येशूसे ह्वाडला चेलागदेदा चुहङ् भिसी सुङ्जी, 2 “मिश्र य्हुलसाग्याम फेसी खबा धिनदा ढन्सी धड्बा चाड खबारी न्हीरे जे मुला भिबा ताम एनीगदेदा थानोन मुला। थेनोन धुइरी परमेश्वरसे पुइखबा म्हिदा क्रुसरी टांगब लबारी चुङ्सी म्हिगदेदा जिम्मा पिन्ना।”\*

3 थेनोन धुइरी परमेश्वरला मन्दिररी पूजा लबा मुल म्हि कैयाफाला दिमरी यहूदी गन्बागदेदेन परमेश्वरला मन्दिररी पूजा लबा मुल म्हिगदे हुप तजी। 4 ओच्छे थेनीगदेसे येशूदा खाहङ् लसी खालैदा था आयाङ्ना साइबा भिसी ह्वाड ह्वाड न्हडरी सल्लाह लजी। 5 तर थेनीगदेसे “य्हाडला चाडला धुइरी चा चुङ्बारी आत। चाडला धुइरी चुङ्जी भिसम म्हिगदेसे हुल दडगा लला” भिसी भिजी।

मिडम्हेमे गिकसे येशूला थोबोरी अत्तर फोर्बा

मर्कूस १४:३-९; यूहन्ना १२:१-८

\* 25:46 दानि १२:२ \* 26:2 प्रस्था १२:१-२७

6 येशू बेथानिया भिबा नाम्साला कोरे खबा सिमोनला दिमरी फेपूखजी। 7 सोल छ्योइबान लबा धुइरी म्रिडम्हेमे गिक सिङ्गमरमरला ताडरी ल्हानान महंगो अत्तर भसी येशू मुबा ग्लारी खजी। ओच्छे थेसे थे अत्तर येशूला थोबोरी युजी।\*

8 चुहड् लबा म्राड्सी येशूला चेलागदे बोमो खसी “चुहड्बा महंगो अत्तर तिग्दा ओहड्न्नोन खेरो भ्याड्बा? 9 बरु चु अत्तर चूड्सी खबा टाडगा प्राडबोगदेदा पिन्बा हिन्सै तसे मुबा” भिसी हाड हाड न्हडरी ताम लजी।

10 येशूसे चु ताम था याड्सी थेनीगदेदा चुहड् भिसी सुड्जी, “एनीगदेसे तिग्दा चु म्रिडम्हेमेदा कचकच लबा? चुसे मी डाला लागिरी ज्यबा गे लबा मुला। 11 तिग्दा भिसम प्राडबोगदे मी सदन एनीगदेदेन छ्याम तला। तर डा मी एनीगदेदेन छ्याम सदन आत।\* 12 चुसे डाला सिबा ल्हुइ धुर्सारी थान्बाला लागिरी डा सिबा भन्दा डाच्छान डाला थोबोरी चु अत्तर युसी ठीक लबा मुला। 13 च्यागो, एनीगदेसे डाला ताम इयान्गो, जम्बुलिडला जुन जुन ग्लारी थार्बा पिन्बा समाचार थे:ना लला, थे, थे ग्लारी चु म्रिडम्हेमेसे लबा गे ढन्बाला लागिरी थेला ताम लला।”

येशूदा धोका पिन्बा

मर्कुस १४:१०-११; लूका २२:३-६

14 जमाहेन्से येशूला च्युक न्ही चेलागदे न्हडला यहूदा इस्करियोत भिबा चेला गिक परमेश्वरला मन्दिररी पूजा लबा मुल महिगदे मुबा ग्लारी निजी। 15 ओच्छे थेसे थेनीगदेदा “चुदे डाइ येशूदा चुड्सी हाडनीदा जिम्मा पिन्सम हाडनीसे डादा तिग पिन्ना?” भिसी इयोइमा, थेनीगदेसे यहूदा इस्करियोतदा बोगल गिकसे च्युइ म्हडला डबल पिन्ना भिसी पिन्जी। 16 जमाकुनुहेन्से

\* 26:7 लूका ७:३७-३८ \* 26:11 वयव १५:११

यहूदा इस्करियोतसे येशूदा चुड्सी पिन्बाला लागिरी दाउ च्यासी भ्रजी।

येशूसे भोज तयार लउ भिसी कुल्बा

मर्कूस १४:१२-२५; लूका २२:७-१३; यूहन्ना १३:२१-३०

17 खमीर आयुना गेड चसी धड्बा चाडला शुरुला धिनकुनु चेलागदे येशू मुबा ग्लारी खसी “हाडला लागिरी डन्से मिश्र यहुल्साग्याम फेसी खबा धिनदा ढन्सी धड्बा चाडला भोज खानड ठीक लउ?” भिसी ड्योइजी।

18 येशूसे चेलागदेदा चुहड् भिसी कुल्जी, “एनीगदे शहररी म्हि गिक मुबा ग्लारी निसी थें म्हिदा ‘डा सिबा धुइ तसी जिन्बा मुला। थेतबासेलमा डाइ हाडला चेलागदेदेन छ्याम चिसी एला दिमरी मिश्र यहुल्साग्याम फेसी खबा धिनदा ढन्सी धड्बा चाड धड्बा सेम मुला, भिसी गुरुसे सुड्बा मुला’ भिसी पाङ्गो।” 19 जमाहेन्से येशूसे कुल्बा अन्छारनोन चेलागदेसे मिश्र यहुल्साग्याम फेसी खबा धिनदा ढन्सी धड्बा चाडला भोज ठीक लजी।

20 ड्यसे तमाहेन्से येशू हाडला च्युक न्ही चेलागदेदेन छ्यामनोन भोज छ्योइबारी धन्छ्याजी। 21 जमाहेन्से भोज छ्योइबान लबा धुइरी येशूसे चेलागदेदा “च्यागो, एनीगदेसे डाला ताम ड्यानगो, एनीगदे न्हडलान गिकसे डादा म्हिगदेला यारी जिम्मा पिन्ना” भिसी सुड्जी।

22 जमाहेन्से लहानान दुख ड्हम्सी चेलागदे जम्मासेन येशूदा “प्रभु, थें म्हि डानोन हिन्ना?” भिसी पालो पालो लसी ड्योइबारी छ्याइजी।

23 ओच्छे येशूसे थेंनीगदेदा चुहड् भिसी सुड्जी, “च्यागो, जुन म्हिसे खार्बारी डादेन छ्याम गेड तुइसी चमुला, थेंनोन म्हिसे डादा चुड्सी पिन्ना।” \* 24 परमेश्वरला बचनरी भ्रिबा हड्न्नोन परमेश्वरसे

\* 26:23 भजन ४१:९

पुइखबा म्हि मी सिनोन तोःला। तर जुन म्हिसे परमेश्वरसे पुइखबा म्हिदा चुइसी महिला यारी जिम्मा पिन्ना, थेसे परमेश्वरग्याम खाहड्बा लोड्बा खबा सजाय याड्ला। बरु थे मी न्हनोन आन्हबा हिन्सम ज्यबा तसेला मुबा” भिसी सुइजी।

25 येशूदा चुइसी पिन्बारी म्हाइबा यहूदासेनोन येशूदा “गुरु, थे म्हि डानोन हिन्ना?” भिसी इयोइजी।

जमाहेन्से येशूसे थेदा “थे ताम मी एसेन पाइजी” भिसी सुइजी।

प्रभु भोजला शुरु

मर्कूस १४:२२-२६; लूका २२:१४-२३; १ कोरिन्थी ११:२३-२५

26 थेनीगदे भोज चबान लबा धुइरी येशूसे गेड थोसी परमेश्वरदा धन्यवाद पिन्जी। ओच्छे थे गेड क्युइसी चेलागदेदा “ना! चु चउ, चु डाला ल्हुइ हिन्ना” भिसी सुइजी।

27 जमाहेन्से येशूसे खोरेरी मुबा अडगुरला निडगु थोसी परमेश्वरदा धन्यवाद पिन्सी, चेलागदेदा चुहड् भिसी सुइजी, “ना! एनीगदे जम्मासेन चु थुइगो। 28 तिगदा भिसम एनीगदेसे थुइबा चु निडगु डाला का हिन्ना। चु का एनीगदेदेन छ्याम लबा छारं कबुल हिन्ना। चुनोन का ल्हानान महिला पापला दोष मेटब लबाला लागिरी बगब तला।\* 29 तर एनीगदेसे डाला ताम इयान्गो, एनीगदेदेन छ्याम डाला आबाला यहूल्सारी छार अडगुरला निडगु थुइबा धिन आखतेधोना डाइ चु निडगु आथुइ।”

30 जमाहेन्से परमेश्वरदा धन्यवादला व्हाइ गिक गोसी येशू हाडला चेलागदेदेन छ्याम थे ग्लाग्याम जैतून भिबा गडरीक्यार फेपजी।

† 26:28 ल्हानान हड्बा बाइबलरी “छार” भिसी भिबा आरे। \* 26:28 प्रस्था २४:८; यर्मि ३१:३४

पत्रुससे येशूदा खलाला भिसी पाङ्बा ताम

मर्कूस १४:२७-३१; लूका २२:३१-३४; यूहन्ना १३:३६-३८

31 जमाहेन्से येशूसे हाडला चेलागदेदा चुहङ् भिसी सुङ्जी, “तिनी म्हुनड एनीगदे जम्मासेन डादा ख्लासी यार्ला। तिग्दा भिसम परमेश्वरला बचनरी ‘डाइ गोठालोदा साइला। ओच्छे ग्युगदे ससा बडबड तसी यार्ला’ भिसी भिबा मुला।” \* 32 तर डादा सिबाग्याम सोना लमाहेन्से एनीगदे भन्दा डाच्छा डा गालीलरी निला।”\*

33 थेनोन धुइरी पत्रुससे येशूदा “हाडदा थेहङ् लमा जम्मासेन ख्लासी यासैनोन डाइ हाडदा खाइमै आख्ला” भिसी भिजी।

34 जमाहेन्से येशूसे पत्रुसदा “च्यागो, एसे डाला ताम ड्यान्गो। तिनी म्हुनड नागा क्राबा भन्दा डाच्छा एसे सोमरेमधोना ‘डाइ येशूदा डोसेबान आरे’ भिसी पाङ्गला” भिसी सुङ्जी।

35 दोःसी पत्रुससे येशूदा “डा हाडदेन छ्याम सितोःसैनोन डाइ हाडदा आख्ला” भिसी भिजी। ओच्छे स्य्हान्दो चेलागदेसेनोन थेहङ्गनोन भिजी।

गेतसमनी भिबा ग्लारी येशूसे लबा प्रार्थना

मर्कूस १४:३२-४२; लूका २२:३९-४६

36 जमाहेन्से येशू हाडला चेलागदेदेन छ्याम गेतसमनी भिबा ग्लारी फेप्जी। ओच्छे चेलागदेदा “एनीगदे चुरीन चिउ, डा चा जजाकी क्याथाड निसी प्रार्थना लला” भिसी सुङ्सी 37 येशूसे पत्रुसदेन जब्दियाला झा न्हीदा हाडदेन छ्यामनोन भोर्सी फेप्जी। ओच्छे थेदा ल्हानान सुर्दा तसी सेमरी दुख तबारी छ्याइजी। 38 जमाहेन्से येशूसे थेनीगदेदा “डाला सेम क्रोसी डा सिबा तेबान तबा मुला। थेतबासेलमा एनीगदे चुरीन डा हङ् लसी छोर्सी चिउ” भिसी सुङ्गी।

\* 26:31 जक १३:७ \* 26:32 मत्ती २८:१६

39 ओच्छे येशू चा जजाकी क्याथाड फेप्सी सरी ख्लुप तसी “आबा डाथोरी खबारी छ्याइबा चु दुख तसम डादा नाआपुङ्गो। तर डाइ म्हन्बा अन्छार आहिन, हाडसे म्हन्बा अन्छार तगै” भिसी प्रार्थना लजी।

40 जमाहेन्से येशू चेला सोम मुबा ग्लारी दोःसी फेप्खमा थेनीगदे म्हेर्सी चिबा म्राङ्सी येशूसे पत्रुसदा चुहङ् भिसी सुङ्जी, “एनीगदे डादेन छ्याम घण्टा गिक सुत्तै छोर्सी चिआखमनी? 41 दाहेन्से एनीगदे पापरी फसब आतबाला लागिरी छोर्सी प्रार्थना लसी चिउ। च्यागो, एनीगदेला आत्मा मी तयार मुला, तर ल्हुइ चा कमजोर मुला।”

42 दोःसीनोन येशू डाच्छाला ग्लारीन फेप्सी “आबा चु दुख डाइ नानोन तोःबा हिन्सम हाडसे म्हन्बा हङ्नोन तगै” भिसी प्रार्थना लजी।

43 ओच्छे चेलागदे मुबा ग्लारी दोःसी फेप्खमा चेलागदे म्हेर्सी चिबा स्यापूजी। म्हेर्बा खबासे लमा थेनीगदेसे मीनोन ठोङ्आखमनी। 44 थेतबासेलमा येशूसे थेनीगदेदा थेरीन ख्लासी सोमरेमला पालोरी डाच्छाला ग्लारीन फेप्सी डाच्छाला हङ् लसीन प्रार्थना लजी।

45 जमाहेन्से येशू चेलागदे मुबा ग्लारी फेप्खसी थेनीगदेदा चुहङ् भिसी सुङ्जी, “अङ्गन एनीगदे म्हेर्सी ब्लपूबा न्हबान मुला? च्यागो, परमेश्वरसे पुइखबा म्हिदा चुङ्सी पापीगदेला यारी जिम्मा पिन्बा धुइ खसी जिन्बा मुला। 46 रेःगो, निइ! च्यागो, डादा स्य्हान्दोला यारी जिम्मा पिन्बा म्हि खसी जिन्बा मुला।”

येशूदा चुङ्बा

मर्कूस १४:४३-५०; लूका २२:४७-५३; यूहन्ना १८:३-१२

47 येशूसे चु ताम सुङ्बान लबा धुइरी च्युक न्ही चेला न्हडला यहूदा इस्करियोत भिबा चेलादेन छ्याम कडीदेन तरवार थोबा म्हिला हुल धोखजी। थेनीगदेदा परमेश्वरला मन्दिररी पूजा लबा

मुल म्हिदेन यहूदी गन्बागदेसे पुइखमुबा। 48 येशूदा चुड्बारी खबा म्हिगदेदा यहूदासे “जुन म्हिदा डाइ च्योक लला थेनोन येशू हिन्ना, थेदान चुड्गो” भिसी डाच्छान पाड्बा मुबा।

49 येशू मुबा ग्लारी धोमैछ्याम यहूदासे “लास्सो, फ्याफुल्ला गुरु” भिसी येशूदा च्योक लजी।

50 जमाहेन्से येशूसे थेदा “यहूदा, ए तिग लबारी खबा लउ” भिसी सुड्माहेन्से कडी तरवार पुइसी खबा म्हिगदेसे येशूदा चुड्सी खीसी भोजी। 51 येशूदेन छ्याम मुबा चेलागदे न्हडला गिकसे हाडला तरवार तेःसी परमेश्वरला मन्दिररी पूजा लबा मुल महिला नोकरला नाब्यड च्वाट्टन थाजी।

52 थे चेलादा येशूसे चुहड् भिसी सुड्जी, “एला तरवार स्युबारी झाड्गो। तिग्दा भिसम तरवार थोबा जम्मान म्हिदा तरवारसेन ताम्सी नाश लला। 53 चुदे डाइ डाला आबादा पाड्बा हिन्सम डादा जोगब लबारी डाला आबासे च्युक न्ही भन्दा ल्हानान स्वर्गदूतगदेला हुल तुरुन्तन पुइखसे मुबा। चु ताम दान्देधोना एसे घोबा आरे? 54 तर डाइ चुहड् लबा हिन्सम परमेश्वरला बचनरी चुहड् तनोन तला भिसी भिबा ताम खाहड् लसी पूरा तला?”

55 जमाहेन्से येशूसे हाडदा चुड्बारी खबा महिला हुलदा चुहड् भिसी सुड्जी, “एनीगदे तिग्दा यहूदा चुड्बारी खबा हड् लसी कडी तरवार थोसी खबा? खाइ, डाइ म्हिगदेदा धिन धिननोन परमेश्वरला मन्दिररी लोप्सी चिबा धुइरी एनीगदेसे डादा आचुड्नी।\* 56 तर अगमवक्तागदेसे परमेश्वरला बचनरी भिबा अन्छार पूरा तगै भिसीन चुहड् तबा हिन्ना।” जमाहेन्से जम्मान चेलागदेसे येशूदा ख्लासी यार्जी।

\* 26:55 लूका १९:४७; २१:३७

येशूदा यहूदीगदेला सभारी भोर्बा

मर्कुस १४:५३-६५; लूका २२:५४-५५, ६३-७१; यूहनना १८:१३-१४, १९-२४

57 जमाहेन्से येशूदा चुड्बा म्हिगदेसे येशूदा परमेश्वरला मन्दिररी पूजा लबा मुल म्हि कैयाफाला दिमरी भोर्जी। थेरी यहूदी गन्बागदेदेन यहूदी धर्मगुरुगदेएनोन पोप तसी चिबा मुबा। 58 तर पत्रुस चा थारेडग्यामसेन येशूदा च्याबान च्याबान थे पूजा लबा मुल म्हिला दिमला खाडगाधोनान निजी। जमाहेन्से येशूदा तिग लबा चीम भिसी पालेगदेदेन छ्याम चिसी च्याबारी छ्याइजी।

59 परमेश्वरला मन्दिररी पूजा लबा मुल म्हिगदेदेन यहूदी सभाला जम्मान म्हिगदेसे येशूदा साइबाला सजाय पिन्बाला लागिरी येशूला बिरोधरी लुसीला ताम पाड्बा म्हिगदे म्हाइजी। 60 चुहड् लसी ल्हानान म्हिगदेसे येशूदा बिरोध लबान लुसीला ताम पाड्जी। तसैनोन थेनीगदेसे पाड्बा ताम गिकनोन आढिक्नी। जम्मान भन्दा लिच्छाला म्हि न्ही डाच्छापट्टि खसी, 61 “च्यागो, चु म्हिसे ‘डाइ परमेश्वरला मन्दिरदा फुप्सी सोमरेरीन सहोखम्ला’ भिसी पाड्बा मुला” भिसी दोष लजी।\*

62 जमाहेन्से परमेश्वरला मन्दिररी पूजा लबा मुल म्हि रे:सी येशूदा “एसे तिग्दा जोहाब आपिन्बा? चु म्हिगदेसे एला बिरोधरी पाड्बा तामला बारेरी एदा तिगै पाड्सेला आरे?” भिसी ड्योइजी।

63 तर येशूसे तिगै जोहाब आलमाहेन्से परमेश्वरला मन्दिररी पूजा लबा मुल म्हिसे दो:सीनोन येशूदा “छोनबो परमेश्वरला मिनरी घान फासी डन्दा पाड्गो। तिग ए परमेश्वरला झा थार्बा पिन्बा ख्रीष्टनोन हिन्ना?” भिसी पाड्मा,

64 येशूसे थेदा “थे ताम मी हाडसेन सुड्जी। तसैनोन दाहेन्से हाडनीसे परमेश्वरसे पुड्खबा म्हिदा शक्तिशाली परमेश्वरला

\* 26:61 यूह २:१९

दाहिने छ्यापट्टि चिबादेन स्वर्गग्याम खसुरी खबान लबा म्राड्ला” भिसी सुड्जी।\*

65 जमाहेन्से परमेश्वरला मन्दिररी पूजा लबा मुल म्हिसे हाडला क्वान ढेबान, “चु म्हिसे परमेश्वरला बिरोध लसी ताम पाड्बा मुला। दाहेन्से य्हाडदा अर्गु प्रमाण तिग्दा तोःजी? हाडनीसे दान्दे चुसे हाडसे हाडदान परमेश्वर सहोसी पाड्बा ताम य्हाडसे थेःनोन थेःजी। 66 दाहेन्से हाडनीला तिग बिचार मुला?” भिसी ड्योइमा, स्य्हान्दोगदेसे “चु म्हि साइनोन तोःबा म्हि हिन्ना” भिसी भिजी।\*

67 जमाहेन्से थे म्हिगदेसे येशूला लीरी थो स्वाबा तोबा ग्याड्बा लजी। ओच्छे कोइ कोइसे चा तोबान,\* 68 “ए थार्बा पिन्बा स्त्रीष्ट हिन्सम, लु, अगमवाणी पाड्गो। एदा खाल्से तोबा हिन्ना?” भिसी पाड्जी।

पत्रुससे डाइ येशूदा डोसेबान आरे भिसी पाड्बा

मर्कूस १४:६६-७२; लूका २२:५६-६२; यूहन्ना १८:१५-१८, २५-२७

69 थे धुइरी पत्रुस खाड्गारी मुबा। थेदा म्राड्सी नोकरस्या गिक थे मुबा ग्लारी खसी, “एएनोन गालीलला येशूदेन छ्यामनोन मुबा आहिन?” भिसी ड्योइजी।

70 तर पत्रुससे जम्मालान ओन्छाडरी “एसे खाल्ला ताम लबा, डादा तिगै था आरे” भिसी, 71 थे खाड्गाला म्रापरी निजी। थेरीनोन थेदा स्य्हान्दो नोकरस्या गिकसे म्राड्सी जम्मान म्हिगदेदा “चु म्हिएनोन नासरतला येशूदेन छ्यामनोन मुबा” भिसी पाड्जी।

72 दोःसी पत्रुससे घान फाबान, “डाइ थे म्हिदा डोसेबान आरे” भिसी पाड्जी।

\* 26:64 दानि ७:१३ \* 26:66 लेवी २४:१६ \* 26:67 यशै ५०:६

73 जजाकी लिच्छा थेरी मुबा म्हिगदे पत्रुसला डामरी खसी थेदा “पक्कान एएनोन थेनीगदे न्हडला गिक हिन्ना भिबा एला तामग्यामनोन था तजी” भिसी भिजी।

74 जमाहेन्से पत्रुससे “डाइ लुसीला ताम पाड्बा हिन्सम परमेश्वरला सजाय डाथोरी खगै भिसी घान फाबान डाइ थे म्हिदा डोसेबान आरे” भिसी भिजी।

थेसे थेहड् भिमैछ्याम नागा क्राजी। 75 जमाहेन्से येशूसे “च्यागो, नागा क्राबा भन्दा डाच्छा सोमरेमधोना एसे डादा डोसेबान आरे भिला” भिसी सुड्बा ताम पत्रुससे ढन्जी। थेतबासेलमा थे मडग्यार निसी घ्वाँ घ्वाँ क्राजी।

## 27

येशूदा पिलातसला डाच्छापट्टि भोर्बा

मर्कूस १५:१; लूका २३:१-२; यूहनना १८:२८-३२

1 स्यहोरीन परमेश्वरला मन्दिररी पूजा लबा जम्मान मुल म्हिगदेदेन यहूदी गन्बागदेसे येशूदा साइनोन तोःला भिसी सल्लाह लजी। 2 जमाहेन्से थेनीगदेसे येशूदा खीसी पिलातस भिबा रोमी अञ्चलाधीश मुबा ग्लारी भोर्सी जिम्मा पिन्जी।

यहूदा इस्करियोत च्योसी सिबा

मुल चेला १:१८-१९

3 येशूदा साइनोन तोःला भिसी पाड्बा ताम येशूदा चुड्सी पिन्बा यहूदासे थेःजी। जमाहेन्से थेदा ल्हानान दुख इहम्सी थेसे किन्बा बोगल गिकसे च्युड् म्हुइला डबल परमेश्वरला मन्दिररी पूजा लबा मुल म्हिगदेदेन यहूदी गन्बागदेदा दोःसी पिन्बारी खजी। 4 ओच्छे यहूदासे थेनीगदेदा “तिगै दोष आरेबा म्हिदा साइबाला लागिरी चुड्सी पिन्सी डाइ पाप गे लबा मुला” भिसी भिमा, थेनीगदेसे यहूदादा “डन्दा तिग मतलब? एनोन सेला” भिसी भिजी।

5 जमाहेन्से यहूदासे थे म्हइला डबल परमेश्वरला मन्दिररीन भ्याड्सी निजी, ओच्छे थे च्योसी सिजी।

6 तर परमेश्वरला मन्दिररी पूजा लबा मुल म्हिगदेसे चा थे डबल दुइसी “चु डबल परमेश्वरला मन्दिरला दुकुटीरी थान्बा ठीक आत। तिग्दा भिसम चु काला सय हिन्ना” भिसी भिजी। 7 थेतबासेलमा थेनीगदे ह्वाड ह्वाड न्हडरी सल्लाह लसी थे टाडगासे अर्गु यहुल्साला सिबा म्हि ल्हुबारी कुमालेला वारी ग्लुजी। 8 थेतबासेलमा दान्देधोनाएनोन थे वारीदा काला वारी भिसी भिमुला।\* 9 यर्मिया अगमवक्तासे पाड्बा ताम चुहड् लसी पूरा तजी, “थे म्हइला बोगल गिकसे च्युड डबल परमेश्वरला मन्दिररी पूजा लबा म्हिगदेसे किन्जी।

थे डबल चा थेला सय हिन्ना भिसी इस्राएलला म्हिगदेसे तोगब लबा मुबा।\*

10 जमाहेन्से परमेश्वरसे डादा कुल्बा अन्छार थेनीगदेसे थेनोन टाडगासे कुमालेला बु ग्लुजी।”\*

येशूदा पिलातसला डाच्छापट्टि राप्पुड्बा

मर्कूस १५:२-१५; लूका २३:३-५, १३-२५; यूहन्ना १८:३३-१९:१६

11 येशू अञ्चलाधीशला डाच्छापट्टि राप्माहेन्से अञ्चलाधीशसे “तिग ए यहूदीगदेला ग्ले हिन्ना?” भिसी ड्योइमा, येशूसे थेदा “थे मी ह्वाडसेन सुड्बा मुला” भिसी जोहाब पिन्जी।

12 परमेश्वरला मन्दिररी पूजा लबा मुल म्हिगदेदेन यहूदी गन्बागदेसे येशूदा ल्हानान दोष लजी। तसैनोन येशूसे तिगै जोहाब आलनी। 13 जमाहेन्से पिलातस भिबा अञ्चलाधीशसे येशूदा “थेनीगदेसे एला बिरोध लसी एदा ल्हानान दोष लबान मुला, तिग

\* 27:8 मुल १:१८-१९

\* 27:9 जक ११:१२-१३

\* 27:10 जक ११:१३

एसे थे:बा आरे?” भिसी भिजी। 14 तर येशूसे थेदा ताम गिकलान जोहाब आपिन्नी। थेतबासेलमा अञ्चलाधीशएनोन उदेक तजी।

15 अञ्चलाधीशसे मिश्र यहूल्साग्याम फेसी खबा धिनदा ढन्सी धड्बा चाडला धुइरी म्हिला हुलसे धम्बा झ्याल्खानरी मुबा म्हि गिकदा पुइमुबा। 16 थे धुइरी जम्मान म्हिसे डोसेबा बारब्बा भिबा आज्यबा गे लबा म्हि गिक झ्याल्खानरी मुबा। 17 थेरी म्हिगदे पोप तमाहेन्से पिलातससे थेनीगदेदा “डाइ खालदा पुइगै भिबा एनीगदेला सेम मुला? बारब्बादा पुइगो कि थार्बा पिन्बा खीष्ट भिबा येशूदा पुइगो?” भिसी ड्योइजी। 18 तिगदा भिसम थेनीगदेसे येशूला डाह लसी हाड मुबा ग्लारी भबा हिन्ना भिबा ताम पिलातसदा था मुबा।

19 पिलातस निसाफ लबा ग्लारीन मुबा धुइरी पिलातसला मिडसे “थे तिगै दोष आरेबा म्हिदा तिगै थालउ। तिगदा भिसम तिनी म्हुनड डाइ थेला बारेरी म्हड प्राइसी डादा ल्हानान दुख तबा मुला” भिसी खबर पुइजी।

20 तर परमेश्वरला मन्दिररी पूजा लबा मुल म्हिगदेदेन यहूदी गन्बागदेसे थेरी मुबा म्हिला हुलदा “‘बारब्बादा ख्लासी पिन्गो। ओच्छे येशूदा चा साइगो’ भिउ” भिसी पाइपुइजी। 21 थेतबासेलमा दो:सी अञ्चलाधीशसे थेनीगदेदा “डाइ चु न्ही न्हडरी खजिबादा पुइगै भिबा एनीगदेला सेम मुला?” भिसी ड्योइमा, थेनीगदेसे “बारब्बादा पुइगो” भिसी भिजी।

22 जमाहेन्से पिलातससे थेनीगदेदा “थेहड् भिसम थार्बा पिन्बा खीष्ट भिबा येशूदा डाइ तिग लउ?” भिसी ड्योइमा, थेनीगदे जम्मासेन “चुदा क्रुसरी टाँगब लसी साइगो!” भिसी भिजी।

23 पिलातससे “तिगदा? चुसे थेहड्बा आज्यबा गे तिग लबा मुला?” भिसी ड्योइजी।

तर थेनीगदेसे झन क्रिड्बान, “चुदा कुसरी टाँगब लसी साइगो” भिसी भिजी।

24 तित्गै लसीन आखम्बा म्राड्सी दाहेन्से झन हल्ली खल्ली तला भिसी पिलातस लोड्जी। ओच्छे थेसे जम्मान महिला डाच्छा या खुसीं “चु म्हिदा साइबासे लमा डाइ तित्गै सजाय नाआतोःगै, थे सजाय एनीगदेसेन नागो” भिसी भिमा,\* 25 थेरी मुबा जम्मान म्हिगदेसे “चुदा साइबाला सजाय डन्देन डन्ना सन्तानसेन नाला” भिसी जोहाब पिन्जी।

26 जमाहेन्से पिलातससे बारब्बादा पुड्जी। तर येशूदा चा कोर्से तोसी कुसरी टाँगब लसी साइबाला लागिरी रोमी सिपाहीगदेदा जिम्मा पिन्जी।

सिपाहीगदेसे येशूदा खिसी लबा

मर्कूस १५:१६-२०; यूहन्ना १९:२-३

27 जमाहेन्से येशूदा सिपाहीगदेसे अञ्चलाधीश चिबा दिमरी भोजी। ओच्छे जम्मान सिपाहीगदे येशूला क्युसीन पोप तजी। 28 जमाहेन्से येशूला क्वान स्युसी वाला क्वान क्वान्सी पिन्जी। 29 थेनीगदेसे पुजुला फेटा सहोसी येशूदा थोड्सी पिन्जी। ओच्छे येशूदा दाहिने छ्यारी माला कडी पिन्सी “लाससो यहूदीगदेला ग्ले, फ्याफुल्ला” भिसी फ्या लबा सहोसी येशूदा खिसी लजी। 30 ओच्छे थेनीगदेसे येशूदा थो सवाबान थे माला कडीसे थोबोरी तोजी। 31 थेहड् लसी खिसी लमाहेन्से थेनीगदेसे थे क्वान स्युसी पिन्जी। ओच्छे येशूदा थेलान क्वान क्वान्सी कुसरी टाँगब लसी साइबारी भोजी।

येशूदा कुसरी टाँगब लबा

मर्कूस १५:२१-३२; लूका २३:२६-४३; यूहन्ना १९:१७-२४

† 27:24 पिलातससे या खुबाला अर्थ चा डाला तित्गै दोष आरे भिसी उन्बाला लागिरी हिन्ना। \* 27:24 व्‍यव २१:६-९

32 ग्यामरी निबान लमा थेनीगदेसे कुरेनी भिबा ग्लाला सिमोनदा खबान लबा स्यापजी। जमाहेन्से थेनीगदेसे थे म्हिदा कर लसी येशूला क्रुस पुइपुङ्जी। 33 ओच्छे थेनीगदे गलगथा भिबा ग्लारी धोखजी। गलगथा भिबा चा “खप्परला ग्ला” हिन्ना। 34 थेरी धोखमाहेन्से थेनीगदेसे येशूदा अडगुरला निडगुरी कम्बा मान युसी पिन्जी। तर येशूसे थे निडगु म्य्हाड्माहेन्से आसोल्नी।\*

35 थेनीगदेसे येशूदा क्रुसरी टाँगब लमाहेन्से चिट्ठा युसी ह्वाड ह्वाड न्हडरी येशूला क्वान भो लजी।\* 36 जमाहेन्से थेनीगदे थेरीन चिसी येशूदा खुङ्जी। 37 ओच्छे थेनीगदेसे “येशू यहूदीगदेला ग्ले” भिसी दोष उन्बा ताम भिसी येशूला थोबोथोरी क्रुसरी थान्जी। 38 थेनीगदेसे येशूदा क्रुसरी टाँगब लबा धुइरी यहो न्हीदाएनोन गिकदा दाहिनेपट्टि गिकदा देब्रेपट्टि क्रुसरी टाँगब लजी।

39 थे ग्याम निबा खबा म्हिगदेसेनोन ह्वाड ह्वाडला थोबो यहोइबान येशूदा खिसी लबान,\* 40 “लु, परमेश्वरला मन्दिर फुप्सी दोःसी सोमरेरीन स्होला भिबा म्हि दान्दे एसे ह्वाडसे ह्वाडदान जोगब लउ। ए परमेश्वरलान झा हिन्सम क्रुसग्याम मार फापगो” भिसी भिजी।\*

41 जमाहेन्से परमेश्वरला मन्दिररी पूजा लबा मुल म्हिगदे, यहूदी धर्मगुरुदेन यहूदी गन्बागदेसेनोन येशूदा खिसी लबान चुहङ् भिसी भिजी, 42 “चुसे स्य्हान्दो म्हिदा चा जोगब लजी, तर ह्वाडसे ह्वाडदान चा जोगब लबारी आखम्नी। चु इस्राएलीगदेला ग्ले आहिन! थे दान्देन क्रुसग्याम मार फापसी खगै। जमाहेन्से डन्से थेदा विश्वास लला। 43 चुसे परमेश्वरदा विश्वास लमुबा। ओच्छे ‘डा परमेश्वरलान झा हिन्ना’ भिसी भिमुबा। चुदे परमेश्वर चुदा म्हाड्सी ताड्बा मुसम परमेश्वरसेन चुदा जोगब लगै।”\*

\* 27:34 भजन ६९:२१ \* 27:35 भजन २२:१८ \* 27:39 भजन २२:७; १०९:२५

\* 27:40 मत्ती २६:६१; यहू २:१९ \* 27:43 भजन २२:८

44 थेहड लसीन येशूदेन छ्यामनोन क्रुसरी टाँगब लबा य्होगदेसेनोन येशूदा खिसी लजी।

### येशू सिबा

मर्कूस १५:३३-४१; लूका २३:४४-४९; यूहन्ना १९:२८-३०

45 जमाहेन्से धिनना बाह बजेहेन्से तीन बजेधोना य्हुल्सा नाडनोन धोपधोप तजी। 46 ओच्छे तीन बजेरीक्यार येशूसे घेन काइरी क्रिड्बान, “इलोइ इलोइ लामा सबखथनी?” भिसी सुड्जी। चुहड् भिबा चा “डाला परमेश्वर, डाला परमेश्वर ह्वाडसे डादा तिग्दा ख्लाबा?” भिबा हिन्ना।\*

47 येशूला ताम थे:सी थेरी राप्सी चिबागदे न्हडला कोइ कोइसे चा “चुसे मी एलियादा गा ड्योइबा चीम” भिसी भिजी। 48 जमाहेन्से थेनीगदे न्हडला गिक चा तुरुन्तन यार्बान निसी अडगुरला कम्बा निडगुरी क्वानगेन ब्लुम्सी माला कडीरी खीसी येशूदा ख्वाजी।\* 49 तर स्य्हान्दोगदेसे चा “भ्रान्गो, भ्रान्गो, चुदा एलिया खसी जोगब लला वा? च्यागे” भिसी भिजी।

50 दो:सी येशू घेन काइरी क्रिड्जी, जमाहेन्से येशूला सा निजी।

51 थेनोन धुइरी परमेश्वरला मन्दिररी मुबा पर्दा तोरहेन्से मारधोना ह्वाडनोन ढेसी पख्ले न्ही तजी। ओच्छे जम्बुलिडनोन याडयोड तसी पहरागदे फुप्जी।\* 52 जमाहेन्से धुर्सागदे ठोड्जी, ओच्छे परमेश्वरला ल्हानान म्हिगदेदा सिबाग्याम सोना लजी। 53 येशू सिबाग्याम सोना लमाहेन्से थेनीगदे धुर्साग्याम थोन्सी परमेश्वरला शहर यरूशलेमरी निजी। थेनीगदेदा थेरी ल्हानान म्हिगदेसे म्हाड्जी।

\* 27:46 भजन २२:१ \* 27:48 भजन ६८:२१ \* 27:51 प्रस्था २६:३१-३३

54 सडगुल खबादेन थेरी तबा जम्मान ताम प्राड्सी येशूदा खुड्सी चिबा रोमी सिपाहीगदेदेन कप्तान ल्हानान लोड्सी “पक्कान चु मी परमेश्वरला झानोन चीम” भिसी भिजी।

55 थेरी येशूदा गालीलहेन्सेन ह्यो लबान येशूदेन छ्याम छ्यामनोन खबा ल्हानान म्रिडम्हेमेगदेसेनोन थारेड्ग्यामसेन च्यासी चिबा मुबा। 56 थेनीगदे न्हडरी मरियम मग्दलिनी, याकूबदेन योसेफला आमा मरियमदेन जब्दियाला म्रिडएनोन मुबा।\*

येशूदा धुर्सारी थान्बा

मर्कूस १५:४२-४७; लूका २३:५०-५६; यूहन्ना १९:३८-४२

57 ड्यसे तमाहेन्से अरिमाथिया भिबा शहरला योसेफ भिबा फ्युकपो म्हि गिक पिलातस मुबा ग्लारी निजी। थेएनोन येशूला चेला मुबा। 58 पिलातस मुबा ग्लारी धोमाहेन्से थेसे येशूला लास हीजी। जमाहेन्से पिलातससे थेदा येशूला लास भोर्पुड्जी। 59 जमाहेन्से योसेफसे मलमलला सफा छार क्वानरी येशूला लास रिल्सी, 60 थेसे ह्याडलान लागिरी पहरारी ट्वाइसी सहोबा छार धुर्सारी थान्जी। ओचछे धुर्साला प्रापरी घेन युडबा बलिड्बान भसी थान्सी थे निजी। 61 थे धुर्साला डाच्छापट्टि मरियम मग्दलिनीदेन अर्गु मरियमएनोन चिबा मुबा।

सिपाहीगदेसे येशूला धुर्सा खुड्बा

62 न्हडगरदडसे बल्पबा न्हबा धिनकुनु परमेश्वरला मन्दिररी पूजा लबा मुल म्हिगदेदेन फरिसीगदे पिलातस मुबा ग्लारी निजी। 63 ओचछे थेनीगदेसे चुहड् भिसी भिजी, “थे ठगसे सोबा धुइरी ‘डादा सिबाग्याम सोमरेमाकुनु सोना लला’ भिसी भ्रबा ताम डन्दा था मुला।” 64 थेतबासेलमा सोमरेमाधोना सिपाहीगदेदा धुर्सा खुड्पुड्गो। आहिन्सम थेला चेलागदे खसी थेला लास य्हो लसी

\* 27:56 लूका ८:२-३ \* 27:63 मत्ती १६:२१; १७:२३; २०:१९; मर्कू ८:३१; ९:३१; लूका ९:२२; १८:३१-३३

भोर्ला। ओच्छे 'येशूदा सिबाग्याम सोना लजी' भिसी म्हिगदेदा डाच्छाला भन्दा इन झुक्याब लसी भ्रला।”

65 लु, थेहड् भिसम “सिपाहीगदे भोर्सी ज्यना लसी धुर्सा खुड्पुड्गो” भिसी पिलातससे थेनीगदेदा भिजी।

66 जमाहेन्से थेनीगदे धुर्सारी निसी धुर्साला म्पारी थान्बा युडबारी लाहा छाप लसी सिपाहीगदेदा खुड्पुड्जी।

## 28

येशूदा सिबाग्याम सोना लबा

मर्कूस १६:१-१०; लूका २४:१-१२; यूहन्ना २०:१-१०

1 बलपबा न्हबा धिनना न्हडगरदड स्यहोरीन मरियम मगदलिनीदेन स्यहान्दो मरियम भिबा म्रिडम्हेमे न्ही येशूदा थान्बा धुर्सा च्याबारी निजी। 2 थेनोन धुइरी सडगुल खजी। तिगदा भिसम स्वर्गग्याम परमप्रभुला दूत गिक मार फाप्सी धुर्साला म्पारी थान्बा युडबा बलिड्सी थेनोन युडबाथोरी चिजी। 3 थे स्वर्गदूतला ली धिनीला स्हेर हड्बान य्हाल य्हाल्बा मुबा। ओच्छे थेला क्वान ग्लिड तेबान तार मुबा। 4 थेदा म्राड्सी धुर्सा खुड्सी चिबा सिपाहीगदे लोड्सी फितफित धर्सी सिबा तेबान तजी।

5 तर स्वर्गदूतसे थे म्रिडम्हेमेगदेदा चुहड् भिसी भिजी, “एनीगदे थालोड्गो, तिगदा भिसम कुसरी टाँगब लसी साइबा येशूदा एनीगदेसे म्हाइबान मुला भिबा ताम डादा था मुला। 6 येशू चुरी आरे, थेसे सुड्बा हड्नोन थेदा सिबाग्याम सोना लसी जिन्बा मुला। एनीगदेन खसी थेदा थान्बा ग्ला च्यागो। 7 दाहेन्से एनीगदे योना निसी थेला चेलागदेदा 'येशूदा सिबाग्याम सोना लसी जिन्बा मुला। ओच्छे येशू एनीगदे भन्दा डाच्छा गालील अञ्चलरी फेप्वान मुला। एनीगदेसे येशूदा थेरीन म्राड्ला' भिसी पाड्सी पिन्गो।”

8 चुहड् तबा म्राड्सी थे म्रिडम्हेमेगदे लोड्जी। तसैनोन स्वर्गदूतला ताम थे:सी थेनीगदे ल्हानान ताड्सी येशूला चेलागदेदा थे ताम पाड्बारी धुर्साग्याम थोन्सी यार्बान निजी।

9 थे म्रिडम्हेमेगदे ग्यामरी निबान लमा तिक्खुरीन येशूसे स्याप्सी “एनीगदेदा शान्ति तगै” भिसी सुड्माहेन्से थेनीगदेसे येशूला स्यहाप चुड्सी फ्या लजी। 10 जमाहेन्से येशूसे थेनीगदेदा “एनीगदे थालोड्गो, डाला आलेगदे मुबा ग्लारी निसी थेनीगदेदा गालील अञ्चलरी निउ भिउ, थेनीगदेसे डादा थेरीन स्याप्ला भिसी पाड्सी पिन्गो” भिसी सुड्जी।

धुर्सा खुड्बा सिपाहीगदेसे पाड्बा ताम

11 थे म्रिडम्हेमेगदे धुर्साग्याम निमाहेन्से धुर्सा खुड्सी चिबा सिपाहीगदे न्हडला कोइ कोइ सिपाहीगदे शहररी निसी परमेश्वरला मन्दिररी पूजा लबा मुल म्हिगदेदा थे धुर्सारी तिग तिग तबा मुबा, थे ताम पाड्सी पिन्जी। 12 जमाहेन्से पूजा लबा मुल म्हिगदेदेन यहूदी गन्बागदे हुप तसी थेनीगदे न्हडरी सल्लाह लसी सिपाहीगदेदा ल्हानान टाडगा पिन्सी चुहड् भिसी भिजी, 13 “एनीगदेसे ‘डनी म्हुनड म्हेर्बा धुइरी थेला चेलागदे खसी थेला लास यहो लसी भोर्जीम’ भिसी पाड्गो। 14 तिगै लसी चु ताम अञ्चलाधीशसे था याड्जी भिसै डन्से थेदा ताड्ना लसी एनीगदेदा तिगै लआपुड्।”

15 जमाहेन्से सिपाहीगदेसे थे टाडगा किन्जी, ओच्छे थेनीगदेदा लोप्बा अन्छारनोन म्हिगदेदा पाड्जी। दान्देधोनाएनोन यहूदीगदेला गुडरी चुनोन ताम लसी चिमुला।

येशूसे पिन्बा थुमला अर्ती

मर्कूस १६:१४-१८; लूका २४:३६-४९; यूहन्ना २०:१९-२३; मुल चेला १:६-८

16 येशूसे ह्याडला च्युक गिक चेलागदेदा “गालील अञ्चलला गडरी निउ” भिसी कुल्बासे लमा थेनीगदे थेरी निजी।\* 17 थेरी थेनीगदेसे येशूदा म्हाड्सी फ्या लजी। तर थेनीगदे न्हडला कोइ कोइसे चा येशू हिन्ना कि आहिन भिसी शङ्का लजी। 18 जमाहेन्से येशू थेनीगदे मुबा ग्लारी फेप्वसी चुहड् भिसी सुड्जी, “च्यागो, परमेश्वरसे स्वर्गदेन जम्बुलिडला जम्मान अधिकार डादा पिन्बा मुला। 19 थेतबासेलमा एनीगदे य्हुल्सा य्हुल्सारी निसी जम्मान य्हुलला म्हिगदेदा डाला चेला सहोड। ओच्छे थेनीगदेदा परमेश्वर आबा, परमेश्वरला झादेन परमेश्वरला आत्माला मिनरी बप्टिस्मा पिन्गो,\* 20 ओच्छे डाइ एनीगदेदा लोपबादेन कुल्बा जम्मान ताम थेनीगदेदाएनोन लउ भिसी लोपगो। च्यागो, परमेश्वरसे जम्बुलिडला जम्मान म्हिगदेला निसाफ लबा धिनधोनाएनोन डा एनीगदेदेन छ्यामनोन तला।”

\* 28:16 मत्ती २६:३२; मर्क १४:२८

\* 28:19 मुल १:८

**परमेश्वरला बचन छार कबुल**  
New Testament in Tamang, Eastern

Copyright © 2011 Eastern Tamang Language Team

Language: Eastern Tamang (Tamang, Eastern)

Translation by: Wycliffe Bible Translators

Contributor: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. and Eastern Tamang Language Team.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789937221221

The New Testament

in Tamang, Eastern

**© 2011, Wycliffe Bible Translators, Inc. and Eastern Tamang Language Team.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

Updates

eBible.org

---

PDF generated using Haiola and XeLaTeX on 3 Jul 2018 from source files dated 14 Jun 2018

75fec6d5-7473-5018-a7c0-dd9740a83748